

**NATIONAL ASSEMBLY OF
SEYCHELLES**

Tuesday 13th April, 2021

The Assembly met at 11am

National Anthem

Moment of Reflection

Mr Speaker in the Chair

MR SPEAKER

Bonzour tou bann Manm Onorab e bonzour nou piblik ki pe swiv nou fidelman. Onorab Rosie Bistoquet in demann mwan en moman pou adres en mesaz lo en size ki kontinyen preokip nou e nou Nasyon. Onorab Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour tou Manm Lasanble e bonzour tou dimoun ki pe ekout nou.

Le 7 Avril 2021, lemonn enkli Minister Lasante ti dedye lannen 2021 pou tou travayer lasante ki travay dir pou konbat kont sa lepidemi COVID-19. An siny solidarite avek tou travayer lasante set avek regre ki nou'n aprann yer nou premye travayer lasante ki'n kit nou atraver konplikasyon COVID-19.

Sa en *nurse, nurse* Gerry Govinden avek en long karyer dan lasante. Ti en *frontline worker* e osi ti travay dan Minister Lasante. Parey tou travayer lasante i ti ganny byen apresye par son koleg e osi par tou bann pasyan. I ti touzour pare pou deservi lezot dan nenport ki sirkonstans.

O non tou bann Manm Lasanble nou senpatiz avek lafanmir e osi nou solider avek tou bann travayer lasante. Alor mon pou dir li son nanm i repoz an pe. Mersi.

MR SPEAKER

Mersi Onorab. Nou pou re-pran dernyen staz lo *Appropriation Bill* 2021. Avan nou al lo *Third Reading* mon ti a kontan nou repas dan Staz Komite e nou apel delegasyon Minis Finans ki deryer silvouple.

Bonzour e byenveni Minis Naadir Hassan, Minis pou Finans, Plan Ekonomik e Komers e Sekreter Prensipal Damien Thesée pou Finans.

Konman en pti latous seremoni final la sa travay lo *Appropriation Bill*. Avan nou pas lo *Third Reading* mon ti a kontan envit bann *Leaders'* Lasanble e osi Minis pou fer en pti ladres pou terminen.

Premye *Leader* Lopozişyon e apre *LGB* e apre Minis. Onorab Pillay.

HON SEBASTIEN PILLAY

Mersi Mr Chairman. Bonzour Mr Chairman, bonzour tou Koleg Onorab. E byensir bonzour Minis *welcome back to* Lasanble Nasyonan.

Mr Chairman ozordi nou pe ariv a la fen sa prosesis lo Bidze pou sa lannen. E premyerman mon oule konmans par remerci mon lekip ki mon dirize dan Lasanble, mon lekip *United Seychelles* e mon bann Manm pou sa travay, sa determinasyon e sa rezilyans ki zot in montre pou partisip dan prosesis deba Bidze.

E osi dan son *Committee Stage* pou kontinyen anmenn bann keştyon ki neseler, lo bann size ki pe preokip popilasyon an relasyon avek bann *Policy*, e lafason ki Gouvernman i antisipe pou li servi sa Bidze.

I enportan pou note Mr Chairman ki nou'n eksprim nou sipor kot i neseler pou bann travay sekter piblik. E bann lezot linisyativ ki Gouvernman pe propoze pou pran, an relasyon avek bann keksoz ki nou menm ler nou ti dan Gouvernman nou'n met an plas.

Me nou'n osi annan regre lo serten pozisyon ki Gouvernman in fer. E konman en Lopozişyon i nou drwa, i nou devwar pou prezant sa bann fe devan Lepep Seselwa. E mon krwar nou'n alaoter ler nou'n fer li dan lafason ki nou'n fer li.

Nou'n respekte tou protokol Lasanble e pou sa mon remerci mon lekip pou lafason ki nou'n azir dan en fason responsab an relasyon avek bann Bidze sirtou pandan *Committee Stage*.

Lefe I reste ki nou ankor annan diferans lo serten Prensip. Me sa bann diferans nou pou kontinyen regard ladan. E konman en Lopozişyon serye nou pou kontinyen anmenn bann size ki neseler devan Gouvernman, atraver *platform* Lasanble, pou asire ki lavwa Lepep Seselwa an antye i toultan kapab ganny tande e ganny ekoute.

Mon oule osi Mr Chairman remerci travay ki Sekretarya in fer atraver ou lofis, aköz mon krwar pandan sa letan ki nou'n dan Bidze bann *staff* in devoue e dedye bokou zot letan pou siport nou bann Manm Lasanble. E pou sa mon dir zot merci.

Mwan osi Mr Chairman bezwen remerci bann *staff* dan mon lofis ki malgre ki apre ki

nou'n fini Bidze parfwa apre ler, zot in bezwen reste akoz mon'n annan serten travay ki mon'n bezwen kontinyen fer. E mon remerisi zot enfiniman e zot fanmir pou zot konprenezon.

Lo la par tou Manm mon osi remerisye tou nou bann fanmir. Mon konnen i pa'n fasil pou zot akoz letan ki nou fini Bidze, e nou tou nou konnen ki travay en *MNA* pa zanmen fini apre ki Lasanble in *adjourn*.

E nou fanmir in swiv nou e in sipor nou pou sa mon osi remerisi zot. Mr Chairman la ki nou pe al ver pran *Third Reading* lo sa Bidze, nou resteangaze pou asire ki Gouvernman i depans sa larzan dan en fason responsab.

Me osi nou reste angaze pou asire ki Lepep Seselwa son lavwa, son konsern i ganny met devan ler i neserer. Mon remerisi ou Mr Chairman.

(APPLAUSE)

MR SPEAKER

Mersi *LOTO*. Onorab Georges.

HON BERNARD GEORGES

Mersi Mr Chairman. Bonzour Mr Chairman. Bonzour Minis, bonzour *PS* Thesée. Bonzour tou bann Manm Onorab e tou dimoun ki pe swiv nou dan lakour.

Mon ti a kontan Mr Chairman bomaten zwenn mon koleg *Leader* Lopozisyon dan Lasanble Nasyonal, Onorab Sebastien Pillay pou remerisye ou, pou remerisye Minis ou ek ou Sekretarya Mr Chairman. Minis avek son lekip sirtou *PS* Thesée ki'n la avek nou toulezour pandan sa long sesyon.

Tou bann Minis ki'n vin devan Lasanble, tou bann *CEOs*, tou bann *Heads of Agencies* ki'n vin al devan nou e tou bann Manm Lasanble lo tou le de kote latap pou lafason ki nou'n travay dan sa rol *oversight*, ki nou fer konman en Lasanble lo en Bidze Gouvernman.

Annefe Mr Chairman pas en Bidze pas en *Bill* Apropiasyon donn larzan Gouvernman pou depanse, se rol prensipal e pli gran rol, rol pli mazer ki en Lasanble i annan dan son fonksyon.

Nou premye fonksyon set en fonksyon Lezislatif. Nou dezyenm fonksyon set en fonksyon *oversight* e nou trwazyenm fonksyon set en fonksyon reprezant nou bann *constituents* e la Nasyon Seselwa.

E dan en Bidze sa trwa fonksyon i vin ansanm. Nou pe fer *oversight* lo Gouvernman

nou pe reprezant nou bann dimoun e etandonnen ki Bidze i en Lalwa nou pe *legislate* pou donn Gouvernman Egzekitiv pou vwar pou li kapab travay.

E mon tenir a remersye tou bann dimoun ki'n met zefor ansanm pou fer ki atraver sa Bidze, nou Lasanble in kapab montre avek Lepep Seselwa ki mannyer nou kapab desarz tou le trwa fonksyon an menm tan.

Mr Chairman sa ti premye Bidze nouvo Gouvernman ki'n ganny elekte depi lannen pase. E mon'n apresye lafason ki mannyer ou'n diriz sa deba. E mon remersye ou pou lafason ki ou'n fer li anver e kontre kou in annan serten pti kontre tan me nou'n kapab sirmont sa avek lobzektif pas en Bidze devan nou a tou moman.

Sa enn Bidze in al pli lontan e bann Manm in al pli profon. Pa toultan lo bann *item* ki ti nesaser pou nou al ladan. Me mon konpran ou filozofi sa se en nouvo Gouvernman avek en nouvo direksyon, en nouvo seri Minis ki'n vin devan nou Lasanble e en kantite nouvo Manm Lasanble ki pe fer en Bidze pou premye fwa.

E alor i ti esansyel pou tousala pou ki nou annan en gran lasouples dan lafason ki nou antreprann sa travay.

E mon konsyan sete sa ki'n diriz lafason ki ou ou'n anmenn Lasanble pandan sa letan. Pou ki bann Minis i ganny en loportinite pou zot enterakte avek piblik Seselwa pou piblik Seselwa vwar zot pou premye fwa, e vwar ki mannyer zot pe travay.

E ki bann Manm Lasanble sirtou bann nouvo Manm Lasanble i kapab demontre avek zot *constituents* ki zot pe fer sa travay reprezantasyon, ki zot in ganny anvoye isi pou fer.

E donk mon krwar ki nou'n kapab demontre sa dan en fason tre pozitiv e tre byen. In mon loner Mr Chairman pou diriz mon *Caucus* pou sa premye Bidze konman *Leader of Government Business*.

E mon pa kapab pran okenn laglwar pou sa akoz se travay bann Manm Lasanble ki'n fer sir ki nou'n kapab ariv la kot nou'n arive ozordi.

Mon krwar ki avek sa Bidze Egzekitif i ava annan en tre bon zouti travay. Nou'n fer konnen kote nou krwar i bezwen annan lamelyorasyon e sa dan nou rol *oversight*. Akoz pa zis Lopoziyon ki fer *oversight* lo en Bidze me tou Manm Lasanble i fer *oversight*.

Me nou'n siport Gouvernman dan son demars pou anmenn pei dan en nouvo

direksyon e a en fitir bokou pli *bright* ki sa enn ki nou merite an Oktob lannen pase.

Alor avek sa detrw a mo Mr Chairman mon oule remersye ou, ou lekip e tou bann dimoun ki'n partisip dan sa prosesis. Mersi bokou.

(APPLAUSE)

MR SPEAKER

Mersi *LGB*. Minis Naadir Hassan.

MINISTER NAADIR HASSAN

Mersi Mr Chairman. Bonzour Mr Chairman. Bonzour Dirizan Lopoziyon. Bonzour Dirizan Zafer Gouvernman. Bonzour tou bann Manm e bann dimoun a lekout.

Mr Chairman premyerman mon oule dir mersi pou ou Biro Sekretarya Lasanble Nasyonal e tou bann Manm Onorab pou zot korperasyon dan sa prosesis laprouvasyon Bidze.

Nou'n ganny bon lenteraksyon pandan sa plis ki 1mwan ki sa prosedir laprouvasyon Bidze in deroule.

Mr Chairman parey mon ti anonse dan mon diskour Bidze 2021 ki mon ti prezante avek Lasanble Nasyonal le 16 Fevriye, sa Bidze i annan de bi prensipal.

Premyerman anmenn Bidze Gouvernman stabilite dan Bidze Gouvernman e retourn li gradyelman lo en baz soutenab.

Dezyenmman sa Bidze pe met fondasyon pou relans e transform nou lekonomi. Pou ki Bidze i vin soutenab nou pe fer sir ki gaspiyaz dan Gouvernman i ganny eliminen, depans i redwir, labi e koripsyon i ganny retire, e depandans lo Gouvernman i ganny redwir.

Alor mon oule donn sa Lasanble mon langazman e langazman Gouvernman ki tou Minister ek bann Lazans ki depan lo en Bidze Gouvernman, ki tou zefor pou ganny fer pou asire ki zot larzan ki zot in gannyen dan sa Bidze 2021, i ganny depanse byen e dapre bann Lalwa ek Regilasyon ki an plas.

Mr Chairman i fer preski 2 mwan ki mon ti prezant sa Bidze devan Lasanble Nasyonal. Pandan sa letan in annan serten devlopman mazer ki pe ede pou relans nou lekonomi.

Nou'n vwar deza ki mannyer nou programm vaksinasyon kont *COVID-19* in progrese. Sikse sa programm vaksinasyon in permet nou kapab ouver nou pei, e apartir le 25 Mars nou'n vwar sa

leksitasyon e kantite touris ki pe antre dan pei.

Nou'n vwar ki depi sa dat 9049 touris in vin Sesel ki reprezant 75poursan total touris ki vin isi depi Zanvye. Avek larive touris dan pei to lesanz in konmans desann. Ozordi le 3 Avril en Dolar dan Labank Nouvobanq pe vann pou R17.14 sou konpare avek le 16 Fevriye ler mon ti delivre mon diskour Bidze, kot en Dolar ti pe vann R21.80.

Mr Chairman sa desizyon par Gouvernman dirize par Prezidan Ramkalawan pou ouver nou pei in enn ki brav e ki ti nesaser.

Mr Chairman ava mon a terminen mon oule remerisi *staff* dan tou bann Minister pou zot travay e kontribisyon pou sa Bidze. Me pli enportan osi en remersiman spesyal i al pou bann *staff* Minister Finans, Planifikasyon Ekonomik ek Komers ki'n travay lo sa Bidze 2021.

Parey mon'n dir zot apre ki mon ti prezant Bidze devan Lasanble Nasyonal mon rekonnet ki zot ti annan en pti gin letan pou prepar sa Bidze.

Me zot devouman anver zot travay in fer ki Gouvernman in reisi prezant en Bidze avek Lasanble Nasyonal parey

Konstitisyon i demande, pou sa mon dir zot en gran mersi.

Alor Mr Speaker mon dir mersi ankor Lasanble pou tou zot sipor dan deba Bidze 2021. Mersi.

(APPLAUSE)

MR SPEAKER

Mersi Minis. Lo mon par permet mwan zis *echo* bann parol apresyasyon e remersiman ki'n ganny eksprimen lo tou kote. Pou tou bann dimoun ki'n partisip dan sa prosedir *staff* nou Lasanble ki'n travay par deryer, pou fer marse sa prosesis, bann Manm zot menm ki'n partisip dan en deba.

E bann Minis e bann Zofisye Egzekitiv ki'n vin partaz avek nou lenformasyon e zot lesplikasyon lo sa ki annan dan sa Bidze. Mon vwar ki sa Bidze i en latas vremen enportan ki la Lasanble in fer anba nou Konstitisyon e pou nou pei.

E mon sirtou apresye bann lespri linite ki'n diriz Lasanble pou laplipar *la grande* mazorite deba dan sa prosesis Bidze.

Malgre bann pti moman kot in annan diferans en pe vokal Lasanble in tret sa Bidze avek lespri linite ki i ti merite, e pou mwan menm zot a konnen. Zot a rapel ki mon

preokipasyon prensipal, sete touzour pou fer marse sa prosesis, pou fer li avanse.

E mon remersye bann Manm e bann zofisyè, ki zot in tenir bann direksyon ki mon'n donner tanzantan, lo ki manner pou fer avanse sa prosedir. Avek sa mon ava dir ankor mersi bokou tou dimoun.

Bon prezan nou pou prosed avek *Third Teading* lo sa Bidze. Ki pou en total R11 bilyon 13milyon 648mil 296, e byensir avek not ki 1.5milyon in ganny *freeze* par Lasanble.

E pou kontinyen nou ava re pas dan staz Lasanble, pou mwan envit *LGB* pou prezant son Mosyon, pou *Third Reading Appropriation Bill 2021*. Onorab Georges.

HON BERNARD GEORGES

Mersi Mr Speaker. Mr Speaker i mon loner anba *order 76 (1)* pou *move* ki *Appropriation Bill 2021*, i ganny lir pou en Trwazyenm Fwa. Mersi.

MR SPEAKER

Mon ava ganny segonde? Onorab Sandy Arissol.

HON SANDY ARISSOL

Bonzour Mr Speaker. Bonzour Minis avek *PS*. Bonzour bann manm. Mr Speaker mon segonn

mosyon propoze par Onorab Georges. Mersi.

MR SPEAKER

Mersi. Nou a ganny vot Lasanble lo sa Bidze. Manm ki vot an faver lev lanmen silvouple? Mersi. Okenn Manm ki vot kont?

Vot lo *Third Reading Appropriation Bill 2021* in ganny 24 vot pour, 0 vot kont e 10 abstansyon. Vot in pase par Lasanble.

E aprezan mon avar envit Madanm *Deputy Clerk* pou fer *Third Reading* sa *Bill* silvouple.

MADAM DEPUTY CLERK

Mersi Mr Speaker. *This Act may be cited as the Appropriation Act 2021*. Mersi.

MR SPEAKER

Mersi. mon annan plezir pou anonse ki Lasanble in aprouv *Appropriation Act 2021*. Bon nou pou kontinyen avek nou *Order Paper*.

E nou annan plizyer pou nou pran. E pou premye nou annan menm zofisyè ki devan nou Minis Naadir Hassan Minis pou Finans. Mr Damien Thesée pou Sekreter Prensipal, e mon ava osi apel Mrs Celina Verghese Direkter Zeneral pou *Tax ek Financial Sector Policy*. E

Mr Victor Pool *Senior Legal Draftsman* dan *AG's office*.

Bonzour e byenveni Mrs Celina Verghese Direkter Zeneral pou *Tax and Financial Sector Policy*. E Mr Victor Pool *Senior Legal Draftsperson* dan *AG's office*, e pou nou pran *Corporate Social Responsibility Tax (Repeal) Bill, 2021*.

Avek sa mon ava envit *Leader Biznes* Gouvernman, pou fer *Second Reading* sa *Bill* silvouple.

HON BERNARD GEORGE

Mersi Mr Speaker. Mr Speaker anba *Order 69(2)* mon *move* ki *Corporate Social Responsibility (Repeal) Bill 2021*, i ganny lir en *Dezyenm Fwa*. Mersi.

MR SPEAKER

Mersi nou a ganny segonde lo sa *Mosyon*? Onorab Sandy Arissol.

HON SANDY ARISSOL

Mersi. *Mosyon* i ganny segonde.

MR SPEAKER

Mersi. Prezan nou ava envit *Minis* pou prezant *Bill*.

MINISTER NAADIR HASSAN

Mr Speaker, Onorab *Leader* Lopozisyon, Onorab *Leader* pou

Zafer *Gouvernman*, bann *Manm Onorab*, Ser e *Frer Pep Seselwa* bonzour.

Mr Speaker an liny avek lanons ki mon ti fer pli boner sa lannen, dan diskour *Bidze 2021*. Konsernan *Corporate Social Responsibility Tax* ouswa *CSR Tax*, e an akord avek *Lartik 94* *Konstitisyon Repiblik Sesel*, ozordi mon entrodwir avek *Lasanble Nasyonal* sa *Prozedlwa*.

Ki pe demande pou aboli *Lalwa CSR Tax*, sa i *Corporate Social Responsibility Tax (Repeal) Bill, 2021*.

Mr Speaker *Corporate Social Responsibility Tax Act 2013*, ki an diskisyon ozordi. Ti vin an fors le *01 Zanvye 2014*, avek bi pou promot langazman *sekte prive* dan zot *kominote*, atraver bann *donasyon* e *sponsorship*.

E osi ki *Gouvernman* i kolekte *reveni adisyonel*, an vi ki *plizyer biznes* dan serten *Sekte* ti pe kontinyelman pa *pey tax*. Ouswa pe *pey tre pe de tax* lo zot *profi*. An *2019* *Gouvernman* ti organiz *premye seri meeting* konsiltativ, avek *lasistans OECD* pou en *revi konpreansiv* lo nou sistenm *tax* lo *biznes*.

Bann *pwen* ki ti ganny fer *resorti* an sa ki konsern *CSR Tax*, e *TMT Tax*, pandan sa

konsiltasyon ti annan pou fer avek bann lefe advers, ki sa 2 *tax* i kree lo Biznes. Pli spesifikman *CSR Tax* e *TMT* i 2 *Tax* ki baze lo reveni, e non pa lo profi.

Ki vedir bann depans en biznes pa ganny pran an konsiderasyon, e sa i penaliz bann biznes ki pa fer bokou profi.

En devi adisyonnèl, se ki sa i osi kapab ankouraz bann Biznes pou *operate*, dan sekter enformel kot zot napa okenn obligasyon *tax*. E sa an retourn i redwir koleksyon *tax* lo kote Gouvernman.

Sa 2 *tax* i osi kapab annan en lenpak endirek lo nou sistenm *VAT*, e *PIT* an term revè ki ganny kolekte akòz dekouraz bann biznes. Pou deklar zot revè, ouswa *payroll* aktyèl. Anvi sa bann defi e lenpak ki *pandemic COVID-19* in annan lo sekter prive.

Gouvernman in alors propoze ki *CSR Tax* i ganny aboli, koman enn bann premye faz reform. E sa i ava vin en soulazman dan sa moman difisil, pou sa bann biznes ki pa pe performen.

Mr Speaker avek abolisyon *CSR Tax* i enportan pou note, ki sa pou annan lenplikasyon lo kote biznes. E osi bann ki ti pe benefisye

atraver Donasyon e *Sponsorship* anba *CSR*. An partikilye bann Lorganizasyon *Sosyete Sivil*.

Lenplikasyon lo biznes, se bann biznes ki ti annan lobligasyon pou pey *CSR Tax* apartir Zanyè 2021. E ki'n fer okenn donasyon ouswa *sponsorship* an ekse sa 0.50poursan *tax*, ki ganny preskri anba Lalwa *CSR*, pa pou kapab *carry forward* sa sonm an plis, ki'n ganny kontribye apre ki sa morso Lezislasyon i ganny aboli.

Mr Speaker mon anvi fer resorti ki i annan en alternativ, anba 5th *Schedule* Lalwa *Tax* lo biznes, ki permet sa bann biznes pou dedwir 100poursan sa sonm ki'n ganny kontribye, anba zot *assessable income*. Lo kondisyon ki sa *beneficiary* ti deza annan en *Certificate of Charity Status*.

Son lenplikasyon lo *Sosyete Civil*, bann Lorganizasyon *Sosyete Sivil* ki annan en *CSR Certificate of Entitlement*, e ti pe benefisye avek bann donasyon ouswa *sponsorship* atraver *CSR*, pou nepli resevwar sa bann kontribisyon, par lefe ki sa Lalwa pou nepli egziste.

Me parey mon'n mansyonnen lo kote Biznes, sa bann Lorganizasyon *Sosyete*

Sivil i annan sa opsyon pou fer zot laplikasyon pou en *Certificate of Charity Status*. Pou ki zot ganny kouver anba sa provizyon Lalwa *Tax* lo Biznes, lo kondisyon ki zot satisfè bann kriter.

Mr Speaker malgre ki *CSR Tax* pe ganny aboli, mon anvi met lanfaz ki napa naryen ki anpes en biznes, fer en kontribisyon anver son kominote.

Gouvernman i santi ki i pa neser ki nou annan en Lalwa an plas, pou ki en biznes i kontribye Sosyete Sivil.

Sa responsabilite anver son kominote, i devret volonter e pa ganny forse par en Lalwa. Avek sa mon aprezan prezant *Corporate Social Responsibility Tax (Repeal) Bill, 2021*, pou deliberasyon e laprouvasyon Lasanble. Mersi.

MR SPEAKER

Mersi Minis. Nou ava komans avek deba lo sa *Bill*. Nou a komans avek Onorab John Hoareau.

HON JOHN HOAREAU

Mersi Mr Speaker. Bonzour Mr Speaker. Bonzour tou dimoun ki pe ekoute. Bonzour tou Manm Lasanble, *Corporate Social Responsibility (Repeal) Bill* ki'n vin devan nou, i vreman

enportan ki sa *Bill* i ganny *repeal*.

Mon pou donn de trwa rezon akoz mon pe dir i enportan, ki sa *Bill* i ganny *repeal*. Premyerman i en *unfair tax*, parey dan langaz petet Biznes nou pou met li koman en *punitive tax*. Ler nou pe dir en *tax* i *punitive* i vedir i baze lo *turnover*, *as oppose to* baze lo profi ki sa lorganizasyon i fer.

Alor *turnover* li i enkli tou bann reisit *sorry*, ki sa biznes oubyen sa lorganizasyon i fer. I pa pran an konsiderasyon bann kou par egzans, bann *fixed cost* ki enkli lasirans, *wages*, *rent* bann *recurrent cost*. Bann *concurrent cost* ki i form parti, sa ki nou apel the *operational cost* of sa lorganizasyon.

So i pa pran kont sa bann depans, ki sa Lorganizasyon pe depanse. Me i pran kont lo zis sa revu ki i gannyen, alor i fer ki en *tax* ki pe pini en Biznes.

Mr Speaker sa size *Corporate Responsibility Tax*, in enn ki depi byen lontan depi ler en fwa mon ti al vwar Mr D'Offay kot St Andre, pou rod en pti *sponsorship* pou en levennman, ki mon ti pe fer pou Beau Vallon, i ti fer mwan realize pou dir sa *tax* i pa en *tax* ki zis.

Akoz senpleman i baze lo tou sa ki ou gannyen, me

selman i pa baze lo sa bann depans ki ou pe fer. Alor i pa pran kont *sorry*, sa bann depans ki ou pe fer alor i pa zis.

Sa *tax* dan li menm i 0.5poursan baze lo *turnover*. E an 2019 ti annan en lamannman ki ti ganny propoze, kot i ti osi *include royalties, natural resources amount e rent* ki ti form parti bann *exemption* oparavan.

Me selman i ti *exclude dividend*. Ler nou gete lo sa *First Schedule*, i dir nou sa *tax* i *payable* lo tou biznes ki fer en *turnover* 1 milyon an montan. Vedir si en dimoun dizon i fer R100milyon, i pou bezwen pey R500mil koman *tax*. *Corporate Social Responsibility Tax*.

Me dan sa R500mil ki i pou peye, i pou 0.25poursan son *tax*, vedir R250mil i pou al anver Gouvernman. E sa lot 0.25poursan i pou al anver sa *beneficiary*. Mr Speaker ler ou get sa *tax* ou war pou dir i annan dan son Lalwa, i annan serten defayans.

Par egzanp si en konpanyen i *over pay* son *tax*, pou CSR sa *tax* i kapab ganny *credited* pou *the following year*. E sa i ti fer ki serten lakonpanyen, ti zwe avek sa kalite *tax*.

E si par egzanp zis mon donn en legzanp, Beau Vallon nou annan en lotel ki ti sipoze fer la promenad Beau Vallon, atraver son *Corporate Responsibility*.

I ti fer li i ti *claim* serten sonm, ki ti *exceed* son la kantite ki i ti pe fer. Alor sa ti ganny *credited for the following year, and following year, and following year*. Ki finalman zanmen in pey ankor *CSR Tax*.

I ti ganny demande pou li *maintain* lalimyer, lo sa landrwa, ki fer li detanzaot apre en letan i tennyen. Zour i anvi met *on*, e nou ti ganny en pake problenm ek sa. Alor i annan serten *loop ole* ki nou kapab dir i kler dan sa Lalwa.

Sa Lalwa osi ti fer provizyon pou *exemption*, pou bann lakonpanyen parey bann lakonpanyen *SITZ*. E la ler nou get par egzanp en Lakonpanyen parey *IOT*, ki fer vreman en kantite larzan. E li i pa ti pe pey okenn *CSR Tax*.

Avan sa ti pou Biznes lakaz lwe osi ou pa ti peye, me selman an 2019 ti ganny amande. Bann Biznes ki *offshore*, bann *Mutual funds* avek *Hedge funds* osi pa ti peye. Akoz zot ti form parti bann biznes ki ganny *preferential tax regime*.

Me avek sa labolisyon sa *tax*, mon krwar i fer ki, okenn sa bann problem nou pa pou gannnen. Me selman si en Lorganizasyon sportif, oubyen distrik i al rod en *Certificate of Charity* oubyen *Entitlement*, i a kapab *access* okenn larzan, ki en Lakonpanyen i anvi donn li direktman, anver son lorganizasyon. Oubyen son aktivite.

E sa i fer ki sa dimoun ki pe parey in ganny dir, ki pe donn sa larzan. sa biznes ki pe donn sa larzan, li ganny *100percent deductible from son accessible income*. So dan en fason, biznes i pli benefisyè, e osi biznes i santi li en sans apartenans.

Akoz ki ti pe arive avan, nou ti vwar serten biznes oubyen serten lorganizasyon Gouvernman, ki ti pe donn tou larzan en serten group.

Par egzanp *JJ Spirit* ki ti pe benefisyè 100poursan avek *CSR*, ki sorti avek *SEYPEC*. So sa i bann labi ki'n arive ki'n fer ki, ozordi zour nou vwar poudir nou pe met en lord dan sa bann dezord.

Mr Speaker avek sa mon pou termin mon kontribisyon ver sa *Bill*. E mon krwar poudir tou dimoun pou vot an faver sa *Bill*, aköz i pe anmenn serten

lord. E osi pe met keksoz dan *la bonne* direksyon. Mersi.

MR SPEAKER

Mersi entervansyon Onorab Hoareau. In apepre 6 a 7 minit, mon ava envit bann Manm pou annou gard bann diskour otour 6 minit. Mersi. Onorab Andre.

HON CLIFFORD ANDRE

Mersi Mr Speaker. Mr Speaker sa lamannman ki pe ganny anmenn devan sa Lasanble, i fer mwan personnelman bokou plezir.

Minis i a rapel letan Komisyoner *tax* ti la, enn bann kestyon ki mon ti demande se aköz ki en dimoun i bezwen ganny takse lo son *turnover*?

Akoz letan i gete *turnover* i kapab gro, i vre i kapab *huge*. Me selman letan i tir bann *expenses*, bann *overheads*. Finalman profi i pti gin, i vremen pti gin ki sa *tax* ki in peye posibleman lo sa *turnover*, i fer ki i ti kapab fer lezot keksoz dan sa biznes.

Mon ti dir sa aköz letan en dimoun normalman, i pe fer vini en keksoz i pe ganny sarze lo sa gro komodite ki i pe fer vini. E i pe pey en *tax* lo la, san konnen si vremen i pou kapab vann sa prodwir pou li rekiper sa *tax* ki i pe peye.

So sa i montre mwan ki Minister Finans, pe get dan direksyon sa bann keksoz. E pran konsiderasyon serten laspe ki dimoun in koz lo la dan le pase definitivman.

E ki aksyon pe ganny pran. Mon konsern avek sa Lalwa, se ki Minis in dir ki bann dimoun pou bezwen fer en aplikasyon, of a *Certificate of Charity* pou sa lorganizasyon.

Mwan mon konsern se ki anba sa Lalwa ti annan en Komite ki ti dil avek? Ki manner sa pou ganny dil avek. Eski sa komite zis i pou ganny sorti anba sa Lalwa, e i pou ganny kit la? Oubyen i pou fer sa aplikasyon avek *PS*?

Akoz i annan ler parey nou dan distrik, *at least* mon konnen Anse Aux Pins i fer sa, si nou annan en aktivite nou al kot en lorganizasyon, e nou ti anvoy en *email* kot SS Payet ki ti *Chair* sa Komite. E sa ti ganny *attended to*. So ki manner i pou fer? E ki kantite letan i pou pran?

Akoz par ler nou sey *source funding*, sorti kot diferan lorganizasyon, ki dir wi i pou donn ou. Apre pou en rezon ou en lot, i pa kapab. Be ou tay kot en lot dan en dele letan ki vremen kourt.

So ki kantite letan nou pou annan, pou nou kapab fer

sa bann travay parey. Pou ki aktivite lo sa baz i a kapab ganny kontinyen dan distrik?

Akoz nou pa en *Charity*, *obviously* selman nou pe fer aktivite pou dimoun dan nou kominote. Avek sa de trwa mo, Onorab Hoareau in dir bokou lo sa *CSR Corporation Social Responsibility Act* ki ti la avan. Mon pa pou al ladan, aköz mon vremen kontan i pe ganny tire.

Akoz i enn dan laliny parey mon'n dir lo keksoz ki mwan mon anv vwar. Alors mon osi mon entervansyon i pou bokou plis ki, si sa - Mr Speaker. Avek sa mon oule dir ki mwan mon pou donn mon sipor pou sa *Bill* ki devan Lasanble. Mersi.

MR SPEAKER

Mersi Onorab Andre. Onorab Aglae.

HON EGBERT AGLAE

Mersi Mr Speaker Bonzour Minis ek ou delegasyon. Tou manm Onorab e tou dimoun ki pe ekoute. Mon kontribisyon lo sa *repeal* li menm li i de fas, mon kapab dir. Aköz li menm li sa Lalwa ler mon pe get li, i annan de kote.

I annan en kous ki pou benefisye, i annan en kous ki pe *claim* ki li i pe perdi. I pe dir pou dir i *unfair*. Mr Speaker bokou

benefis avek sa Lalwa in anmennen an term lo kote kominoter, i kapab devlopman i kapab aktivite. E sa Lalwa i pa zis egziste dan Sesel sa.

I annan *Social Corporative Responsibility* dan bann lezot pei osi, ki'n *achieve* bokou an term devlopman. Sirtou an term lenfrastriktir, dan bann rezyon ouswa bann demann kot i *non-existence*.

E pou nou sa i en keksoz ki pozitiv. Lo en lot kote kot sirtou Biznesmenn, zot pe *claim* pou dir i annan serten negativite. Akoz la fason ki sa lalwa i ganny enplimante li menm li, ki fer ki zot dezavantaze.

Me eski keksoz ti kapab al pli lwen ki sa? Petet pou sey armoniz la fason ki dan lenplimantasyon sa Lalwa? Petet sa ki mon santi nou pa'n al en pti pe pli devan lo la. Lo la fason, lo son lenplimantasyon.

E bokou pei osi i vwar pou dir en *CSR Tax*, i en fason osi pou annan en *tax avoidance* par sa bann antite. *Ok?* Me selman parey mon'n dir ou bezwen bann mekaniz a plas osi, ki ler nou anmenn en Lalwa, pou fer ki sa bann keksoz i pa ariv lo sa lanpler. Ouswa kot i annan bann *loophole*, ki serten dimoun i *get away*.

Me selman mon pou retourn lo rezon det sa Lalwa li menm li. Son lentrodiksyon, nou tou nou konnen dan le pase, bann difikilte. Ki sirtou nou ki annan distrik, bann lenstitisyon. Bann *NGOs* i kapab sportif, kot ti bezwen bann sipor finansyel.

Kot Gouvernman Bidze pa ti pe neseserman kapab, *meet* sa demann bidzeter pou kapab donn fasilite finansyel. Pour kapab enplimant serten sa bann aktivite, ki pa tonm dan laliny Bidze, bidzeter anyel ki pei i prozekte.

E Gouvernman ti santi poudir petet Biznes pa ti pe, petet kontribye ase. Biznes ti pe fer larzan nou konnen sa, ti pe fer larzan. Ouswa zis serten endividi ouswa Konpanyen ki ti donner. E zis en serten kantite – en group endividi ouswa Lorganizasyon ki ti pe benefisyé.

So dan en baz pou anmenn en *fairness* ladan, Gouvernman ti dir be *ok*, alor nou ava kree en *tax*. Ki nou ava *apply* 0.5poursan lo sa *turnover*. E ladan 0.5 i ava ganny kontribisyon, lo sa *Corporate Social Responsibility* e se sa ki ti arive.

Me le problem la, mon kapab dir. Nou'n vwar poudir, bokou aktivite devlopman in ganny fer. E mon distrik i en

legzanp, akoz mon annan en lotel Ephelia ki'n kontribye anver CSR. Ki nou'n kapab fer enn de proze devlopman kominoter, ouswa target bann groupman dan distrik.

Ki bezwen sipor ki Gouvernman li menm. Atraver bann Minister pa kapab siporte. So i ti vin *sort* en pti ekstansyon finansyel, ki ganny donnen pou akonpli serten bann devlopman.

E Mr Speaker sa ki mwan mon konpran ozordi, avek *repeal* sa Lalwa li menm li. *Ok*, se ki nou dan en moman kot i annan problem ekonomik. Biznes pa pe neserman fer byen. E ki i pou *pick up* a lavenir.

Mwan kon konsern petet Minis, eski nou pa pe tay ek en keksoz la, zis akoz nou dan en sityasyon ekonomik? Eski napa lezot fason fer? Petet ou'n nonmen poudir wi, Biznes i kapab vini rod en *Certificate of Charity*. Be konbyen ki pou vini, ki pou anvi fer sa?

Konbyen ki pou pare pou dir zenerezman, mon anvi donnen akoz mon santi poudir mon'n fer byen? Ouswa nou pou retourn parey zot ti ete avan. Kot serten pou zis kontinyen anrisir, e i pa pou donnen. Ouswa li i pou donn zis sa ki li i anvi.

Tousala i bann konsern ki kapab vini.

Nou konnen pou dir lekonomi pei li menm li i pou *recover within the next, 2 to 3 years* nou. Nou konnen sa, e Minis bomaten ou'n vini ou'n dir gete devis dan labank la. Ki ti 1mwan pase 2mwan pase, ler ou ti vin delivre ou Bidze ti 21 la in desann 17. En bon siny pou lekonomi sa.

I normal, nou kontan, nou apresye. Me selman nou pa pe tro *downplay* sa *card*, en pti pe tro vitman? Pou nou taye tir sa *tax*, ouswa nou rod fason ki mannyer nou kapab anrisir sa *loophole* ki neser. Ki fer ki Biznes li menm li pe santi li en pti pe dezavantaze. Akoz pe dir sa *tax* i *unfair*? Sa i en pwen.

2enm pwen ki mwan mon anvi touse lo sa *Bill* li menm li, se ki i annan serten program. Malgre *COVID* in fer serten aktivite arete, ki pou apre byento pou komanse.

E lanpler e lavites ki sa i kapab re lanse, sa bann aktivite, i riske ganny afekte, akoz nou konnen poudir Gouvernman in koup bokou dan Bidze la.

Lo kote parey *Community Life Programmes* in koupe. E sa pou annan en lefe direk lo *restarting* sa bann aktivite li menm li. Mon konnen i annan

serten distrik, ki'n petet i annan serten plan ki'n fini met devan. Ki ti pou ganny *committed* anba CSR, parey kot mwan mon'n dir. E sa i pou en lenpak direk, kot pou bezwen, nou pa pou kapab bouze pou le moman la.

Nou pou bezwen rod sours alternativ, ki i pa Bidze Gouvernman. Akoz i pou napa pou donner.

So eski prezan volonterman mon al apros sa antite mon dir li be gete la CSR tax in aboli, nou ti koze ou ti dir mwan ou pou ed mwan avek tel devlopman.

Prezan mon pou bezwen esper son larepons, i ganny dwa dir mwan be gete napa CSR tax la, sa prosedir al rod en *Certificate of Charity* i kapab vin en lot problem pour li lot isi lot laba. Nou pa konnen e mwan mon pa sir ki pou arive.

Si Minis ou pou petet ou pou dir mwan be ok en Biznes ki anvi donner si i anvi lo en baz kontinite parey i ti pe fer i vin rod sa sertifika. E keksoz pou *flow* pour li. Eski sa i en garanti ki nou pou gannyen?

E pour konklir Mr Speaker. Mwan mon lev mon sapo avek bann Biznes ki pe fer li e ki ankor pe fer li lo en baz volonter pour kontribye. E bann osi ki pa'n – malgre ti annan sa CSR Tax la, i annan Biznes osi

pa ti vini ver la kominote li, i ti zis donn Gouvernman. Akoz mon krwar Gouvernman toulezan ti pe anmas apepre, dan fon CSR tax apepre R20milyon i ti anmase. Ki Gouvernman li menm li apre i re met li dan son balans li menm li pou servi dan en lot fason.

Gouvernman pa ale pour redonn dan en kominote ouswa pour donn dan en antite pou soulaz li dan en sipor. Gouvernman i pran sa larzan i kit la ek li, *ok?*

So pour mwan i annan en *unfairness* ladan lo tou lede kote. I vre ki Biznes pa santi konfortab lafason i enplimante. Me lo lot kote osi sa *unfairness* la prezan pou vin lo kominote sa laspe sosyal.

Akoz mon pa garanti poudir volonterman bokou Biznes pou pare ler pei in retourn lo semen profitabilite pour zot vini dir be la, la mon pare pou ede, mon pare pou donner.

Akoz dan lanatir nou vwar ennler si nou pa met keksoz dan Lalwa i pa marse, i pa efektiv. Mon zis *hope* poudir *I'm wrong about* sa, e mon a espere pou gete ki lefitir i anmennen lo sa size. Mersi.

MR SPEAKER

Mersi Onorab. Onorab Woodcock.

HON WAVEL WOODCOCK

Mersi Mr Speaker. Bonzour Minis ek ou Delegasyon, tou Manm e tou dimoun a lekout. Mr Speaker mon pou konmanse par felisit Minis avek nou Prezidan. Akoz nou'n ouver *Airport*, mon'n kontan pou tande ozordi ki nou lekonomi pe refer menm si ti annan en bann ki pa ti an faver ki nou reouver nou lafrontyer. E pour sa mon felisit zot pour sa bon travay ki zot in fer.

Mr Speaker sa *Bill* ki devan nou pe demann Lasanble Nasyonal pou *repeal* ouswa *annul Corporate Social Responsibility Act 2013*, ki nou konnen konman *CSR Tax*.

Sa *Act* ti ganny *assent* par Prezidan Michel le 27 Desanm 2013 e i ti vin anfers parey Minis in dir le 01 Zanvye 2014. E sa *CSR Tax* ti aplikab pour bann antite, bann biznes ki fer en *turnover* 1 milyon ouswa plis par lannen.

E i zis bann biznes ki en leksepsyon ki pa pey sa *Tax* se bann ki'n ganny *exempted* anba 2enm *Schedule Business Tax Act 2009*. Peyman sa *tax* i bezwen ganny fer tou le mwan baze lo *current turnover* sa biznes. E peyman sa *tax* ti

ganny fer avek *Revenue Commissioner*, i ganny fer avek *SRC*.

Sa *CSR Tax* i 0.5 poursan *monthly turnover* en biznes e parey mon'n dir bann biznes i annan 2 opsyon pour peyman sa *tax*. Premye opsyon se en Biznes i pey 0.5 poursan sa *CSR Tax* lo son *turnover* pour en mwan. *Let's say* en Biznes – Onorab John Hoareau in eksplik sa en pe.

Let's say en biznes in fer li R100mil par mwan pour mwan Mars i pou bezwen pey 0.5poursan sa R100mil ki tonm anviron R500.

E sa 500 parey mon'n dir i ganny peye avek *SRC Revenue Commissioner*. Me i annan en lot provizyon ki sa ki fer. E sa provizyon se i donn opsyon bann biznes ki olye ki zot pey sa *full* 0.5 poursan avek *Revenue Commissioner* zot *offset* 0.25 poursan pou fer donasyon, donn *sponsorship* ouswa *fund* en proze pandan sa lannen peyman.

Savedir 0.25 poursan i al pour *SRC*, sa lot 0.25 poursan en Biznes i kapab fer donasyon avek bann *NGOs*, bann *non-Profit Organisation*, bann lasosyasyon *CBOs*. Bann *Community-Based Organisations*, Fondasyon e

lezot antite ki'n ganny laprouvasyon Minis.

E sa bann *NGO*, sa bann lasosyasyon ou fondasyon i *apply* avek en *CSR Tax Committee*. En *Corporate Social Responsibility Tax Committee* ki fer provizyon anba sa Lalwa pour ki sa bann antite, sa bann *NGOs*, Lasosyasyon zot vin en *CSR Tax benefactor*.

E se sa *Corporate Social Responsibility Tax Committee* ki fer rekomandasyon avek Minis pour sa bann antite, sa bann *NGOs*, Lasosyasyon e lezot ankor zot ganny en *CSR certificate* konman en *benefactor*.

Mr Speaker se la kot labi i antre. Kot nou'n vwar dan lepase kot bann Fondasyon ki pa merite benefisye anba *CSR Tax*, e menm bann Fondasyon ki – ouswa bann Lorganizasyon ki pe fer biznes, ki pe fer reveni, ki pe fer larzan. Nou'n vwar poudir sa bann fondasyon in benefisye avek plizyer mil menm milyon Roupie anba *CSR Tax* dan lepase.

E nou'n osi vwar kot menm bann antite politik in benefisye anba *CSR Tax* dan lepase. Onorab John in mansyonn *JJ Spirit Foundation* Mr Speaker. Par egzanp ki dan lepase ti en zouti politik ki ti ganny servi, ti en Fondasyon

Politik kot bann larzan ki zot ti pe anmase ti pe ganny servi pour fer *campaign* avek.

Pour fer bann aktivite politik kot ti fer bann aktivite kot bann zenn i vini ti donn bwar, pour donn keksoz bann zenn pou ganny vot.

Me mon pa konnen si keksoz in sanze la ozordi, akoz vi ki zot fondater i nepli la. Me selman dan lepase nou'n konnen poudir bokou sa bann fondasyon in benefisye anba *CSR Tax*.

Onorab Hoareau in koz lo *SEYPEC* i donn preske 100poursan son *CSR Tax* avek *JJ Spirit Foundation* dan lepase, e sa fondasyon pa'n benefisye zis avek one *particular* biznes.

In benefisye avek lezot biznes ankor. E parey ou war Mr Speaker se dan sa bann fason ki in annan bann labi dan lepase, ki ozordi mon vwar en rezon valab akoz ki nou bezwen *repeal* sa – pour tir en pe sa bann labi nou bezwen koup partou kot i annan labi Mr Speaker.

Si en biznes pe fer en *turnover* R100milyon par lannen e i pe donn sa 2.5poursan zis en antite, zis en Fondasyon. Nou pe koz ou environ R250mil. Me zis mazine si plis ki en Fondasyon

– *sorry* si plis ki en biznes ouswa en lorganizasyon parastatal, en *corporate bodies* ki pe donn donasyon en sel landrwa, ou kapab mazine kantite larzan ki sa fondasyon ouswa sa *NGO* i kapab pe gannnen.

E vwala kot ou vwar kot i annan en labi vremen serye. Mr Speaker nou bezwen pran kont ki i annan Biznes ki fer plis R100milyon *turnover* par lannen. Sirtou bann biznes konstriksyon, *Wholesale* e menm dan Tourism, Lotel. E parey nou'n koz lo la, Onorab John in tous lo la bann antite parastatal.

Bann *corporate bodies* parey SCAA, SEYPEC zot osi zot ti pe pey sa *CSR Tax*. E mon konnen zot in osi donn bann fondasyon, bann *NGOs*. E parey mon'n dir Mr Speaker i annan plizyer *loophole* dan sa *CSR tax*.

E zisteman mon rapel mwan ler mon ti lo *Board CEPS* dan le pase ti annan bokou konplent ki bann *NGOs*, serten *NGOs* ti fer kot i konsern bann *foreign Grants*.

Bann *Grants* ki bann Lorganizasyon enternasyonal i donnen parey *EU* i donnen, *IOC* e lezot ankor, kot bann *NGO* i ganny formen la pour la.

Ler zot konnen i annan en *Grant* pe vini ou war en *NGO* i *pop-up* i ganny formen, e zot ekrire en *Project Memorandum* zot *submit* e zot ganny sa *Grant*.

Apre ou pa tann sa bann *NGO* ankor, ou pa vwar sa bann *NGO* aköz sa bann *NGO* i disparet. E napa person ki ti pe *monitor* pou gete si sa larzan pe ganny servi byen.

E menm keksoz Mr Speaker i osi kapab arive avek kot i konsern *CSR Tax*. I annan bann *NGO* ki ganny kree zis pou ganny sa *CSR Tax* 0.25poursan. E i posib ki i kapab annan Biznes ki par deryer kreasyon sa bann *NGO*.

Ou konnen konmsi i annan plizyer *loophole* i posib ki i kapab antre, ki kapab ganny servi pour serten endividi benefisyavek sa 0.25poursan *CSR Tax* bann diferan biznes.

E i annan en largiman ki Onorab Aglae in anmennen kot in *sort of* pe dir pou dir Gouvernman pa pe pran kont bann *NGOs* ouswa ki pa pe ed bann *NGOs* ler zot pe anmas *tax*.

Me selman yer ti annan en gro deba anba *Social Programmes of Government*, kot ti en deba ase serye. E anba *Social Programme of Government* nou'n vwar pou dir i annan en kantite

Lasosyasyon, en kantite NGOs, GONGOS e lezot antite ki ganny asiste ede finansyerman anba *Social programmes of Government* e sa i kler i dan nou Bidze.

E i annan menm en *head* kot i annan sa *National Grant for non for profit organisation* ki benefisye. E *in fact* sa lannen Mr Speaker an 2020 sa *Grant* ki zot ti pe donner pour bann *non for profit organisation*, bann NGOs ti 8.6milyon.

E an 2021 in annan en ogmantasyon sa *Grant* pou vin R9.05milyon, ki en ogmantasyon anviron R400 mil. E menm dan en letan *COVID* nou vwar pou dir nou Gouvernman pe pran kont bann *NGO*, e dan en serten fason ou en lot i pe donn serten soutyen bann diferan *NGO*.

Me Mr Speaker, sa ki kler se ki on *top of* sa ki nou'n dir poudir *ok* i en pe *punitive* sa *tax* akoz i pe pini bann biznes ki zot pe bezwen pey *tax* lo zot *gross*, lo zot *turnover* olye ki zot pe pey *tax* lo zot profi. Me lo lot kote osi i annan sa laspe kot i annan sa bann labi.

E sa Gouvernman ki la in fer komitman pour koup labi e koripsyon partou kot i ete. Alor se pour sa rezon Mr Speaker ki mwan mon pou siport sa Biznes

pour *repeal* sa *CSR Tax*, sa *Act*. Mersi bokou Mr Speaker.

MR SPEAKER

Mersi Onorab. Onorab Loze.

HON JOHAN LOZE

Mersi Mr Speaker. Bonzour Mr Speaker, bonzour tou dimoun a le kout. Minis si i annan en keksoz ki nou konpran byen lo sa kote se nesesite pour biznes ganny en soulazman.

Biznes i bezwen lespas pour respire, zot bezwen lespas pou grandi. E nou konman en pep, konman en Nasyon, koman sa pei ki apel Sesel nou bezwen nou moter ekonomik ki biznes pour ed performan pour *drive* nou *economic recovery*.

Ki Onorab Aglae taler in dir nou. Ki nou *properly* vwar li posibleman dan 2 a 3an. So mon konpran tre byen la lozik ki ou'n aport devan nou ki par anlev sa *CSR Tax* ou pou kree en pe lespas pour soulaz biznes pour lezot respire.

Kestyon ki petet mwan mon ti ava poze, eski ti napa okenn lot fason fer li? *But then again* parey nou'n ganny fer konpran sa se zot Gouvernman e i pa nou plas pou dir zot ki mannyer pou *manage* zot Gouvernman.

So mwan mon senpleman poz sa konman en kestyon ki petet ti ava annan en lot fason pou fer li. Me osi petet osi i neserer pour regard sa size *tax* dan en fason pli konpreansiv. Nou konnen i annan *issues*, nou konnen kot bann febles i ete.

Zeneralman nou annan nou en sistenm *tax* ki fotif. Sesel i en pei ris. I en pei ris nou kapab pe lev li lo en nivo bokou pli o, *we need to get revenue collection right*. Nou bezwen fer li nou napa swa. Nou pou bezwen annan en sistenm koleksyon reveni ki mars byen, pa parey sa enn ki sa dernyen reform, sa dernyen dimoun ki ti fer reform in kit avek nou ozordi.

Mr Speaker letan nou pe koz lo soulazman pour biznes i annan en keksoz osi ki mon krwar Minis in tous lo Biznes e kontinyelman pa pey *tax* ouswa ki pey *tres peu de tax*. E Minis in dir nou lozik *CSR* sete petet pou adres sa bann biznes ki la.

Be Minis ou *still* pa kapab les zot sape. I annan en *homework* pou ganny fer la pour atrap zot. Ki zot a anmenn zot lo kontinyelman peye. Ouswa zot pey en pti pe plis ki *tres peu de-* akoz nou pa kapab les zot sape.

Si nou pe tir sa sel *mechanism* reveni ki ti permet nou ganny 5 sou avek zot, e sa *mechanism is no longer there* e la zot pou *go back to* zot vilen manni pour zot pa pey ditou zot pa kontribye nanryen.

So i annan en travay ki pou bezwen ganny fer osi la i annan en *homework* ki bezwen ganny fer pour nou *capture* zot, fer zot fer zot kontribisyon.

Akoz zot pe viv grandi, prospere dan sa pei mon pa vwar ki mannyer zot pa kapab kontribye an retour.

Mon lot pwen se sa size *Tax on profit* la. I nou *mode* aksepte e par bann keksoz ki mon'n tande *tax on profit* i mode prefere. I tradisyonnell *this is the way we've taxed business* depi later i later.

Be *tax on profit* e egalman ankouraz koripsyon e i ankouraz *under declaration*, ki i le ka ki pe arive dan lapratik lo teren ozordi. Nou tou nou konnen, nou tou nou konnen.

Mon pa pou target okenn sekter, mon pa pou target okenn dimoun. Selman in ganny nonmen in ganny dir bann biznes ki ouver enn, zanmen I fer profi, demen ou tande i annan 5.

Toulezan i pe ouver en brans isi, en brans laba selman i napa profi li. Komisyoner ti

asiz devan nou la devan i ti dir i annan i *neutral*. Zot pa fer *loss* zot pa fer profi, zot *neutral*. Be ki manner ou pe *operate* en biznes *neutral year in year out* ou biznes i *neutral*. Selman ou biznes pe *expand*.

Zot osi mon krwar nou bezwen donn zot en pe *taught* Minister. Ki manner nou pour *capture* zot, ki manner pou fer zot *être* responsab e fer zot kontribisyon dan sa pei ki apel Sesel la, ki pe *héberger* zot.

Minis in annan en keksoz ki'n leve selman la ki mon en pti pe – sa zafer nou pe vin met lord. Nou pe vin met lord, nou pe vin elimin koripsyon, nou pe vin isi nou pe vin laba.

Mon krwar de fwa nou koze nou politisyen nou, nou tant pour soufer *from over exuberance* de fwa.

Be a la *même instant we tend to take away from our own argument*. Ou konnen Minis ou vini ou propoz en morso Lezislasyon. *I could agree I could disagree*. Ouswa parey komisyoner ti dir *I could be neutral*.

Be selman letan en dimoun i vini i anmenn en largiman ki flou, en largiman ki fotif, i dir sa rezon mon pe siport sa se aköz tel rezon. E sa rezon ki i donnen i enn ki konpletman *illogical*. Ou vwar?

Letan nou dir nou pe vin regle koripsyon dan *JJ Spirit Foundation*. Be *JJ Spirit Foundation* li vre i ti tous CSR, i ti ganny CSR. Be avan nou dir in benefisyé, annou al gete konbyen *scholarships JJ Spirit* ti pe *fund* avek sa bann *CSR Tax* ki li i ti pe gannyen.

Annou al gete konbyen zenn Seselwa ki'n benefisyé avek *scholarship* atraver *JJ Spirit* ki in *fund* avek sa bann CSR ki ti pe vin kot li.

Mwan si en dimoun i vin ek en balans dan son largiman mon pa *mind* mwan. Se letan dimoun i vini i fer nenport ki rabasman e i sey fer dimoun krwar donk vwala la realite. Sa se laverite i annan zis koripsyon, i annan zis salte la e alors mwan mon pou siport sa pour netway sa salte.

Be i en salte fantom, *it's a salte of your own making!* Ou envant salte ou met en ta salte la apre ou le netwaye ou menm! *This is make work my friend. You making work for yourself!*

Mr Speaker se sa konmsi de fwa dan sa Lasanble la kot nou dir bann keksoz apre ki kre trou i kre febles dan travay ki annan pour ganny fer.

En dimoun i vini i penn *JJ Spirit Foundation* koripsyon, i penn *JJ Spirit Foundation* isi laba an relasyon avek *CSR Tax*.

Prezan i annan en term ki mon kontan ki ti konmanse par Onorab Affif in ganny rebran par Onorab Georges. Konm kwa avek *POCA* Gouvernman ti pe donn lanmen sa bann – vi ki Gouvernman ti dir sa se *proceeds of crime*, Gouvernman li ler i ti pran larzan ladan ki i ti pe fer esansyelman, i ti pe fer blansisaz *proceeds of crime*!

La *JJ Spirit* li i en bel ta koripsyon, salte, malpropte i pran R10 milyon i mont *State House* i met dan lanmen Prezidan John Charles Wavel Ramkalawan. E i aksepte li! I aksepte R10milyon dan lanmen sa monst, sa salte ki zot pe dir la ki pe fer zot siport sa *repeal*.

Eski sa pa blansisaz koripsyon sa, *made by the highest office in the land*? Ki manner zot dekrir sa enn? Mr Speaker ou vwar *all this could have been avoided*. Nou pa ni ti bezwen al laba bomaten.

Sa travay ki devan nou la 30 minit nou ti'n fini sa, *done, over with*! Ti a'n fini pa ni ti pou'n bezwen al laba. Parey mon dir ou Mr Speaker *over exuberance* de lapar serten nou ki toultan pe seye, pe seye pov nou, *to get noticed*.

Mr Speaker mon pwen final ki mon annan pou dir lo la. Minis parey ou dir pei in re

ouver. Touris i vin Sesel premyerman pour Seselwa, sa pep. Son lakey, son fason *chaleureux* ki i annan. I vin Sesel pour Seselwa. I vin Sesel pour sa soley ki nou annan ki nou napa okenn kontrol *over*, de fwa i boude avek nou i pa la. I vin Sesel pour sa pei, sa lanatir, sa *vision of loveliness* ki nou annan.

I annan en group dimoun e sirtou zenn, sa bann *NGOs* la ki pe travay dan konservasyon, *environmental management* dan tou sa bann zafer. E zot en group dimoun devoue. E sa ki fasin mwan avek sa bann *NGOs* sirtou sa bann *Youth-Led NGOs* zot parey en liniversite dan zot menm.

Ki pe kree en *group of very ethical youth leadership* pour fitir sa pei, fitir sa Nasyon. Mon pa pe get zis sa ki zot pe fer ek zot lanmen ozordi sa *oeuvre* dan proteksyon lanvironnman. Be annou get sa bann dimoun ki zot pe prodwir sa bann *leaders* la, bann *youth leaders* dan sa bann *NGOs* la.

Mon krwar nou bezwen en fason pour nou sey anmas zot osi en pe. Nou bezwen en mekanizm ki kler, ki manner zot kapab ganny *funding* pou fer sa travay ki zot, zot pe fer. Ki personn – an nou admet, *il faut avouer* napa nou ki anvi fer.

Zot i anvi fer, zot ki enterese ladan, zot ki zot leker pe bat pour fer sa keksoz. Apard zot napa personn ankor, nou pa pe fer nou. Petet nou ava anmas en plastik lo lans ler nou ale akoz nou zanfan i bezwen zwe la.

Be selman nou pa pe investir nou a fon dan sa travay lanvironnman. So mon ti ava enplor ou Minis si ti annan en fason pour *être* kler ki -. Mon pa pe dir tou NGOs mwan, mon pa pe dir bann *overnight* NGOs ki serten in koz lo la.

Be bann ki pozitiv, *the successes*. Bann ki kler i net. E nou bezwen aprann koz en pe lo sa ki bon osi dan sa pei. Parey ou menm ou dir Minis, ler i annan sikse annou koz lo sikse. Be NGOs napa zis ki vol larzan, i annan NGO ki travay.

So ki mannyer nou kapab anpar zot Minis si ou kapab *come-up* avek en formil pou fer zot lavi fasil pour zot kontinyen fer sa travay ki zot pe fer mon pou dir ou en gro mersi. Be selman *having said that* -.

MR SPEAKER

Termin sa pwen final Onorab.

HON JOHAN LOZE

Mon terminen la. Dernyen mon pa santi ki mon pou annan kouraz pou lev lanmen pour

mwan siport sa akoz i pa kler mon pa pou vot kont Minis, parey Komisyoner in dir mon pou *neutral* ladan mwan osi. *Thank you very much* Mr Speaker.

MR SPEAKER

Mersi Onorab. Onorab Henrie.

HON GERVAIS HENRIE

Mersi Mr Speaker. Bonzour tou dimoun. Mon pou esey koz dan sa dele letan ki ou'n donn nou Mr Speaker. Nou an 2021 i fer egzaktaman 50an depi en Komite *Etats Unis* ki ti apel komite pour devlopman ekonomik ti vin avek sa konsep CSR ki zot ti apel li sa letan en Kontra ant biznes e sosyete.

E lo lord mon *Chief Whip* pou dir ankor kisisa CSR. Se i en *tax* ki fors lanmen bann kominote biznes pour sa ki nou dir an Angle *give back to society*. E en konpanyen savedir i donn sa *tax* ki ganny servi dan bann domenn dan pei ki ed bann kominote, bann group dimoun pli vilnerab e ki ed dimoun epanouir e en sosyete devlope.

Be ki ti pe arive se ki i pa souvan ki bann konpanyen i annan sa leker pour donner gratwitman. Prezan i ti konmans annan en mouvman dan lemonn dirize par plizyer

gran NGO enternasyonal parey *Oxfam, Action Aid, Christian Aid, Tax Justice Network*, ki ti mobiliz bann Gouvernman pour konmsi fer li vin legal.

Basically fors bann Konpanyen pou peye pour bann ki pa ti pe donner volonterman. E alor lo en lot kote bokou dimoun i dir ou pou dir i imoral pour ou fors en Konpanyen donner.

Gouvernman li i bezwen asire ki *tax* i ganny byen kolekte, tou dimoun i pey son *fair share* e ki *tax* base i osi *broad* ki pei i anmase an traver Lezislasyon, e ki nou pa dan en sityasyon parey nou ete ozordi dan Sesel kot nou tande pres 77 poursan Biznes pa pey *tax*.

E anfet mwan mon pou siport sa *repeal* ozordi pour sa rezon, ki mon ava retourn lo la en pti pe pli tar. Me alor koumsa CSR dan lemonn in vin an traver prezan Lalwa ki obliz bann lakonpanyen.

Be *basically* pour bann konpanyen ki donner volonterman mwan mon'n peye CSR, zis fer en *cheque* e donn Gouvernman.

Mon pa ti al rode lekel ki mon pou donner akoz mon ti santi poudir i bon konmsi i donn ou lakonpanyen en figur imen. Akoz ou konsyan poudir i annan dimoun ki dan bezwen.

Be la prezan letan sa pe ganny retire, e mon pe siporte akoz mon vwar i pe donn sekter prive en lespas, en *tax break*eki lontan zot in kriye zot le. Akoz dan sa Lasanble in dir plizyer fwa Sesel i enn bann pei ki pli *over burden* avek *tax*, i *over tax*. So nou pe donn sekter prive en lespas.

Be ki nou ekspekte zot fer avek sa lespas ki nou pe donn zot? Zot pou annan en plis kapital alor reenvestir dan zot biznes. Anmenn bann teknoloji, rod bann nide inovativ, grandi, kree lanplwa pour mon bann ser ek frer me partikilyerman mon bann *constituent* dan distrik Mont Buxton.

Se sa rezon ki mon pe siport sa *repeal* ozordi pour donn zot sa lespas me avek kondisyon ki dezormen zot vin bann konpanyen ki konsyansye, pey zot *tax* byen.

Mon pe osi demann ladministrasyon reprezante ozordi isi par Minis pou asire ki bann Biznes i peye zot *fair share*.

Nou *broaden* nou *tax base* e ki alor letan larzan i ava antre la prezan pour bann NGOs ki ti pe trakase. Parske mon'n lir zot bann komanter pou dir be la nou pa pou ganny led parey nou ti pe gannyen avan atraver CSR.

Me kekfw a i ava annan plis, e i dwatet annan plis larzan ki ava ganny mete dan *National Grant Programme*. Ki nou'n koz longman lo la pandan sa semenn.

E ki alor zot sa bann NGOs zot ava kapab soumet zot bann proze avek sa Komite ki anba ziridiksyon Minister Finans. Dan tou latransparans zot pou sa *still* annan sa loportinite pour ganny ede.

Alor i pa osi en move keksoz ki nou pe fer ozordi, pour dimoun trakase pou dir nou pe kas en keksoz ki ti byen. Parski tou sa letan ki sa *tax* in ganny entrodwir Sesel. I ti vin dan en Lalwa an 2013, i ti annan son kontrovers lo la.

Premyerman fason ki i ti ganny entrodwir, Minis Laporte sa letan ti'n fek fer son diskour Bidze i pa ti mansyonn sa *tax*. Me apre dan SONA Prezidan Michel ti vin adrese e bannla i dir nou pa kapab annan 2 *Policy Tax*.

Konmsi bann *Policy* ki vin koumsa, ou pe ganny de diskour Bidze dan en lannen. Nou ti toultan annan sa kalite komanter. E alor Biznes ti santi poudir zot pe ganny forse fer en keksoz menm si pour en ta letan biznes in donn zenerezman dan Sesel.

Mazinen 2 fwa nou'n annan gran Zwe De Zil Sesel. An 93 apre 2011. *CSR Tax* pa ti ankor ganny entrodwir, pa ti ankor 2013. Me kominote biznes ti donn *generously*. Bann lotri in ganny organize Sesel, bann legliz in ganny ede.

Konstriksiyon plizyer batiman par egzanp *National Cultural Centre* anvil ti kontribisyon Seselwa. E posibleman ICCS osi tou in kontribisyon pep Seselwa malgre en parti politik pe *claim* pou dir zot ki ti fer.

Donk toultan in annan Seselwa i kontan donnen. E la mon ava termin lo la Mr Speaker. Donk i pa en move keksoz, Gouvernman pe kree sa lespas pou ki lekonomi i agrandi, i a kapab kolekte plis *Tax* e apre re distribye an traver *National Grant programme*. Mon pe swete sa i arive.

So bann NGOs mon pe dir zot pa trakase soumet zot bann proze dan tou latransparans, fer li byen zot pou *still* ganny ede. E pour bann lakonpannyen Annou konsyansye pou dir i annan bann dimoun ki mwen fortinen ki nou.

Rod en lakoz, ki swa lanvironnman, ki swa kiltir. Ki swa sport. Atas ou lekor avek akoz enn fwa ki ou fer sa i ede

transform limaz ou lakonpanyen annou konsansye poudir I annan bann dimoun ki mwen fortinen ki nou.

Rod en lakoz ki son lanvironnman, ki swa kiltir, ki swa spor. Atas ou lekor avek akoz enn fwa ki ou fer sa I ede transform limaz ou Lakonpanyen.

Akoz letan nou pou tande poudir tel Lakonpanyen i asosye avek tel koz mwan konman en konsonmater mon pou pli pare pou afilye mwan avek ou. Akoz mon vwar poudir ou annan bon leker.

Donk vwala Mr Speaker i pa osi move pou sa, nou ava kapab balanse poudir nou ava kapab vwar sanzman si tou dimoun, sa responsabilite personnel nou adopte li parey mon pe swete. Mersi Mr Chair.

MR SPEAKER

Mersi Onorab. Onorab Pillay.

HON SEBASTIEN PILLAY

Mersi Mr Speaker. Mr Speaker mon'n asize mon'n ekout atantivman tou bann entervenans ki'n koze. E mon krwar ou a permet mwan fer en pti komanter avan mon al dan – i relye avek sa *Bill* ki devan nou.

Me i enportan pou fer sa bann komanter akoz mon krwar i annan souvandfwa tro bokou *attempt* pou nou distort larealite kan nou anvi siport en keksoz. Akoz nou ganny demande pou nou siport li.

Minis in fer en prezantasyon baze lo serten pwen teknik. Mon'n swiv son bann pwen teknik. E dan en rapor *OECD* ki koz lo *tax base* e konsern ki annan ki nou 31.5poursan *tax to GDP ratio*. Ki sa i ganny konsidere konman ase o vizavi lezot pei ki dan *high income*.

Me selman konparab avek bann lezot pei ki leta zil parey *Maurice* nou tonm preski dan menm *bracket*. Preski parey. Sa Minis i en keksoz ki mon ti a kontan nou met an perspektiv.

Me selman mon'n tann serten keksoz ki enportan pou nou annou aret sey anbet lepep Seselwa. E i pa Minis ki'n fer sa me mon krwar Minis ou bezwen dezapwente avek bann *MNA* lo kote Gouvernman ozordi.

Ou bezwen dezapwente akoz ler en *MNA* i dir ou in tann diskour Bidze an 2013 be la nou an 2021 nou'n tann de diskour.

Nou'n tann en bann keksoz ganny dir dan *SONA* apre Minis in bezwen fer en

bann koreksyon azisteman atraver son diskour Bidze.

Zis la mon pa ni bezwen al retourn *L’Amerique* pou nou al rod *Oxfam*, pou nou al rod lekel ki’n fer lekel. Nou viv la dan pti Sesel e nou bezwen regard keksoz dan larealite ki nou pei i prezant son lekor.

Akoz pa tou *MNA* ki annan sans ganny *line of credit* avek bann biznessmenn. Pa tou. Ler pou li ek son *constituents* bokou bann groupman dan zot bann distrik i bezwen sa *CSR* aköz zot tap laport sa bann Konpanyen.

E mon santi i annan en serten lipokrizi ozordi pou nou vin fer en deba lo koripsyon an sa ki konsern *CSR Tax*. Pou nou koz lo Fondasyon *JJ Spirit* e pwen in ganny fer. Me nou pa mansyonn lefe ki *JJ Spirit* in fek donn R10milyon dan fon *COVID*? E nou ti aplodi. E nou ti menm lo *Facebook* pe donn “like” pe donn “smiley face!”

Be ki si sa sa? Annou fer en pe letan pou nou fer nou preparasyon pou nou koz lo en size serye. E size serye ki Minis in vin devan avek se realite ozordi dan nou sistenm *tax*. I annan de *tax*. I annan *CSR Tax*, i annan *Tourism Marketing Tax*.

E sa de *tax* i koz en problemm vizavi konfigerasyon

tax an zeneral dapre lanaliz *OECD*. Ki’n ganny fer an 2020 si mon pa tronpe.

Akoz sa lanaliz? Sa lanaliz I baze lo *income per capita* Sesel aköz i pe regard Sesel konman en *high income country*. Larealite i sa. Me prezan annou koz lo en lot realite pli senp. Realite pli senp ozordi se ki dan tou distrik kot i annan en pti lekip sportif, i tap laport swa *Seybrew*, swa en pti konpanyen. E tanzantan ou tann li pe koz lo mon pe gannyen *CSR* avek tel dimoun, e tel dimoun.

Me ozordi malgre ki Minis in eksplike e Minis pe demann, pe depan lo bonn fwa bann biznes, in vin pli difisil pou sa bann biznes kapab donner. Sertennman aköz sityasyon *COVID*. Be met sityasyon *COVID* akote e tou biznes ti profitab. Tou Biznes ti pe fer byen.

La realite an 2013 sete la mazorite Biznes pa ti pe donner. La realite sa letan pase sete serten Biznes e la mon felisit sa bann dimoun in toultan kontribye.

In toultan fer zefor. Me en kantite pa ti pe fer. E bokou zot, zot konn tre byen lekel dan zot distrik kot i annan Biznes. Menm bann distrik e sa mon vwar i drol.

Menm *MNA* ki sorti dan distrik kot i annan lotel ozordi i pa koz pou sa bann dimoun ki depan lo sa *CSR*.

Pa depan me ki bezwen sa *CSR* ki sa bann lotel oubyen sa bann lorganizasyon i koz lo la. Mr Speaker mon koz lo lotel pa pou mwan zis sible en group biznes. Be pou mwan eksprim difikilte ki mwan mon'n vwar an realite kan serten lekip sportif pe tap tou aport.

Mon koz lo lekip sportif akoz i en leksperyans ase resan ki mon'n vwar, pe tap tou laport pou kapab ganny en pti sipor finansyel.

I pa lafot Minis ki sa bann Biznes pa pe donnen, me Minis in ganny prezante, Gouvernman in ganny prezante ek en sityasyon. E li i bezwen aranz sa sityasyon.

E i pa nou byensir dan lopolizasyon ki pou vin dir zot ki manner zot pou aranz ot sityasyon parey zot in dir. Zot, zot *caravan*, nou, nou aboye e zot, zot pase. Zot in dir sa zot. Me selman, selman si *caravan* pe al dan en presipis nou aboye nou.

Si zot, zot anvi antre dan presipis zot antre. Me pa anmenn Lepep Seselwa avek zot dan sa presipis.

Akoz ozordi i kler zot per pou koz lo non lepep Seselwa an sa ki konsern lepep Seselwa zis akoz zot bezwen siport zot Gouvernman.

E pa mwan ki pe dir. E la realite i vin koumsa akoz zot in fer en promes. En promes kot zot in koz lo koripsyon partou. Yer nou'n ganny sa sityasyon avek *PUC* kot *Designated Minister* in bezwen vin fer *damage control* pou lapros ki zot in pran anver bann lenstitisyon ki zot in atake a plizyer repriz.

E kot zot in donn *undermine* konfidans piblik dan sa bann Lenstitisyon. E prezan piblik pe demann zot pou delivre lo sa ban promes ki zot in fer.

So i enportan ler nou pe get sa Lalwa nou get li dan konteks ki in vin devan nou. Konteks ki in vin devan nou i koumsa.

Premyerman sityasyon *COVID-19* in afekte tou bann biznes. I kler. Tou biznes in ganny afekte Sesel. Petet i annan ki dan letan *COVID* lafason son aktivite in ganny *design* in kapab make do avek sityasyon. Me la mazorite e nou konnen pli gran sektor se Tourizm in ganny afekte.

E tou bann biznes ki dekoule dan tourizm par egzanp si en dimoun ki li i ti annan en Kontra servis ek en lotel, son biznes in ganny afekte.

So sa i en larealite ki nou annan. Be avan sa realite sa rapor li e la kot mwan mon annan en *issue*. Sa rapor li i koz lo lafason ki nou administre *tax* Sesel.

E enn bann keksoz ki i koz lo la i koz lo pa zis retir *CSR Tax*, me i koz lo *broaden* nou *tax base*. E dan *medium term*. Pa *short term*, *medium term* nou mazin lo ki mannyer nou pou revwar *CSR*, ki mannyer nou pou revwar *Tourism Marketing Tax*.

Me dele letan mon pa vwar li spesifye dan sa rapor, se Gouvernman ki pou decide kan pou ganny enplimante. E Gouvernman in vin kot nou pou nou enplimant li dan sa fason. E konman Lasanble nou bezwen debat sa lamannman.

Nou bezwen debat li lo baz ki benefis i pou anmennen, pou pei. E pou Lepep Seselwa an servan bann largiman ki pou fer pase pwennvi ban dimoun ki zot, zot santi zot pou ganny afekte avek sa sityasyon. Me pa zis regard lo en kote.

Mon dir sa dan sa fason Mr Speaker aköz petet Minis pa pou dakor avek mwan. E mwan

mon santi son Gouvernman i annan en fason *disproportionate* pou regard biznes ozordi. Mon dir sa dan sa fason aköz mon krwar i regretab ler en Gouvernman i pran en lapros ki ler i get groser biznes e i vwar fason pou li kapab amelyor sa kondisyon.

Me lo en lot kote ler i regard bann pti Biznes sa menm kalite lapros pa ganny pran. Pou ilistre sa pwenn Mr Speaker mon pou servi sa sityasyon "Leve Debourye" ki'n *unfold*.

Nou'n ganny dir poudir i annan en kantite aryeraz ki bann dimoun I dwa. E ki ot pa'n peye. Me sa ki mwan mon pa ganny en konpran se aköz en *building* ki sipoze ganny servi pou en pti biznes ki zot, zot pa pey *CSR* zot. Zot bann pti antrepriz, sa *building* pa kapab re donn bann lezot *tenant* ki a kapab peye.

Si sa bann ki pa'n peye ou pe tir zot e ou annan rezon pou tir zot *then* ou aplik Lalwa. Me ou swiv tou prosedir avan ou tir zot byensir. Me si zot pa kapab fer li ou met en dimoun ki kapab fer li dan sa *building*.

Me desizyon se ki nou pran sa *building* pou nou fer lofis avek. Sa i fason nou pe siport pti biznes. Me lo en lot

kote nou ganny dir poudir bann biznes avek turnover R1milyon.

Now Sesel pou ou kapab fer en *turnover* R1milyon ou a en pti antrepriz ou. Ou pe debourye. Ou dan en sekter prodiktiv. Ou dan en sekter profitab. So ki mannyer nou, nou regard sa sityasyon.

E ki mannyer ou analiz lafason ki nou pou anmenn sa amannman avek konteks ki nou ladan ozordi? E ki mannyer nou fer sir ki nou gard serten proporsyonalite ki mannyer nou get biznes. Pa zis sa ki gro me sa ki ti pti e sa ki pe konmanse? E sa i enportan.

Sa i en deba ki nou bezwen fer. I relevan pou sa size *CSR* ki nou pe diskite, aköz sa size *CSR* dan la fason ki nou pe enplimante li, i kler ki nou pe met en lanfaz lo en serten volonte pou fer en serten kontribisyon.

Mon'n regard sa 5enm *Schedule* mon krwar ki Minis in mansyonnen an relasyon avek biznes *tax* si mon pa tronpe. Ki donn sa sertifika.

E ler mon pe get sa mon vwar i restriktiv par lefe ki sa sertifika pou ganny donner avek bann *non-charitable organisation* ki *anyway already* i devret annan sa sertifika.

Konsern i vin par egzanp ou annan lezot lorganizasyon

parey bann lekip sportif kote zot pou tonbe?

MR SPEAKER

Onorab ou'n sot 10 minit. Annou regarde ki mannyer –

HON SEBASTIEN PILLAY

Mersi Mr Chairman. Mon konnen mon'n sot en pe letan. Me selman i enportan aköz sa size I en size enportan pou nou met li o kler. I pa vedir ki *eventually* Gouvernman retir *CSR Tax* pou en move keksoz. Me problenm i se ki eski la i meyer moman pou fer li? Se sa keksoz konsern ki nou bezwen met devan.

Rezon pou sa aköz ler mon regard en pei ki obor nou parey *Maurice*. *Maurice* li i annan en sistenm kot i met en – ou annan en *CSR Fund*. Ki ou kontribye ladan. E i anba son *Lalwa Tax* sa. Me in kree li en fason ki i annan en fon ki ganny kontribye ladan. E li pou li ti 2poursan. Pou nou ti 0.5poursan. Ou konpran?

Konmsi i pa ti egzorbitan. Me si i ti annan en lenpak fiskal lo sa bann *Biznes*. En lenpak monneter lo sa bann *biznes then* kestyon ki nou ti devret pe konsidere se, annou redwir sa 0.5poursan.

Me pa get *rid of it altogether*. Aköz lefe ki sa rapor

OECD i mansyonn tou le de *tax* me nou pe swazir pou nou regard zis *CSR Tax*. Koriz mwan si mon mal.

Nou'n ganny dir poudir *Tourism Marketing Tax* pou ganny gete dan le fitir. Mon pa konnen si mon korek Minis ou ava koriz mwan. Zot pe regard *Tourism Marketing Tax* be akoz zot pa ti regard *TMT* osi?

Pou mwan mon santi poudir *the timing of what is being done might not be the most appropriate*. Se sa kot mon vwar keksoz i en pti pe regretab. Akoz probableman wi nou bezwen fer en serten reform. Wi nou bezwen *broaden* nou *tax base*. Wi nou bezwen anmenn plis dimoun pou vin devan.

Me sa rapor ti osi koz lo sa *positive liability* ki serten *taxpayers* i annan. Mrs Verghese li konn sa tre byen akoz dan sa rapor in kos lo la. Bann ki annan en serten liabilite pozitiv, *ok?* E ant bann avek en liabilite *negative*.

So ou ti pou annan en distenksyon malgre ki nou ti pou *maintain* ou *tax*. Akoz sa ki sa rapor ti pe propoze sete sa *middle ground* ki pou anmenn ou *to the point* kot *eventually* ou *phase-out* ou *CSR Tax*, me ou annan en *convenient replacement* pou li ki – annou

pa servi sa mo forse. Me ki *incentivise* bann biznes pou vin devan pou fer sa kontribisyon.

Akoz mwan mon an faver en Biznes fer larzan e mon pa an faver ou takse li initilman. Me i enportan ki tou dimoun dan sosyete ki benefisye i bezwen fer en kontribisyon.

E enn bann rezondet deryer sa Lalwa ki ti vini an 2013 sete zisteman akoz nou ti vwar an 2013. E mwan mon ti la an 2013. Se ki en kantite bann letablisman touristik ki ti trouve dan bann distrik pa ti pe fer bann kontribisyon.

MR SPEAKER

Nou a sey konklir Onorab.

HON SEBASTIEN PILLAY

So an konklizyon Mr Speaker mon krwar sa ki nou bezwen fer se regard dan posibilite dan plas ki nou vin avek en lamannman koumsa ozordi. *Anyway* Lasanble pou deside lo la.

Sa *repeal* i vin apre ki nou'n kapab etabli en ranplasman dan milye. Akoz ou konnen si nou swiv sa largiman ki'n ganny fer par en Onorab kot nou met tou larzan dan *Consolidated Fund*, apre i al dan sa *National Grant Policy* la.

I vin konmsi Gouvernman prezan tou bann sosyete sivil i vin depandan lo Gouvernman. Me *the whole point of* sa CSR Act se pou etabli sa lendepondans.

Pou ki ou pa bezwen neserman depan lo Gouvernman pou ou kapab ganny serten sipor finansyel pou ou kapab fer ou aktivite.

Mwan mon krwar Mr Speaker ki nou devret konsider tou sa bann pwen an relasyon avek *whether* sa *repeal* i *timely*, e i fer plis sans ozordi ki olye fer li a en moman pli apropiye. Mersi Mr Speaker.

MR SPEAKER

Mersi *Leader* Lopozisyon. Onorab Georges.

HON BERNARD GEORGES

Mersi Mr Speaker. Mr Speaker zanmen Lopozisyon pou aret *sirprann* mwan dan sa Lasanble. Zot konnen ki en Bidze I larzman depandan lo *tax*. La zot pe lager pou gard en *tax*. Me taler ler zot ti annan en sans pou vot lo Bidze napa enn zot ki ti lev zot lanmen pou siport sa Bidze.

(APPLAUSE)

HON BERNARD GEORGES

Zanmen ankor zot pou montre nou ledwa pou dir nou pa ti

siport bidze aköz nou pa ti vit an faver bidze. Aköz ozordi zot dan zot premye tes zot in *fail!*

Mr Speaker I annan en keksoz ki nou pa'n *focus* lo la bomaten dan sa deba lo tou le de kote latab. Me ki Minis in fer resorti byen. E sa se filozofi sa nouvo Gouvernman. Son Polisi, son politik. Aköz ki i pe anmenn sa amannman ozordi.

E mon krwar se lo la avek ou permisyon ki mwan mon ti ava kontan pas en pti git letan malgre ki letan i kont mwan bomaten.

Mon apros sa *repeal* bomaten avek *mixed feelings* mwan osi. Aköz mwan osi mon annan en distrik e en distrik ki'n benefisyè dan lefase e resanman la ankor avek CSR.

E mon krwar CSR son lespri parey Onorab Gervaise Henrie in eksplik nou, i pa ti en move lespri. I ti annan en bon lide deryer li. E sa se pou anmenn bann ki kapab ed bann ki mwen kapab lo en nivo sosyal, lo en nivo distrik.

Me malerezman parey tou bonk keksoz i annan *unintended consequences*. E mon krwar *collateral damage* parey nou dir dan militer.

E mon krwar se sa ki'n arive isi Sesel avek CSR. E sa i vin atraver en filozofi ki nou

konman Seselwa i malere ki nou'n adopte.

E sa se en filozofi les Gouvernman fer tou keksoz pou nou. Les Gouvernman diriz nou dan tou keksoz. Akoz i pli fasil ki nou pran responsabilite lo nou menm.

E mon krwar si nou *drill down* pou regard sa filozofi, nou ava konpran egzaktman aköz CSR in annan sa bann *unintended consequences* dan nou pei.

Mon distrik in benefisye. La an Avril nou pou servi en larzan CSR ki nou'n fek gannyen pou al fer en *clean-up campaign* dan nou distrik.

E *obviously* nou ti a kontan kontinyen vwar sa bann keksoz pe arive. Me mon pa partaz lopinyon serten ki si ou pa obliz en dimoun fer en keksoz i pa pou fer. Mon'n dir taler ki a la baz i en sityasyon filozofik.

Akoz dan bokou pei pa zis CSR dan bokou pei *still* ozordi i annan lobligasyon ki ganny mete lo sitwayen sa pei, pou zot fer en serten kontribisyon. E sa lobligasyon i vin atraver *tax*. *L'Allemagne* par egzanp ou annan dwa konman en *taxpayer* pou ou donn en porsyon ou *tax* avek ou legliz.

Olye donn ek Gouvernman ou annan swa

pou ou dir en serten poursantaz i al pou ou legliz. Dan serten pei, isi Sesel ti enn a en serten moman *tax* i tir en bout ou larzan pou pey ou *membership* en *Union* ki ou en Manm sa *Union*.

Donk i annan bokou legzanp. Mon'n sit zis de, kot *tax* i obliz ou menm ozordi menm dan bann pei devlope pou ou fer en serten kontribisyon.

Alor CSR dan sa konteks pa ti en keksoz ki nou ti'n envante. Annefe Onorab Gervais Henrie in dir nou kote sa lespri in vini. Me i en keksoz ki'n apoz tre byen isi aköz mantalite nou pep.

E la mon ava dir mantalite nou pep in vin atraver 40an sosyalis kot Gouvernman in dir ou, ou pa annan okenn responsabilite nou nou a fer tou keksoz *cradle to grave*.

Ou napa okenn fatig ou. Ler ou ne nou a donn ou R1000 dan en kont. Ler ou bezwen en *carer* nou a donn ou en *carer*. Ler ou ariv 63an ou a ganny ou pansyon. Ler ou pa anvi travay nou a fer *URS*. Eksetera, eksetera, eksetera.

E se sa, sa mantalite. E ler ou mor nou ava kontribye nou ava donn ou en serkey. Se sa mantalite ki'n fer ki nou pei

e nou pep in vin en pei ek en pep asiste dan en serten sans.

Mr Chair mon annan en bon zanmi ki dir mwan lo nivo politik, i dir mwan dan tou pei lemonn bann parti politik i annan siporter. Isi Sesel zot annan depandan. E i vre. I vre.

Lekel? Ki kantite nou bann dimoun ki vini ki fer en kontribisyon dan nou parti politik? Ki kantite.

Konpar sa avek bann ki ler ou zwenn zot i dir ou "*Chief* fer keksoz. Get manrmay." Ler ou dir li non, i dir "Be pa mon'n siport ou?" Pa mon'n vot pou ou?" Sa in vin sa lespri.

Sa lespri ki nou bezwen kontournen. Sesel i sel landrwa ki mwan mon konnen, kot en dimoun i decide i pou fer en parti laniverser aköz i ganny son laniverser Sanmdi, apre i pou al rod en *sponsor* pou donn li de *crate* labyer oubyen en pe balon eksetera.

Oubyen i decide i pou al Dubai aköz i anvi en konze apre i pou al rod en dimoun pou *sponsor* li son tiket avyon eksetera. Se sa. Se sa lespri ki 40an sosyalis in anmenn nou dan sa pei.

(APPLAUSE)

HON BERNARD GEORGES

Se sa lespri depandans ki nou bezwen kase. E se pou sa rezon ki mon pou siport sa *Bill* ozordi. Aköz ou vwar Mr Speaker ler ou tir responsabilite avek en dimoun i annan toultan labi ki swiv.

E pa zis CSR. Problem avek CSR se ki ler ou dir avek en lakonpanyen ou bezwen kontribye 0,5poursan ou *turnover*, i napa okenn incentive pou li kontribye plis.

E i pou dir ou be la, la mon pe ganny takse. Mon ava pey sa. I pa dan son natir pou li al rode eski sa i apropiye? Oubyen eski i kapab kontribye en pe plis?

Ler ou tir sa nivo sa lobstak lo en dimoun, oubyen lo en Lakonpanyen ou donn li laliberte pou li kontribye bokou, bokou plis.

Se pou sa rezon mon pe siport sa *Bill* bomaten. Mon retourn en pti pe Mr Chair dernyerman konman en dernyen pwen bomaten lo sa *issue* Sosyete Sivil avek NGO. Nou pa kapab lye CSR avek NGO.

Si nou fer li nou pe antre dan en move filozofi. En dimoun pa *set up* en NGO aköz i pou al rod larzan pou fer marse son NGO. Si i fer sa son NGO pou *fail* e i pa en dimoun ki onnet avek son lekor.

Ou *set-up* en *NGO* akoz ou annan en lanvi pou ou ed lasosyete sivil. Se sa ou premye bi. Ou dezyenm bi se al rod fon pou fer marse ou *NGO*. Ou pa *set li up* pou ou rod fon pou fer en keksoz akoz se fon ki enportan. E se la kot nou bezwen vwar.

Mon pa pe koz an teori la Mr Speaker. Mon pe koz lo en nivo pratik. Mon form parti *NGO*. Mon Chair en *NGO* e mon konnen ki difikilte i annan pou al rod larzan pou fer marse ou *NGO*.

Me ou lespri i bezwen servis. En lespri servis. Mon anvi fer en keksoz pou mon kominote apre sa mon ava al rod fon. Ler ou'n rod fon e ou pa kapab arive fer ou de bout zwenn, la ou kapab al kot Gouvernman. E demann Gouvernman en lasistans.

E Gouvernman i ava annan en lobligasyon pou asiste ou selman si i vwar ki ou'n debourye ou osi. Ou'n fer ou bout. Ou pe travay. Ou'n ed nou lekor. Ou'n fer en serten pa. Ou pe devlop en keksoz pou lasosyete.

Me ou pa'n arive fer zwenn ou de bout malgre tou ou zefor la I ava kapab pran en larzan dan fon *taxpayers* e ed ou avek. Donk Mr Speaker egzaktaman parey mon ti dir yer ler nou ti pe

koz lo Grants avek *Chamber of Commerce, Red Cross*. Mon'n mansyonnen *CARE*. Menm zafer i aplik pou bann lezot *NGO*.

Mon krwar ki nou devret regard sa ki nou pe fer la ozordi konman en sanzman direksyon total lo lapar nou Gouvernman. Kot i pe tir responsabilite lo li e i pe met responsabilite lo sak endividi.

E sa i apel *empowerment*. Sa keksoz ki pandan tro lontan nou'n viv dan lonbraz. En sistenm ki'n tir sa responsabilite avek nou e ki'n met li dan lanmen Gouvernman.

Pou sa rezon Mr Speaker mon repete nou pe siport sa *Bill* bomaten akoz i ava ed dan sa demars sa ladministrasyon pou *empower* dimoun. E pou met responsabilite dan lanmen sak endividi. Mersi Mr Speaker.

(APPLAUSE)

MR SPEAKER

Mersi. Byen avek sa mon ava envit Minis pou fer son repons lo Bidze silvouple.

MINISTER NAADIR HASSAN

Mersi Mr Speaker. Mon ti a dir mersi tou bann Onorab pou zot kontribisyon. Mon santi ki i annan gran sipor pou sa *Bill*.

Me mon ava adres enn de bann *issues* ki'n monte. Mon krwar premyerman i enportan pou realize ki sa *repeal of the CSR i part of* en reform pli konpreansiv lo *Business Tax*. E sa bann gran li mon ti anonse dan *Budget Speech*.

E *in the next few months* pou annan bann diferan mezir ki pou vini. Bann Lalwa ki pou vini dan *business tax*. E tou sa la i bezwen ganny regarde ansanm pou konpran sa filozofi sa reform *tax*.

E parey mon ti'n anonse se premyerman se *broadening the tax base e lowering* ou tax e sa pou ganny fer.

Me osi *part of it* se lamannman CSR akoz prensipalman se ki son filozofi sa *tax* i pa en filozofi ki byen. E i en filozofi ki baze, e parey bann serten Manm in dir. I en filozofi ki *punitive* ki ganny *apply*. E mon konnen i annan mansyon ki'n ganny fer konpar avek *Maurice*.

Me si ou regarde an Maurice *the way* ki CSR i ganny fer i vreman diferan avek ki mannyer CSR Sesel in ganny enplimante. E *Maurice* son *Tax GDP ratio* i mwens ki Sesel. Sesel i par lao 30poursan e pou Maurice i apepre 20poursan.

E *Maurice* osi si ou get son to *tax* i en kantite pli ba ki

Sesel. I 15poursan. So i annan bann *significant differences between* tax rezim Sesel ek *Maurice*. So mon pa krwar i *fair* pou fer sa konparezon.

Me i annan *issue* ki'n leve lo ki mannyer bann *NGOs*, bann *community-based projects* i pou ganny afekte. Me mon krwar filozofi ankor se ki mannyer bann biznes zot santi sa *need* pou kontribye *back* pou zot kominote. Me bann *incentives* osi dan ou *tax regime* i ankor la.

So si ou pe fer bann donasyon i *still* annan bann *incentives* akoz sa i 100poursan *deductible from your accessible income*.

So bann Biznes i *still* annan bann *incentive* pou ankouraz li pou kontribye. Lo *issue community-based projects*, mon krwar i annan bann lezot *avenue* osi ki kapab ganny regarde.

Par egzanp pou le moman i annan en *line of credit from Indian Government* ki konsantre lo bann *community-based projects* ki pa pe ganny *maximise*.

E sa i en landrwa kot nou kapab regarde ki ava ede pou bann proze dan kominote. Lo kestyon ki ti ganny releve *regarding TMT*, sa osi ankor nou

get sa reform *business tax* dan son totalite.

E *TMT* osi i pou bezwen ganny retire. Me nou bezwen fer sa bann reform an faz, ki i annan son laspe reveni osi ki nou pa kapab fer li tout ansanm. Me nou fer li par faz. So *TMT* osi i form *part of* sa reform e pou annan son letan ki pou annan son *removal*.

Me keston mon krwar – konsern pli kle ki'n leve eski *now is the best time to do it*. E mon larepons pou sa se ki mon krwar ki la i kritik ki nou fer li la.

E nou fer li la aköz i donn en soulazman bann Biznes ki dan difikilte e son *next* faz nou ava ganny son laspe kot bann to *tax* ava desann. So mon krwar *this is the time to do it*.

E lezot keston ki'n leve sa *process* pou ganny sa *charity status*. E sa i en *process* vreman senp. So senpleman en *NGO* i pou annan bann kriter ki pou an plas.

E baze lo sa bann kriter pou napa diskresyon. Son kriter i devret kler. E *process* i kler ki i ganny sa *Certificate of Charity Status*.

So mon krwar sa i bezwen en keksoz ki neser. Ki i pa vin en keksoz difisil pou *apply*. Mon krwar avek sa Mr Speaker

mon'n adres plizyer bann konsern ki'n leve. Mersi.

MR SPEAKER

Mersi. Avek sa nou ava envit Lasanble pou vot lo *general merit of the Bill*. Manm ki an faver sa *Bill of general merit* lev lanmen silvouple? Okenn Manm ki kont? Madanm Deputy.

Vot lo *general merit of the Bill* in ganny 23 vot pour. O vot kont. E 10 abstansyon. Alor sa *Bill* in aprouve lo Merit. Avek sa mon ava envit Madanm Deputy pou fer *Second Reading of the Bill*.

MADAM DEPUTY CLERK

Mersi Mr Speaker. *An Act to Repeal the Corporate Social Responsibility Tax Act, 2013 (Act 17 of 2013)*. Thank you.

MR SPEAKER

Mersi Madanm Deputy Clerk. Be vi ki sa i en *repeal* e i napa Komite eski nou bezwen pran vot pou *skip Committee*. Dan sa ka ou bezwen anmenn Mosyon *LGB*.

HON BERNANRD GEORGES

Yes Mr Speaker. Avek plezir. Mr Speaker anba *Order 97(1)* mon *move* pou sispann *Order*

70 a 75 pou nou sot Staz Komite.

MR SPEAKER

Mersi. Mon a ganny en *secondment*. Onorab Arissol

HON SANDY ARISSOL

Mersi Mr Chair. Bonn apre midi. Mon segonn Mosyon. Mersi.

MR SPEAKER

Mon ava envit Manm pou vot – wi Onorab Pillay.

HON SEBASTIEN PILLAY

Mr Chairman lo sa Mosyon mon ou le fer zis en pwen. Akoz sa i en rezolisyon mon oule fer en pwen mon le klarifye en keksoz. akoz mon pa ganny sans al *Committee Stage*.

Premyerman Minis in mansyonn sa *Certificate of Charity*. Mon krwar ou pe refer to *Schedule 5*. *5th Schedule* si mon pa tronpe. *Business tax* non. –kot i dir “*charities and non-governmental organisation for the purpose of this Act should be registered with the Ministry of Finance*.” Se sa ki ou pe refer to?

Me eski zot in amann sa – eski in annan okenn provizyon lamannman ki’n ganny fer ladan an relasyon ek bann keksoz ki ou’n dir? Ou pa

kapab reponn mwan, me selman mon bezwen met sa pwen devan akoz as it is la mon pa ankore vwar lezot sanzman ki’n ganny fer ek sa.

So mon ti ava ekspekte ki sa bann sanzman in ganny fer pros ki sa Lalwa in vini. Sa ti en pwen mon ti le met devan.

Dezyenmman en pti pwen Mr Chairman mon konnen mon pe *beg your indulgence*. Ou konnen mon oule dir ek Onorab Georges i annan en diferans ant en *NGO* ki ganny siporte par en gro lakonpanyen nasyonal avek en *NGO* ki pa ganny okenn sipor. I annan en diferans sa.

MR SPEAKER

La nou pe retourn an aryer la Mr Pillay. Be lo ou pwen mon sipoze Minis i a note si i annan keksoz ki bezwen ganny *repeal* oubyen ganny amande, pou ale avek Lalwa. E nou a prosed lo vot silvouple.

Manm ki an faver pou *skip Committee Stage* lev lanmen silvouple? Mersi. Okenn Manm ki kont? Madanm Deputy Clerk? Vot pou *Skip Committee Stage* lo sa *Bill* in ganny 23 vot pou, o vot kont e 10 abstansyon. Alor sa Mosyon in aprouve par Lasanble.

MR SPEAKER

Prezan nou a move pou en *Third Reading* e mon ava envit *Leader Biznes Gouvernman* pou prezant *Mosyon pou Third Reading*.

HON BERNARD GEORGES

Mersi Mr Speaker. Mr Speaker anba *Order 76(1)* mon *move* ki *the Corporate Social Responsibility (Repeal) Bill 2021* i ganny lir en *Trwazyenm Fwa*. Mersi.

MR SPEAKER

Mersi. Mon a ganny en *secondment?* Onorab Arissol.

HON SANDY ARISSOL

Mr Speaker *Mosyon* i ganny segonde. Mersi.

MR SPEAKER

Mersi. Manm ki pour lev lanmen silvouple?

Mersi. Okenn Manm ki kont? *Mosyon lo Third Reading lo Corporate Social Responsibility Tax (Repeal) 2021* in ganny 23 vot pour. E 0 vot kont. E 10 abstansyon.

Alor sa *Mosyon* in aprouve par *Lasanble*. Mon ava envit *Madanm Deputy Clerk* pou fer en *Formal Third Reading of the Bill*.

MADAM DEPUTY CLERK

Mersi Mr Speaker. *This Act may be cited as the Corporate Social Responsibility Tax (Repeal) Act 2021*. Mersi.

MR SPEAKER

Mersi. Avek sa, sa *Bill* in vin *Act*. Mon a remersye *Minis* avek son bann zofisye pou zot partisipasyon e *Manm Lasanble* osi pou zot travay. E nou a pran poz e nou a re zwenn 2er edmi.

(BREAK)

MR SPEAKER

Bonn apre midi tou dimoun. Nou pe pran detrwa morso *Lalwa* ki konsern *Minister Lenvestisman Lantreprenarya e Lendistri* alor nou ava apel delegasyon sa *Minister silvouple*.

Bonn apre midi delegasyon *Minister Lenvestisman, Lantreprenarya e Lendistri Madanm Devika Vidot* son *Minis*. *Madanm Angelique Antat Sekreter Prensipal* pou *Lantreprenarya e Lendistri*, e *Mr Victor Pool Senior Draftsperson* dan *AG's office*.

Byenveni e mersi pou zot partisipasyon nou pou konmans avek *Enterprise*

Seychelles Agency (Amendment) Bill, 2021. Bon avek sa mon ava envit *Leader* Biznes Gouvernman pou anmenn Mosyon pou *Second Reading*. Onorab Georges ou'n pare.

HON BERNARD GEORGES

Bonn apre midi Mr Speaker. Bonn apre midi Minis avek ou delegasyon. Bonn apre midi tou bann Manm e tou dimoun ki pe swiv nou. Mr Speaker anba *Order* 69 (2) mon *move* ki *the Enterprise Seychelles Agency (Amendment) Bill, 2021* i ganny lir en Dezyenm Fwa. Mersi.

MR SPEAKER

Mon a demann segonnman silvouple ? Onorab Henrie.

HON GERVAIS HENRIE

Mersi Mr Speaker. Bonn apre midi tou dimoun. Mosyon i ganny segonde Mr Speaker.

MR SPEAKER

Mersi Onorab. Mon a demann Minis pou prezant son *Bill*.

MINISTER DEVIKA VIDOT

Mersi Mr Speaker. Bonn apre midi tou dimoun. Bonn apre midi Mr Speaker. Bonn apre midi tou Manm Onorab. Bonn apre midi tou dimoun dan lakour tou dimoun dan lakour.

Mr Speaker anliny avek lanons Prezidan Larepublik Mr Wavel Ramkalawan konsernan retir bann *Board* Direkter pou serten bann lazans piblik, mon annan gran plezir pou prezant sa trwa prozedlwa pou konsiderasyon Lasanble Nasyonal.

Dan sa laliny lamannman i nesese avek Lalwa *Enterprise Seychelles Agency* avek de lezot antite ki nou pou al touse plitar, pou retir tou referans avek *Board* e pou entrodwir tou posibilite pou Minis kapab donn direktiv konsernan Polisi, pou bann mezir a en karakter zeneral an relasyon avek fonksyon sa bann antite.

Sa bann antite i annan konm fonksyon pou egzekit Polisi e stratezi Gouvernman, e rann bann servis respektif bann envestiser ou biznes lo lapar Gouvernman.

Lafason ki zot striktire an se moman avek bann *Board* i kre en letap adisyonnal ant Minister ki formil sa bann Polisi stratezik, e ki i annan responsabilite pou sa bann lazans ek zot zesyon e servis aktyel an term lefikasite sa i pa vremen nesese.

De plis bann *Board* pa ti toultan swiv direktiv Minis, Minister me plito fonksyonn dan en fason endepandan kan

an realite se Minis ki bezwen rann kont lo lefikasite e performans sa bann antite.

Bann *Board* i osi parfwa vin konman en lobstak pou travay sirveyans e evalyasyon - sa *monitoring and evaluation*, ki Minister i bezwen fer lo bann lazans anba son manda.

Alors Mr Speaker sa bann prozedlwa pe propoze pou retir bann *Board* parey nou'n mansyonnen pou *ESA* plitar pou *IEA* e *SIB*, pou anmenn plis lefikasite e transparans an menm tan permet en pli bon raprosman ant Minister avek bann zesyon sa bann antite.

I enportan note ki par retir sa bann *Board* Gouvernman pou fer en lekonomi apepre en pe plis ki 1milyon par an. Avek sa Mr Speaker mon soumet sa bann prozedlwa pou konsiderasyon nou Lasanble Nasyonal. Mersi.

MR SPEAKER

Mersi. Nou pe konmans avek *Enterprise Seychelles Agency (Amendment) Bill*. Nou a ouver deba prezan pou bann Manm. Onorab Cosgrow ou kapab konmanse.

HON WALLACE COSGROW

Mersi Mr Speaker. Bonn apre midi Minis, *PS*, Mr Pool, tou Manm Onorab, tou manm

publik ki pe ekoute. Mr Speaker ler mon'n, mon'n ekout lentrodiksyon Minis pou sa travay ki nou pe al fer apre midi lo bann diferan Lalwa ki tonm anba son *purview* mon en pti pe dan dout.

Akoz Minis i dir ki poudir bann *Boards* i kre serten *or* in kre serten lobstak, kot zot pa'n toultan ekout Minis *or* Minister. Kre serten lobstak par egzant ki mannyer bann Polisi i ganny enplimante.

Mon mazine ki si sa i leka *then*, i pou neser ki dan tou lenstans kot i annan *Board* nou pou bezwen *repeal* pou kapab fer lefikasite Gouvernman pli bon.

Me parkont se plizoumwen zis anba son Minister avek detrwa ki *Board* pe ganny *repeal*. Lamazorite bann *Board* pe reste e nou menm nou konman en Lasanble ler nou'n diskit lo Bidze, nou'n vot en kantite Bidze kot bann *Board* pe ganny bann *allowance*.

Les tousala Mr Speaker dan sizyenm Lasanble souvandfwa ler bann *Bills* ti ganny prezante devan Lasanble, mon rapel tre byen bann Manm ki ti asiz isi lo sa kote latab. Sak fwa zot ti war en, en mansyon Minis dan en Lalwa zot ti (en Manm an

partikilye), zot ti sot anler e zot ti dir Lalwa pe donn Minis tro bokou pouvwar e Minis pa devret pe annan kantite pouvwar.

Parkont dan sa bann seri lamannman ki nou pe war, nou pe war Lalwa pe zisteman fer lekontrer, pe tir pouvwar gouvrenans dan lanmen bann *Boards* e pe met pouvwar gouvrenans direktman anba Minis, anba en Minister ki (si mon kapab met li koumsa) en Minis i ganny apwente par Prezidan i annan en afilyasyon politik e nou war ki ozordi gouvrenans i kapab ganny enterprete konmkwa i pe vin tonm anba lenfliyans politik en Minis e Egzekitif.

Mr Speaker osi *ESA* ler i ti ganny konsevwar i ti presed *SENPA* e sete pou ofer bann servis avek bann pti mwayen antrepriz, pou kapab devlop sa sekter e donn sa sekter son plas ki i merite dan lekonomi Sesel ozordi.

E nou tou nou dakor poudir bann pti, mwayen antrepriz menm mikro antrepriz zot plizoumwon Seselwa ;- zot an mazorite Seselwa zot fer larises Sesel zot kit larises Sesel e zot enportan pou lekonomi lokal.

Ler nou pe get gouvrenans *ESA* gouvrenans *SENPA* ki ti

avan li in annan touzour en group dimoun ki'n form parti son *Board* avek diferan lekspertiz, diferan domenn diferan konesans.

E sa ki ti anmennen pou gouvren sa lenstitisyon pou mwan dan mon pwennvi Minis, Minister pa neserman pou vin avek sa, sa konesans. Sirtou bann, bann lorganizasyon parey *ESA* ;- kot ou menm annan bann dimoun ki *involve* avek lendistri ki lo sa *Board*.

E ki donn koudmen zot konnen ki pe pase dan lendistri zot donn koudmen zer, zer sa lorganizasyon ki demen bomaten i ede, i ede pou, pou *bring* sa sekter en pe pli devan.

So Mr Speaker tir *Board* *ESA* or tir *Board* okenn lezot lorganizasyon ki pou ganny prezante apre midi, pou mwan i reprezant en regresyon dan gouvrenans sekter piblik Sesel.

Regresyon akouz nou'n sorti dan en sistenm kot i ganny kontrole par en group, en dimoun, en Minister nou'n evolue nou'n donn gouvrenans en pli gran group lamas dimoun ki dan sa sekter i donn en koudmen i fer sa sekter marse.

E la nou war nou ozordi an 2021 avek en nouvo Gouvrenman ki dir nou, nou bezwen pli byen. Me parkont

an term gouvèrnans i tourn nou enn ou de lepa an aryer.

Selman Mr Speaker mon sagren par sa bann lamannman mon'n koz lo la pandan Bidze i annan menm letan ki mon'n *abstain* pandan letan Bidze akoz pou mwan, mon santi sa i pe tourn nou an aryer.

Me lamannman i devan nou e nou, nou bezwen get li me selman mwan, mon pwennvi se ki i pa en, i pa en sityasyon kot ti devret arive. E ki mon santi se sa sekter mwayen, pti antrepriz ki pou soufer avek sa bann lamannman.

An dizan sa Mr Speaker mon pa pou, mon pwennvi mon pa pou konfortab pou mwan vot an faver sa bann lamannman, e mon dir li byen kler boner zisteman akoz sa bann keksoz ki mon, mon'n elabore ozordi apre midi.

So Mr Speaker mon pa pou al plu lwen ki sa mon ava termin mon lentervansyon la, e mon ava les zot bann Manm lezot bann Manm osi donn zot lentervansyon. Mersi.

MR SPEAKER

Mersi Onorab. Onorab Loze.

HON JOHAN LOZE

Mersi Mr Speaker. Mr Speaker pandan sa premye 2an ki mon ti servi lo *Bills Committee* diran

well pa 2an *actually* mon krwar i 1an *and a few months* ki mon ti servi lo *Bills Committee* diran sizyenm Lasanble, ti annan en *standing joke* dan *Bills Committee*. Ki sak fwa i annan en Lalwa en morso Lezislasyon ti vin devan nou kot ou ti war “*the Minister*”, “*the Minister shall*,” “*the Minister isi*”, “*the Minister* laba.”

Nou tou nou ti konnen e sa tire sa tire akoz si sa i ariv lo *floor* e Onorab entel i trouve pou ariv problem. I ti banal antre nou *both sides of the isle* nou ti konnen poudir i annan en *senior member* dan parti *LDS* i alerzik avek sa mo Minis, dan gouvèrnans okenn antite gouvèrnantal. Nou tou nou ti konnen sa.

Nou ti riye wi *made a joke about it* e otan ki posib bann antite Gouvèrnman si zot pa ti kapab defann sa pasaz sa laliny avek *the Minister* dan sa *Bill*, souvan ou ti war zot pe tire pe rod en lot fason e pe met li anba *Board*.

E mon pe dir zot sa akoz sa se laktyalite se laktyalite ki mon, mon'n zwenn nou'n viv nou'n pas atraver ansanm konman de parti politik opoze.

E letan nou pe koz filozofi, filozofi opoze e se ki *LDS* depi son *previous incarnation of SNP* zot filozofi vi ki zot pe koz

filozofi. Zot filozofi sete toultan pou *devolve* pouvwar *away from central governance* e *towards* en demokratizasyon pouvwar ki ti pran laform bann *Board*.

Sa ti zot. I ti zot fason fer i pa kapab *deny* sa ozordi, menm ler zot pe sit zot bann lezot filozofi. Be sa ti zot sa zot ki'n ensiste lo la *all along*.

Now ozordi nou ganny dir ki nou annan nou en Prezidan pou premye fwa en Prezidan ki koz tou laverite ! I dir fran i koz fran i dir tou keksoz fran. Menm si i dir nou R3milyon pou mont lo zil ek 10 dimoun, apre i annan lezot ki mont par deryer, sa nou pa konnen konbyen in koute, les li.

Be en Prezidan fran - be kwa ki ti fran dan son koze? Sa ki i ti dir yer depi lepok *SNP throughout* konmkwa ki "*you need to devolve power.*" Tir pouvwar pa konsantre li dan lanmen en sel dimoun ! Pa konsantre pouvwar dan lanmenm Minis ! Pa konsantre pouvwar dan lanmen Prezidan e sirtou pa konsantre pouvwar dan lanmen enn de *civil servants*.

Akoz in dir nou sa *for years* in repete in sant sa sanson nou'n ekoute. E nou'n fer progre nou'n *move away from* konsantrasyon pouvwar

dan lanmen Minis dan lanmen Prezidan dan lanmen serten *civil servants*.

E sa se sa Prezidan fran sa Prezidan koz laverite R3milyon pou mont lo zil, ki'n dir nou sa - *all along* ! La ozordi menm Prezidan fran Prezidan koz tou laverite R3milyon pou mont lo zil, i vini i dir nou pran tou pouvwar pran sistenm gouvrenans aktyel kase, pran tou pouvwar retourn dan lanmen en Minis.

Re konsantre pouvwar dan lanmen Egzekitif fer li vin en pti boul konsantre li dan lanmen bann *civil servants* enn de *civil servants*.

Mwan i pa mon ki poudir zot ki mannyer pou fer selman mon ganny en *méchant* plezir *point out* zot bann kontradiksyon avek zot. Pran zot prop parol e fer zot anvale ozordi! Sa wi mon admet i donn mon en *méchant* plezir!

Zot pa kapab pas de lannen e de lannen *advocate* en fason fer e ozordi zot vini zot dir ek nou koumsa nou annan en filozofi. Ler ou ti dan lenpozisyon ou ti annan en filozofi ki ou dan gouvrenay ou annan en lot filozofi. Be kwa sa? Konmsi be ki ras zot?

Wi mon'n dir 'gouvrenay' mon pa'n dir Gouvernman zot dan gouvrenay zot. Mr Speaker

Minis in dir nou sa bann antite i la pou egzekit Polisi e rann en servis kliyan e sa *Board* gouvènanans ki egziste la li i siperviz egzekisyon Polisi.

I sipoze *oversee* sa servis ki zot rann kliyan. Mon pa war akòz ki Minis li ki sipoze formil Polisi i bezwen al siperviz en antite dan pou li al egzekit Polisi.

(Mr Speaker ou war zot pe zwe tranpe zot esper mon koze pou lev lanmen de zot an plis.)

Mon pa war akfer sa i bezwen deroul dan sa fason. Minis i kapab kominike avek son *Board* ki en group adilt li menm li Minis i en adilt e *ensure* ki i annan sa *smooth governance structure* ki marse e fonksyonnen parey i devret.

Be si nou pa kapab konport nou parey adilt e nou bezwen kas sa ki egziste mon, mon pa la pou defann zot kase mwan.

Selman mon la pou *point out* zot lipokrizi avek zot! E zot bezwen konpran ki si mon pe al dan sa direksyon i ki mwan, mon'n asize mon'n ekout zot *for years and years* pous keksoz dan direksyon *Board*.

E ozordi zot pa kapab travers devan nou avek en *Bill*, ki zot pa ni menm kapab avans en largiman lozik pou akòz zot pe fer sa ki zot pe fer. Ou

konnen ki zot largiman i dan *Bill* i ekri dan *objects and reasons 2)*," *the President in his address to the Nation on the 1st of February 2021 made announcement of restructuring of statutory and other parastatal bodies.* "

So zot zistifikasyon pou sa se akòz Prezidan in dir. Zot zistifikasyon pou sanz striktir gouvènanans "Prezidan in dir." Be lekel ki ti dir kre plis *Board*? Lekel ki ti dir *devolve* gouvènanans, pa li menm? Ou war kot zot annan sa *disconnect*. Zot dekonekte avek zot prop realite! Zot dekonekte avek parol ki'n sap dan zot prop labous.

Ozordi zot pa ni menm kapab argimant an faver zot prop *Bill*, parske zot pa kapab lev lanmen pou zot koz lo zot *Bill*, zot bezwen esper mon lev lanmen koze prezan pou zot vey dan gob e lev lanmen koz apre mwan.

This is kot nou'n arive ozordi! Mersi Mr Speaker.

MR SPEAKER

Mersi Onorab. Onorab Woodcock.

HON WAVEL WOODCOCK

Mersi Mr Speaker. Mr Speaker i enteresan lentervansyon ki enterven an avan mwan in fer.

Mwan, mon konpran tre byen kwa ki Gouvernman *LDS* pe sey fer.

Mr Speaker problem ki nou annan dan nou pei pou bokou letan se ki nou annan nou tro bokou, tro bokou bann *Boards*. Tro bokou bann *Boards* ki en bonp e bann *Boards* sa bann dimoun pa ti pe zwenn preski ditou.

I annan bann ki zwenn kekfwa dan en mwan zot manz dite *I mean* zot bwar dite manz gato, kekfwa zot met en pti gin lasos tomat lo zot *sandwich* apre zot pa zwenn ankor pou travay pou en bon pe letan.

E nou'n war dan debat Bidze konsern ki bann Minister in fer sorti kot i konsern bann *Board*, se ki in annan problem kot i konsern *monitoring*.

Akoz si en konparezon ou pe get *Enterprise Seychelles Agency* son *the object and reason* pou, pou sa formasyon sa *agency* sete, parey i dir "*the object of the agency are to implement the Policies and the strategies of Government: of Government relating to the micro, small and medium enterprise to provide the micro, small and medium enterprises with necessary services and support.*"

Sa in lobzektif *ESA* se pou ed soutyen e sipor bann diferan *small, medium, micro enterprise*.

Me nou'n war dan lepase kot i annan en mank *monitoring* lo bann lasistans ki *ESA* i pe donn bann pti antite, bann pti biznes kot nou'n war bann labi osi mon bezwen koze.

Akoz zot kote zot pa fer nou koz lo bann labi ki'n arive dan bann diferan antite Gouvernman. Pli boner taler ler zot ti pe koz lo, lo *Bill* avan lo *repeal* sa *CSR Tax* nou'n koz lo *JJ Spirit Foundation* zot pa'n kontan zot in nerve zot in sot anler.

E ankor nou'n war *ESA* kot ti annan bann konsern ki ti'n ganny leve dan lepase, kot i konsern bann *seed capital*. *Seed capital* lafason ki i ti pe ganny donnen mon demann mon lekor en kestyon oli, oli *monitoring*? Ou ti war poudir bann biznes ki bann pti biznes ki ti bezwen ganny sa sipor sa soutyen avek Gouvernman, pa ti pe gannyen.

E lanmenm ler kot i ti met an kestyon louveraz *Board* lo rol *monitoring* pou fer sir ki *ESA* pe *deliver* lo bann Polisi Gouvernman, lo lobzektif Gouvernman. E sanmenm sa i enportan apre tou sa lazans i la pou li enplimant Polisi ek stratezi Gouvernman.

I annan en Bidze ki ganny aprouve pou fer sir ki sa bann antite pe ganny sipor pe ganny ede. E mwan, mon santi poudir par lefe ki Minis pou pran sa rol sa responsabilite, mon santi pou annan plis sa *monitoring* sa *oversight*, pou anpese ki bann labi ki'n arive dan lepase i pa ariv ankor.

E zot largiman ki zot pe anmennen se ki zafer nou bezwen Minis i annan tro bokou pouvwar, me i enportan pou note osi Mr Speaker se ki *Board* dan lepase se Prezidan anba sa *Act* Prezidan ki apwent *Board*.

Prezidan i kapab apwent okenn dimoun ki i anvi i kapab apwent en dimoun ki dan faver Gouvernman, ki pou siport Polisi sa Gouvernman i pa pe neserman bann dimoun ki pou enparsyal.

Be vi ki sa i en antite Gouvernman i responsabilite Gouvernman pou fer sir ki son bann Polisi ki annan pou fer avek lenplimantasyon son bann program, ki donn soutyen tou bann diferan pti biznes, i bezwen fer sir ki sa bann *Policies* pe ganny enplimante dan en fason ki byen, dan en fason ki drwat, dan en fason ki sa resours ki nou annan i pou ariv kot i merit arive.

Ki i pa zis enn ou detrwa pti endividi biznes ki pe

benefisye. Alor mon pa war nanryen mal pou ki en tel amannman i vin devan nou. Sirtou pou nou ede osi koup sa kantite larzan, ki nou pe pey sa kantite *Board* ki annan Sesel ozordi.

Ozordi i annan plis ki en santenn *Board* Sesel. I annan dimoun ki lo trwa, kat, senk, sis *Board* pe ganny sepa konbyen R1000 par mwan pe ganny plis saler ki, ki en Direkter Zeneral ki en Manm Lasanble Nasyonal ki menm en Minis ler ou azout tou sa bann *allowances* ki zot pe gannyen lo sa bann diferan *Board*.

In annan labi kot i konsern bann *Board* Sesel alor i enportan pou nou *streamline* sa bann keksoz pou nou koup en pe lo tou sa bann *Board*, sa kantite *Board* ki annan dan nou pei ki pa neser Mr Speaker.

Avek sa de mo Mr Speaker mon pa war nanryen mal pou siport sa *Bill* ki devan nou e mon donn Minis mon langazman ki mon, mon pou vot an faver sa *Bill*. Mersi Mr Speaker.

MR SPEAKER

Mersi Onorab. Onorab John Hoareau.

HON JOHN HOAREAU

Mersi Mr Speaker. Mr Speaker lamannman ki devan nou pe demann nou pou retir *Board* dan lorganizasyon en *agency* *ESA*. E si nou get sa kantite Manm *Board* ki annan lo sa, lo sa ki form parti sa lantrepriz i annan 7, 7 Manm *Board* an tou e sa parey Minis in dir pou anmenn nou en koupaz apepre 1milyon ou plis rounpi par lannen.

Alor pou mwan ler mon get sa, sa desizyon ki Prezidan Ramkalawan ti fer le 01 Fevriye isi dan sa Lasanble i kler ki Prezidan Ramkalawan (e mon ti menm demann sa keston dan letan Bidze avek Minis Finans) ki ti asir nou poudir Mr Ramkalawan in diskrit ek li in diskrit ek *Cabinet* e in diskrit osi avek *PEMC* lo size bann *Boards* avan ki in vin avek sa bann desizyon.

Alor i en desizyon byen enformen, i en desizyon ki'n pran par rapor avek bann *cost-cutting measures* pou anmenn plis efikasite dan son Gouvernman.

Mr Speaker dan nenport lantrepriz oubyen biznes ler ou pe rankontre bann problem bidzeter ler ou pe rankontre problem *inefficiency* dan sekter, dan sekter servis i annan de mezir ki ou souvandfwa pran.

Swa ou pou koup lo depans e anmenn plis efikasite oubyen ou pou *innovate* ou *product* me dan sa ka napa okenn *product* ki *tangible* ki sa, sa *agency* i fer. Alor se ki, ki i bezwen fer se ki i bezwen koup depans, e koup depans, e koup depans pa swazir bann landrwa kot ki inital pou depanse.

Alor anvi ki Minis li menm li i responsab son Minister i responsab son bann *agencies*, li ki *accountable* ver son ver Prezidan li menm e Prezidan i *accountable* ver lepep ki'n elekte li, alor in war li dan en fason byen pou li kapab pran sa bann desizyon.

E sa bann desizyon kontan pa kontan lopoziyon se ankor dan 5an ki zot pou ganny sans pou zot pronons zot lo la.

Parske sa pep ki la deor in donn permisyon in donn si oule sa manda Gouvernman Prezidan Ramkalawan pou anmenn sa bann sanzman pou anmenn plis lefikasite dan son Gouvernman.

Mr Speaker Prezidan Ramkalawan i ti anonse dan son *speech* le 01 Fevriye ki nou Gouvernman ti en pti pe parey zonnyon kot pli ou tir lapo pli i reste ankor lapo.

Alor ti annan tro bokou birokrasi. Ti annan tro bokou *layers of governance*. Alor pou

senplifye sa en fason pli vit pou fer marse keksoz, se pou *entrust* serten pouvwar dan lanmen Minis.

Parey mon'n dir se li ki i dan i tonm anba son *purview* pou li kapab *account* avek son Prezidan ki mannyer son, son bann *agencies* pe fonksyonnen.

E mon pou totalman refiz sa, sa largiman ki'n ganny met devan ki i pou fer plis retar. O kontrer i pou fer keksoz mars bokou pli vit parske i pe redwir birokrasi.

Si ou kalkile *Board ESA* anba Lalwa son lobligasyon se pou *meet* kat fwa dan en lannen. Zis mazine si i annan bann, bann desizyon enportan ki *Board* i bezwen pran bezwen esper bann Manm pou zwenn kat fwa dan en lannen, pou li pran sa bann desizyon.

Alors sa ti kre birokrasi kre plis retar dan Gouvernman. I kre plis fristrasyon, plis dimoun vir an ron. E se sa ki lopoziyon i kontan ler dimoun i vir an ron parske 43an zot in fer sanmenm sa.

Alor Mr Speaker mwan, mon pou totalman siport sa desizyon e mon pou *standby* ki sa bann lantrepriz *ESA* lezot ankor ki pou vin apre ki pou *repeal* zot *Board*.

Mon krwar ki i pou anmenn plis lefikasite. I pou

anmenn en *speed* dan *decision making* e i pou fer redwir birokrasi.

Alor Mr Speaker mon pou ankouraz tou dimoun enkli zot lopoziyon pou reget ankor sa *Bill* e revwar li dan en fason lozik, dan en fason ki *intended to be* e vot an faver. Mersi.

MR SPEAKER

Mersi Onorab. Onorab Pillay.

HON SEBASTIEN PILLAY

Mersi Mr Speaker. Bonn apre midi. E bonn apre midi tou dimoun ki a lekout. Bonn apre midi Minis ek ou, ek ou delegasyon. Mr Speaker nou fek ganny envite pou, pou regard sa *Bill* be mwan, mon krwar enterven an ki'n koz avan mon li menm li i pa'n get sa *Bill* ki devan nou.

Akoz si i ti vreman get sa *Bill* i pa ti pou fer sa kalite prezantasyon ki in fer. I dezapwentan pou war ki mon ti konnen i pou arive, me selman mon pou servi en mo la ki zot souvandfwa sa mo in ganny servi, in ganny servi lo mon kote latab. Ki nou bann *rubber stamp*. Fransman ozordi nou pe war bann vre *rubber stamps*.

Zot sa enn i en *rubber stamp* avek kategori sa enn la ! Sa enn i enkrwayab sa enn la. E prezan i pou fer tou kalite

zimmastik ki annan pou li kapab eksplike akòz i pe *rubber stamp*.

I fer *somersault, back flip* - manman napa ki i pa ganny fer ozordi pou sey eksplik nou sa. Nou konpran pozisyon Minis, Minis i form par Egzekitif e in ganny en, in ganny en travay pou li fer pou vin devan Lasanble.

E me sa ki enteresan se ki sa zafer sanz *Board* sa ti'n fini vin en fe akonpli depi zour zot Prezidan i anons li. Malgre tou largiman lekotrè ki zot in sey anmennen "ar Lasanble ki pou vin diskite," zot Prezidan pa'n nonm Lasanble, in dir li i pe tire, i pe tire

Parkont si ti en Gouvernman *US* ki ti'n fer en lanons ki i pe tir en *Board*, ou ti a tann Onorab Woodcock pe pet lagorz la lot kote, pou li kriye !

La en sel kou ozordi i pli dosil ki dosil, pli dosil ki dosil tou lyon ki ti lyon in vin mouton! Zot!

Mr Speaker taler nou ti ganny dir poudir dan 43an zot, zot benny nou dan sa 43an. Me sa ki enteresan ek sa 43an tou sa ki nou'n fer dan sa 43an ki nou'n met dan sa Bidze zot fek aprouve ! Zot fek aprouve!

Ti koz nou taler poudir nou pe donn R1000 *cradle to the grave* pa zot in aprouv tou?

(laughter)

HON SEBASTIEN PILLAY

Be si pa ti bon akòz zot in aprouve ? Ar ase anbet lepep Seselwa! Ler zot napa leskiz aret anbet dimoun! Be zot napa nanryen poudir (manner i ti dir sa ? Manner Dokter i dir sa ?) ar la i la.

(Interruption)

MR SPEAKER

Ale, annou gard en pe lord silvouple. Onorab kontinyen.

HON SEBASTIEN PILLAY

Mersi Mr Speaker. Mr Speaker mon'n, mon'n asize mon'n lir sa Lalwa detrwa fwa mon'n konpar li avek Lalwa aktyel, me i annan zis en fot dan sa ki Minis in dir nou.

Minis in dir nou sa pou donn li pouvwar pou li fer direktiv Polisi be i en pouvwar ki Minis i deza annan anba Lalwa.

I en pouvwar ki i deza annan akòz tou Lalwa i ganny konsevwar lo en baz en prensip fondamantal. Lasanble i annan drwa fer Lezisasyon pas en Lalwa, me pouvwar rezidyel - *residual power*, sa pouvwar ki reste i ganny donner a en Minis

pou li fer tou regilasyon ki i anvi fer an relasyon avek en Lalwa.

So pouvwar i la e plis ankor se ki pouvwar pou amann en Lalwa i ganny *sponsored* par en Minis. E si Gouvernman ti anvi amann Lalwa *Board ESA*, dan nenport fason pou donn li pou donn plis pouvwar Polisi an menm tan ki en *Board* i ko egziste, zot ti kapab fer li.

Me mwan, mon vin lo swa pou retir pou retir sa *Board*. E sa i pa neserman en deba ki konsantre lo *ESA* me i en deba ki konsantre lo en sityasyon ki sa i kree. Minis in koz lo inefikasite *Board* ;- si en *Board* i inefikas i annan dimoun ki inefikas pouvwar i ek zot apwent dimoun ki zot krwar i efikas.

Dayer mon rapel enn bann ansyen tyermenn *ESA* i en Minis konmela dan zot Gouvernman. So largiman ki'n ganny avanse poudir Prezidan ki apwent Manm *Board* i pou apwent tou Manm son parti i pa fonde. I tonbe.

Ankor enn fwa i bat latet tou lLpep Seselwa. E mon konnen dimoun pe ekoute prezan dimoun pe konmans realize. Akoz sa rikord 43an *eventually* zot pou bezwen aret zwe li sa.

E ler zot aret zwe li i pou depan lo zot prezan pou zot fer zot *delivery*. Zot pou *remind* nou *of course* ki zot ki dan Gouvernman en nouvo fason fer isi, isi laba. *Up to* zot e parey nou dir nou, nou war en konsern nou met li devan, zot anvi ekoute zot pa anvi ekoute be zot swa lepep i a zize si zot inefikas apre 5an.

Be mon kontan ki ou'n dir Onorab Hoareau atraver ou Mr Speaker en gran probabilitete ki dan 5an wi nou ki pou pe dir ki pou fer.

(laughter)

HON SEBASTIEN PILLAY

I annan en gran probabilitete !

(laughter)

HON SEBASTIEN PILLAY

I annan en gran probabilitete akoz si zot kontinyen, si zot kontinyen parey zot pe fer si zot kontinyen parey zot pe fer.

Non akoz mwan – (i enteresan) mon kontan zot pe pran sa latitid akoz zot rapel byen bann ki pli vye la anndan, pou rapel byen ti annan dimoun ki ti pran menm latitid ek zot.

Sanmenm sa ki mon ti dir yer "*l'homme dans l'opulence*" i bliy son nesans. Si nou regard

sa Lalwa Mr Speaker annou par konmans ek son *objects and reasons* byensir i pa, i pa form par Lalwa me li ki donn definisyon ki kot Lalwa pe ale.

E pou premye fwa mon santi poudir mon dezapwente avek Biro *Attorney General*, kot zot ti kapab vin avek en largiman *Attorney General* ki en bon zanmi pou mwan.

Be mon dezapwente ti'n kapab vin avek en pli bon largiman. Largiman Minis i pli bon ki largiman dan *objects and reasons*. E sel largiman ki *Attorney General* i annan se akoz Prezidan in dir alors nou bezwen fer. Prezidan in dir alors nou bezwen fer.

Sa mon pa konnen si sa i pa anmenn nou en pe dan lepase me Prezidan in dir alors nou bezwen fer e tou sa ki nou'n travay *towards* sa demokrasi i tonm dan delo.

So si nou regard sa *objects and reasons* sa ki in dir nou, se ki'n ganny anonse par Prezidan, napa okenn mansyon lo an relasyon avek plis efikasite. Napa okenn mansyon an relasyon avek Finans pou koup larzan.

Zis i dir poudir "*in order to give effect to the announcement made by the President.*" Se tou. Prezan mon vin dan bann lamannman ki mon'n ganny

sans pas ladan. E i korek wi parey Minis in dir i retir sa *Board* e i retir li dan son totalite e i *set out* serten nouvo lamannman an relasyon avek seksyon 17, e i fer ki aprezan sa dimoun ki pou vin *CEO* sa lorganizasyon, i ganny apwente par sa Minis.

So ankor enn fwa sa i en lapros ki zot, zot Gouvernman pe pran. Zot oule ki napa okenn *layer* ant sa Minis avek sa dimoun ki *Chief Executive Officer*. Sa i zot swa.

Me ki sa i anmennen? Ki danze i anmennen? Danze ki i anmennen se ki ou retourn en sityasyon kot dimoun i *lobby* Minis. Ou retourn en sityasyon kot *lobbying* i retournen akoz Minis i *the final authority* ki pou donn en desizyon lo en keksoz ki pe pase.

E sa mon le ki Lasanble i *sink in* sa. Nou en Lasanble nou. E nou rol pou donn meyer Lezislasyon pei e si ou retourn avek sa sityasyon ozordi nou, nou tou nou kapab annan sa ki kapab annan en konfyans dan Minis aktyel, me demen i kapab vin en lot Minis apredmen i kapab vin en lot Minis.

I pa vedir ki sa portfolio in kole lo ledon sa Minis ki la. E la nou les lenterpretasyon *to the interpretation of* endividi. So

mon krwar poudir pou mwan sa i *raise* en konsern.

En lot keksoz ki mon realize se ki inevitableman nou ti konnen poudir *ESA* ti evolye ankor en kou.

I ti konmans konman *SENPA* e in evolye pou vin *ESA* e *eventually* i ti pou evolye ankor. *Eventually* en lot antite ti pou pran son plas, me selman dan tousala i ti pou *still* bezwen annan en kad gouvrenans pou li kot ou *involve* lezot dimoun, ki dan sa sekter ki konekte ek sa sekter pou form parti sa group dimoun ki pran desizyon lo la.

So ozordi i pou napa, Gouvernman i a decide ki manner meyer fason egzektifman zot pou fer li. Me sa ki mon krwar i reste konklizyon final ki nou bezwen tire i se ki gouvrenans i nesese pa zis aköz oule entrodwir en *layer* birokrasi.

Gouvrenans i nesese aköz oule entrodwir plis konsiltasyon. Aköz oule entrodwir plis partisipasyon. E byensir oule entrodwir plis lendepondans dan aksyon ki antite i kapab pran.

Personnelman mon pa santi poudir sa pou donn plis lendepondans dan aksyon ki en antite i kapab pran. Me ankor enn fwa parey mon dir, i pa mon

Gouvernman i zot Gouvernman parey zot in *remind* mwan me selman apre zot le nou appel li nou Gouvernman mon pa konnen aköz zot annan sa konfizyon lo la.

Parfwa zot dispit ek nou apre zot dir nou, nou bezwen dir li koumsa. So pou mwan Mr Speaker mon santi poudir ti devret annan en lapros konsiltatif. Ti devret annan en lapros prezant en lide, *as oppose to* enpoz en lide lo Lasanble Nasyonal.

E se sa ki fer mon *Minister* koz koumsa aköz mon santi poudir sa desizyon in ganny enpoze lo Lasanble Nasyonal. E ki Lasanble Nasyonal lafason ki sa in ganny dir par Sef Deta i vin en fe akonpli aköz si mon ekout byen son parol ti napa sa pou ganny anvoye pou laprouvasyon Lasanble.

Ti direkteman ganny dir dan *verbatim* ki sa *Board* pe ale. E mwan, mon santi sa poudir i afekte privez Lasanble. Mwan, mon santi poudir sa i en vyolasyon lendepondans Lasanble Nasyonal.

Me ankor enn fwa i pa mon Gouvernman i zot Gouvernman parey zot dir, e zot ki ava decide ki manner pou fer e zot ki ava pran ki ava pran rezilta, ki ava pran konsekans bann aksyon ki zot pran.

Avek sa Minis lo sa enn ki la, mon santi poudir mon pa kapab lev mon lanmen, malgre ki mon pou toultan sipor rol ki *ESA* i annan pou zwe. Me mon pa santi poudir nou pe al dan bon direksyon avek sa lamannman. Mersi Mr Speaker.

MR SPEAKER

Mersi Onorab Pillay. Onorab Georges.

HON BERNARD GEORGES

Mersi Mr Speaker. Bonn apre midi ankor enn fwa tou bann dimoun ki pe ekout nou. Mr Speaker le 24 Oktob 2020 lepep Seselwa in elekte Mr Wavel, John, Charles Ramkalawan konman Prezidan Sesel.

(APPLAUSE)

HON BERNARD GEORGES

Zot kapab pa kontan, zot kapab pa aksepte zot kapab war li en regresyon pou servi zot mo, me se sa larealite e se larealite anba lekel zot a bezwen viv pou sa prosen 5an.

Mr Speaker nou Konstitisyon i kler. E mon pa konpran akoz Onorab *Leader* Lopoziyon pa'n met sa pwen devan. Lartik 66 nou Konstitisyon i dir ki pouvwar

egzekitif larepublik i ava tonm anba Prezidan.

Tou pouvwar egzekitif i dan lanmen en sel dimoun Prezidan Larepublik an lokirans Wavel, John, Charles Ramkalawan.

(APPLAUSE)

HON BERNARD GEORGES

Se li ki'n ganny elekte pou diriz sa pei e pou tras en semen egzekitif.

Se li ki donn direksyon egzekitif alor ki mannyer zot pa dakor prezan ki i vini e i dir nou pou sanz sistenm bann *Board*. Ki mannyer zot pa aksepte sa ler se Konstitisyon ki dir sa an nwar en blan e ki zot menm zot, zot in viv anba sa Konstitisyon pou sa dernyen 25an an plis?

Ou war Mr Speaker i annan de fwa nou taye nou koze san ki nou reflesir kisisa ki nou pe dir. An plis ki sa Lartik 66 i dir ki ler Prezidan i a'n pran son desizyon egzekitif i ava fer li an akor avek Konstitisyon ek bann Lalwa Sesel.

Epi, epi son pouvwar egzekitif i ava fer anba 66 (2) ki investir dan Prezidan ava kouver egzekisyon e mentyen sa Konstitisyon ek Lalwa Sesel ek tou bann size anver ki Lasanble Nasyonal i annan pouvwar pou fer li vin Lalwa.

Senp Prezidan i decide i vin devan Lasanble Nasyonal e Lasanble Nasyonal i fer li vin Lalwa se sa ki Lartik 66 i dir. E set egzakteman sa ki pe arive Prezidan in dir mon pe sanz sistenm bann *Board* e la ozordi in vin devan Lasanble pou nou fer li vin Lalwa.

I annan zis en sel dimoun isi ki ti fer Lalwa li tousel e sa ti appel France, Albert Rene !

(APPLAUSE)

HON BERNARD GEORGES

Zis li ki ti zis li ki ti pas Lalwa i pa ti bezwen Lasanble e ler i ti bezwen Lasanble mon a dir zot ki i ti fer.

Mon a dir zot ki i ti fer, i annan en fwa kot Lakour, Lakour Siprenm mon konn sa tre byen aköz mon ti *involve* dan sa *case*. Kot Lakour Siprenm 11er bomaten i fer en lord, i fer en lord Mr Rene i fer *fall-in* tou son bann Manm Lasanble popiler 1er30 apre midi, pou pas en Lalwa pou defer en zizman ki Lakour Siprenm ti'n fer 11er bomaten !

Sa ki apel diktater! Sa ki bann dimoun ki pa konnen ki savedir swiv Lalwa e swiv Konstitisyon. Prezidan Wavel Ramkalawan i konn tre byen son Konstitisyon e i pe swiv li a la let. Prezan Mr Speaker avek

ou permisyon nou ava regard en pe aköz ki Prezidan in decide fer ki serten *Board* pou ganny retire e serten pou ganny *amalgamate* avek lezot antite.

E la mon ti a kontan fer zot rapel en parol ki Onorab Cosgrow in dir apre midi mersi Onorab ou'n dir en tre bon parol. I annan en kantite *Board* ki'n reste Onorab in dir nou.

Prezidan Ramkalawan pa'n vin abolir tou *Board* Sesel li zot menm zot, zot rekonnet ki lamazorite bann *Board* pe reste. E zot pe demande apre midi si lamazorite i reste si en bann pe ale? E mon ava eksplik zot aköz, aköz detrwa pe ale.

Rezon ki Prezidan ti donnen ler i ti vin dan Lasanble e rezon ki deryer sa lamannman ozordi i egzakteman parey. Sityasyon Sesel in sanze. Zot, zot ti annan zot filozofi atraver fer tou keksoz al anba *Board* Prezidan Ramkalawan i annan son filozofi *streamline* kot i nesaser, koupe kot pa bezwen.

Anba zot filozofi zot, zot ti anmenn sa Lalwa *ESA* an 2018 nou ti mazorite dan Lasanble se nou ki'n pas sa Lalwa e nou'n pas li an rekonesans ki anba Lartik 66 Konstitisyon, sete zot ki ti ganny elekte pou diriz pei, pouvwar Egzekitif ti avek zot filozofi sete pou kre *Board* e nou'n donn zot sa sipor.

La ozordi ler nou, nou anvi entrodwir nou filozofi zot pa oule taye zot pa dakor. Rod tou sort leskiz montre tou sort ledwa. Mr Speaker sityasyon i senp.

Parey nou'n ganny dir 2021 i pa parey 2018. sityasyon ekonomik dan pei in sanze politik dan pei in sanze e nou bezwen fer en legzersis *streamlining*, redwir kou, redwir *overlap e increase productivity*.

Se sa bann rezon kot Egzekitif pe rod fer en sanzman dan sa pei. E ler sa sanzman i bezwen *streamline* en *Board* sa *Board* parey sa enn ek sa bann lezot ki pe vini ava ganny *streamline*.

Alor annou prezan annou regard en pti pe son Lalwa li menm zot tou zot in koz lo sa amannman lekel ki'n al regard son Lalwa *ESA* li menm. Annou regard en pti kou Mr Speaker akoz i devan mwan .

Premye Onorab lo kote lopoziyon ki'n koze apre midi in dir ki *Board* i la pou *oversight*, i la konman en *Board oversight* lo sa ki ganny fer par sa antite.

Premye seksyon 6, seksyon 6 Lalwa *original* ki nou pe amande ozordi i dir "*there shall be a Board of the agency which shall be responsible for the management and*

administration of the operations of the agency. " Sa se en *Board management*. Se pa en *Board oversight* sa. Se pa en *Board* ki tanzantan ki regard en pti pe ki pe arive.

Sa se en *Board* ki pou *manage* sa Lazans. I pou tre diferan avek sa ki zot pe dir. Si zot ti lir Lalwa zot ti a war. Ou war, zot pa lir apre zot vin akiz nou pa lir. Sa en *management Board* se en *Board* ki do *the day-to-day running of the operation*.

E regarde lekel ki pou lo sa *Board* seksyon 7 en reprezantan Minis lendistri en reprezantan *entrepreneurship center of the Guy Morel Institute*, en reprezantan *SBS*, de reprezantan *private sector*, enn ki devret kouver Praslin ek La Digue en reprezantan Lasosyasyon bann Artizan, en reprezantan *Seychelles Chamber of Commerce*.

E parey Onorab Hoareau in dir sa *Board* i sipoze *run* sa antite, son lobligasyon se zis rankontre 4 fwa par an li. Mannyer ou kapab fer sa mannyer premyerman avek en *Board* ki trwa, trwa lo sis dimoun lo la se Minis, se Minis Vidot li menm.

Reprezantan *Bureau of Standards*, reprezantan

Ministry responsible for Industries eksetera.

So zot war aprezan akoz ki en dimoun ler i regard sa i dir be sityasyon in sanze nou pa kapab *afford* sa bann kalite *Board* ki nou mete zis akoz en filozofi fodre nou mete. Annou fer fason ki sa keksoz ki nou pe fer i ava *streamline* i ava marse.

Etandonnen ki lamazorite antite lo sa *Board* i *any event* pou sorti dan sa Minister ki son *line Ministry, it might as well* fer son Minis vin pran sa bann responsabilite ki i sipoze pran.

Mon pa war okenn problem ladan mwan. Mon pa war akoz fodre zot sote e zot dir ar isi laba zot pe sanz, nou pe sanz keksoz - (en lepok ti annan en Manm Lasanble ki ti-) - wi mon toutafe dakor mon osi mon ti partaz sa lopinyon kot pa fodre, kot pa fodre ki Minis i annan sel parol.

Minis pa devret annan sel parol e Onorab Cosgrow ou'n dakor i annan en kantite *Board* kot Minis pa tousel, kot i annan *Board* ki ankor i annan kantite lantite ki ankor *run* par bann *Board*.

Me ler i annan en antite ki depar son fonksyon, i pa bezwen en *Board*, oubyen i pa bezwen en *Board* sa kantite ki i annan, annou, annou amande.

Life goes on. Se sa se koumsa ki en pei i bouze i al devan.

Alor Mr Speaker avek sa, avek sa detrwa parol mon ti a kontan reasir Minis, ki nou pou vot pou son, nou pou vot pou son Lalwa. Nou pou amann son Lalwa akoz bann rezon ki'n ganny donner se bann rezon valab.

Nou demann li al dir avek Prezidan Larepublik ler ou al dan *Cabinet room* Merkrede prosen oubyen demen mon pa konnen si i demen si i Merkrede prosen. Dir avek Onorab dir avek ansyen Onorab Ramkalawan Prezidan Larepublik ki apre midi ozordi, i annan en bon mazorite dimoun ki'n siport li dan sa Lasanble.

Malgre ki i annan detrwa ki pa'n tro byen konpran kisisa ki i pe sey fer e zot pe sey lenfliyans lepep Seselwa lo en keksoz ki pa annan okenn larealite.

Mr Speaker avek sa detrwa parol, mon oule reasir Minis ki son lamannman pou pase pou bann rezon ki in donner apre midi. Mersi bokou.

(APPLAUSE)

MR SPEAKER

Mersi. Minis be Onorab Pillay ou'n fer ou ladres nou pa kapab

toultan retourn lo ou. Permet nou *move-on* silvouple nou pa kapab toultan retourn lo ou.

Konbyen letan ou pou pran? 30segonn ou'n deza ganny ou ladres Onorab Pillay. Zis ale si oule fer en pwen 30segonn.

HON SEBASTIEN PILLAY

Mersi Mr Speaker. Mr Speaker ou pe donn mon 30segonn mon bezwen fer li akoz ou toultan donn Onorab Georges pou koz apre mwan.

So si mon ti koz apre li mon pa ti pou bezwen fer.

MR SPEAKER

Wi be fer ou pwen.

HON SEBASTIEN PILLAY

Premyerman Mr Speaker. Premyerman Mr Speaker i konsern Lartik 85 nou Konstitisyon pou mwan, mon war li inakseptab ki en Onorab ki konn nou Konstitisyon byen i sey *mislead* Lepep Seselwa.

Lartik 85 nou Konstitisyon i fer kler ki pouwar lezislatur i reste avek Lasanble Nasyonal e non pa ek Egzekitif ! E mon krwar Onorab Georges in fer en largiman pou li sey *mislead* lepep Seselwa an diran sa ki in dir e mon pou prouv sa pwen ek ou !

Mon pou prouv sa pwen ek ou dan fason Mr Speaker. Dan sizyenm Lasanble apre ki son parti ti anpes tou apwentman Minis, oli sa bann zoli parol ki Onorab Georges ti pe dir lo Egzekitif sa letan? Kot ti été? I pa'n servi i pa'n kapab dir.

(APPLAUSE)

HON SEBASTIEN PILLAY

Prezan en lot keksoz ki mon oule met devan ou Mr Speaker kot Onorab Georges pe *mislead* Lasanble

(Interruption)

HON SEBASTIEN PILLAY

ler, ler i koz, i koz lo seksyon 6 sa Lalwa.

(Interruption)

MR SPEAKER

Permet mwan. Nou'n al dakor lo prosedir lo sa bann zafer ki ou, ou pou ganny laparol e Onorab Georges *Leader of Government*, Biznes Gouvernman pou terminen.

Nou pe swiv sa alor ou'n fer ou ladres ou'n ganny en bon pe letan pou fer ou ladres in fer pou li. Annou kontinyen swiv byen ou'n fer sa pwen.

HON SEBASTIEN PILLAY*(Off-mic)***MR SPEAKER**

Wi be, be ou pa bezwen toultan-

.

HON SEBASTIEN PILLAY

Non Mr Speaker i pa sa ki mon pe dir ou. Wi be sa ki mon pe fer ou konpran se ki Konstitisyon pei, Konstitisyon pei i pa kapab zis ganny enterprete dan tou fason ki nou anvi.

MR SPEAKER

Ale nou'n fini. Mersi.

HON SEBASTIEN PILLAY

Konpran e sa Lalwa se li menm li Onorab Georges ki ti anmenn sa lamannman ladan ! Li menm li ki ti anmenn lamannman !

MR SPEAKER

Mersi nou'n fini. Mon ava envit Minis pou fer son repons silvouple. Bann Manm gard en pe lord silvouple. Onorab Labrosse nou'n arete mersi. Pa Onorab Labrosse *sorry* Onorab Roucou mon tronpe. Minis mon envit ou. Eskiz nou pou sa enteripsyon mon envit ou fer ou repons lo deba.

MINISTER DEVIKA VIDOT

Mersi Mr Speaker. Mon le remersye tou Manm Onorab pou zot kontribisyon. Petet permet mon premyerman pou klarifye zisteman ki mannyer petet Prezidan in ariv lo tel desizyon sa desizyon i pa'n pran lo li menm.

In pran apre ki konsiltasyon in ganny fer avek bann teknisyen. Wi avek bann teknisyen e rekomandasyon in ganny fer avek li. Savedir sa i bann dimoun ki ti pe travay dan Gouvernman dan ladministrasyon presedan.

E anliny avek nou osi avek bann Minis, so desizyon in ganny pran parske nou'n, nou'n war poudir ti annan linefikasite. E en lot gran *issue* se *accountability* osi selman mon ava tous lo la en pti pe pli apre.

Bon parey ou'n fer mansyonnen Onorab Pillay napa vreman gran sanzman ki nou pe anmennen an term rol Minis anver sa lazans *through* sa Lalwa. Me keksoz fondamantal ki nou pe retire se sa *layer* adisyonnèl governans ki ti pe zisteman - ou pa ti pe war ki valer azoute ki i ti pe anmennen vreman avek lafason ki keksoz ti pe ganny *run*.

E sa i en problem ki in fer fas avek ;- ki Minister in fer fas

avek e i pa zis mon Minister me i, i tou bann Minister an zeneral. So *basically* sa Lalwa i zis pou retir sa bann konpleksite annan en *layer* adisyonnèl.

Mon a eksplik ou en pti pe plis i annan serten *Board* letan nou regarde i annan detrwa *Board* ki zot ti sak *Baord* ti pe deside fer serten deservi zot fonksyon dan bann diferan faon.

I, i zot swazir ki mannyer zot pou deservi zot fonksyon i pa ti *uniform* e alor sa ti kre *already* enlot *disparity*. Plis problem ankòr zot pa ti pe swiv sa vizyon stratezik ki Gouvernman ti'n *set* sa direksyon ki Gouvernman ti'n *set*.

Zot pa ti pe swiv Polisi ki Gouvernman ti pe met an plas. Ou annan antite ki ti annan en, en swadizan Polisi ki'n ganny aprouve par *Cabinet* par Gouvernman pa ti ganny swiv ditou.

E sa i in kre en kantite problem e pou nou kapab donn zot enn de legzanp osi. E pa zis- *ESA* ti fer ki i annan bann konfizyon total *between* lo lafason ki bann Lazans pe travay responsabilite anver *Board* responsabilite anver Departman, responsabilite

anver Minis i pa ti kler e ti pe zis kre konfizyon.

I annan en lot keksoz enportan osi mon ti a kontan fer resorti i lefe ki ti annan serten i annan *CEO* osi ki ti pe servi parske zot konn i annan sa *Board* alor sa *accountability element of accountability* i zot ti pe servi sa konman en fason pou, pou *pass the buck* dan en sans.

So i annan serten desizyon ki'n ganny fer e sa ti toultan enn bann rezon. *Board* ki'n fer desizyon, *Board* ki'n fer desizyon. E alor ti pe elimin ti pe redwir sa *accountability* ki sa *CEO* i annan anver son lazans e son responsabilite ki li i annan anver Minister osi.

An se ki konsern *monitoring and evaluation* e parey zot in dir sa *Board* ti sipoze siperviz parey Onorab *Leader of Government Business* in fer resorti sa *Board* ti zis senpleman en *management Board*.

E alor i pa ti pe vreman fer sipervizyon ek evalyasyon. E parey zot konnen e mon'n mansyonnen avan Minister nou pe sorti nou pe etabli nou *Unit Monitoring* Sipervizyon ek evalyasyon.

E alor ki ava fer ki Minister pou annan plis focus

lo lafason ki sa bann Lazans pe ganny zere.

An se ki konsern konsiltasyon e leksperyans ki sa bann *Board members* i kapab anmennen ankor en lot fwa i ankor sa bann keksoz ki nou pe fer se etabli en sistenm en *Unit Marketing Intelligence* ki li ki pou anmas tou lenformasyon avek biznes *sorry* lakominote biznes.

Alor i pa pou zis pwennvi set dimoun dan en lasal me i pou pwennvi lamas. So dan sa fason nou pe mazine. Epi i pa zanmen defann sa antite pou apwent en *Advisory Council* so sa osi i en posibilite. E byensir nou pe regard ladan.

Me selman a lafen dizour mon pou, mon pou termin mon, mon lentervansyon la avek sa size *accountability*. Mon krwar sa i enportan ki mon fer li dernyen. Esansyelman labaz prensip gouvrenans en *Board of Directors* i ganny apwente pou li azir lo, lo lenter *shareholders of, of* en antite.

E dan sa bann ka sa bann antite ki pe vin devan zot *shareholders* sa antite se Gouvernman li menm. Gouvernman ki *shareholders* e *by* ou annan *already* en Minister ki li i pe *act* dan lenter Gouvernman.

Epi ou apwent en *Board* ki li i sipoze osi pe *act* dan lenter Gouvernman, me selman ki li i senpleman zis pa pe deservi sa fonksyon *to the maximum*. So i zis kre konfizyon.

In terms of accountability by letan nou retir sa bann *Board* i pou fer ki Minister i ava kapab annan en pli bon fason pou li siperviz lafason ki sa bann resours pe ganny *allocated* avek sa bann Lazans.

E mon war ki sa in manke e parske letan ou regard en pe sa bann Lazans, an se moman lafason ki zot in ganny zere i pa ditou, i pa ditou byen. E se pou sa rezon ki en kantite, en kantite lazans in fer sa ki pou li bokou labi bokou gaspiyaz in ganny fer.

A lafen dizour se Minis ki vin kot Lasanble pou li vin defann sa Bidze. E Minis ki vin defann poudir sa resours ki i pe demann Lasanble Nasyonal i viz ver *further* sa Polisi ki Gouvernman in met an plas.

Alor mwan, mon war poudir sa, sa *removal of Boards* i zis en *step further* dan amelyor langazman ki Gouvernman i annan, avek lafason i zer resours ki nou ganny in ganny *allocated* avek. Mersi.

(APPLAUSE)

MR SPEAKER

Mersi. Bon avek sa mon apel bann Manm pou nou vot lo merit zeneral sa *Bill*. Manm ki an faver lo *general merit of the Bill* lev lanmen silvouple? Byen okenn Manm ki kont. Mersi Madanm Deputy Clerk.

Vot lo *general merit of the Enterprise Seychelles Agency (Amendment) Bill 2021 23* Manm in vot pour, 0 kont e 10 abstansyon. Sa *Bill* in pase lo *general merit*. Prezan mon ava appel Madanm Deputy Clerk pou fer *Formal Second Reading of the Bill*.

MADAM DEPUTY CLERK

Mersi Mr Speaker. *An Act to amend the Enterprise Seychelles Agency Act 2018 (Act 3 of 2018)*. Mersi.

MR SPEAKER

Mersi. Nou pas dan Staz Komite, nou a pas dan Staz Komite Serzan. Mersi. Yes nou a konmanse.

Kot nou ete la? *Ok* Onorab Hoareau. Wi, Onorab Hoareau i kapab konmanse. Antretan lezot Manm, ki ti'n lev lanmen, gard anler silvouple mon pa ankor marke.

HON JOHN HOAREAU

Mersi Mr Chair. Mr Chair *Bills Committee* in zwenn e dan son deliberasyon, in vwar poudir tou sa bann lamannman ki'n ganny anmennen. Ki anliny avek – i pa'n kas okenn provizyon Konstitisyon.

So i anliny avek Konstitisyon, e bann lamannman i ganny trouve dan Seksyon 2, Seksyon, 17, Seksyon 18, Seksyon 19, Seksyon 21, Seksyon 23, e 24.

Answit nou ti osi agree avek zofisye *Attorney Zeneral* ki ti la. Pour ki *transitional provision*, i ganny retire. E i annan serten lezot amannman osi ki'n ganny propoze par Onorab Bernard Georges.

Mon ti a kontan konnen si mon avar al en sel lo sa bann lamannman. Oubyen si nou pou esper lezot – nou pou al par bout?

MR SPEAKER

Wi, mon pa ankor vwar personn ki'n lev lanmen konmela. So, nou kapab prosede lo la.

HON JOHN HOAREAU

Nou ava al lo *Clause 2 (c)* kot a lir “*has been convicted in Seychelles*”, (apre sa i annan en *comma* pou insert) “*within the period of 5 years* (e la pou delete sa *comma* apre 5 years).

“Proceeding the date of his or her proposed appointment”, (insert en comma apre appointment) “in respect of an offence and sentence to a term of imprisonment.” And ‘sentence’ mon krwar i delete sa non? I reste?

MR SPEAKER

Ou’n fini lo sa *Clause*?

HON JOHN HOAREAU

Nou’n fini lo *Clause 2*.

MR SPEAKER

Eski nou kapab dakor ki zis, si *panel AG’s office* i dakor avek bann – sa i bann laranzman *typo, punctuation* bann keksoz koumsa. Si i dakor avek sa, i zis sinyal nou, e nou prosede. Yes, *ok*, korek.

HON JOHN HOAREAU

Prezan nou pou al lo *amendment of Section 21, Clause 8*. Ki dir *“Section 21 of the Principal Act is amended”* (nou *delete* sa *comma* apre *“amended.”*)

MR SPEAKER

Korek, *ok*.

HON JOHN HOAREAU

Apre mon krwar nou’n korek pou tir *transitional provisions* net, *ok*? Mersi.

MR SPEAKER

Mersi. Wi *panel* tou i annord ek zot? Mon krwar sirtou sa dernyen soz zot tir *transitional provision*, ki mon bezwen ganny en sinyal avek zot. Wi, Onorab Georges.

HON BERNARD GEORGES

Mersi Mr Chair. Mon krwar mon pa anvi pran la parol. Akoz mon ti a prefere ki *Bills Committee* ki fer sa. Annefe mon krwar Onorab Hoareau pa’n konpran sa lamannman.

I pa pou *remove transitional provisions*, e dan *Clause 11 (a)* pou amann son dernyen laliny, kot i met *“shall ceased to be members as such pou li lir, shall ceased to be members of the Board. And shall vacate’ their’ office, instead of ‘the’ office.”*

Mon krwar se sa lamannman ki devan mwan. E kekfwa Onorab Hoareau i kapab regarde, e si i parey lo son paz. I kapab propoz sa lamannman, mersi.

MR SPEAKER

Onorab Hoareau?

HON JOHN HOAREAU

Mr Speaker, mon’n vwar ki lamannman ki Onorab Georges in mete lo la. Me selman dan

Bills Committee nou ti agree avek *Attorney Zeneral*, ki sa *whole transitional provision* i ganny tire.

Pou le rezon ki se Prezidan ki *appoint Board*, i osi kapab *terminate their tenure*. So i kapab fer li san bezwen sa *transitional provision*. Mersi.

MR SPEAKER

Mersi. *Panel* okenn remark lo la? I annord? Tre byen, se tou? *Ok* parey labitid *panel* in dakor avek sa bann *amendment*. Alor nou pa bezwen pran okenn vot. Korek? *LGB? Ok.*

Bon dan sa ka nou pou retourn dan Lasanble, pou nou prosed avek *the Third Reading*. *LGB* mon ava envit ou pou anmenn Mosyon pou *Third Reading*.

HON BERNARD GEORGES

Mersi Mr Speaker. Mr Speaker anba *order 76 (1)* mon *move* ki *Enterprise Seychelles Agency (Amendment) Bill, 2021*, i ganny lir en Trwazyenm Fwa. Mersi.

MR SPEAKER

Mersi. Mon ava ganny en *secondment* lo sa Mosyon. Onorab Henrie wi.

HON GERVAIS HENRIE

Mr Speaker Mosyon i ganny segonde. Mersi.

MR SPEAKER

Mersi, nou avar pran vot lo *third reading of the Bill*. Manm ki an faver lev lanmen silvouple? Byen, okenn Manm ki kont? Mersi.

Vot lo *Third Reading of the Enterprise Seychelles Agency (Amendment) Bill 2021*, in ganny 23 vot pout, 0 vot kont e 9 abstansyon.

Alor sa *Bill* in pase lo *Third Reading*. Prezan mon avar envit *Madam Deputy Clerk*, pou fer *Formal Third Reading*.

MADAM DEPUTY CLERK

Mersi Mr Speaker. *This Act maybe cited as the Enterprise Seychelles Agency (Amendment) Act, 2021.*

MR SPEAKER

Mersi, alor sa *Bill* in vin Lalwa, *Act*. Byen, me nou avar pran en poz la. E nou a re pran si mon respekte zot ler poz, i a tonm 4.20. Alor nou a pran sa, e Minis ou ankor avek nou pou apre. Mersi.

(BREAK)

MR SPEAKER

Wi, nou pe pran *Industrial Estate Authority (Amendment)*

Bill, 2021. E nou a konmans avek menm prosedir, alor mon avar envit *LGB* pou prezan Mosyon pou *Second Reading* silvouple.

HON BERNARD GEORGES

Mersi Mr Speaker anba order 69 (2) mon *move* ki the *Industrial Estate Authority (Amendment) Bill, 2021* i ganny lir pou en Dezyenm Fwa. Mersi.

MR SPEAKER

Mersi, mon ava ganny en *secondment*. Onorab Arissol.

HON PHILLIP ARISSOL

Mersi Mr Speaker. Mosyon segonde. Mersi.

MR SPEAKER

Mersi. Minis letan ou ti fer ou lentrodiksyon dernyen fwa ou ti mansyonn tou le 3 sa bann mezir. E mon realize pou dir sa enn ki nou pe pran, i egzaktaman menm *issues* ki sa ki avan.

Me eski ou annan remark adisyonnèl pou fer, avan nou pas lo deba. *Ok* ou'n fini fer, *ok*, be dan sa ka nou avar al lo deba. Lo *Bill* entervansyon bann Manm.

E evidaman mon krwar bann manm osi i annan menm kestyon, pou menm repons. So eski nou a prosede dan sa ka?

Si napa deba, Minis eski ou anvi okenn remark.

I annan deba? Ou'n lev lanmen? *Ok* Onorab Pillay – A mon ava pran Onorab Woodcock avan.

HON WAVEN WOODCOCK

Mersi Mr Speaker. Mr Speaker mon bezwen dir de mo lo sa *Bill*, par lefe ki Praslin nou annan nou en *Industrial Estate* vremen, vremen enportan.

Annefe sa lamannman ki pe ganny propoze i preski menm lamannman avek *Bill* ki'n vini, oparavan kot fonksyon *Board* i pou transfer avek Minis. E fonksyon *Board* i kler – e fonksyon *Board* avan *order* sa *Bill* - .

Sorry fonksyon sa Lotorite i ganny fer kler, dan lartik 4 dan son *Act Industrial Estate Authority Act*, kot i fer kler ki se sa lotorite son rol se pou enplimant bann *Policies* e stratezi. Gouvernman relasyon avek bann *Industrial Enterprise* e bann *Micro-Enterprise premises*.

Annefe i annan 7 *core function* vremen enportan, pou devlop e *manage* bann *Industrial Estate*, ek bann *Micro Enterprise* an kolaborasyon avek bann diferan Minister, Gouvernman, Departman e bann Lotorite, pou prepar plan

ek program pou developman, Lendistri e bann *Micro Enterprise premises*.

Pou *oversee performance of contract relating bann developman lenfrastruktir*. Pou promot a *sustainable development, of Industrial Estate and Micro Enterprise premises*.

Pou *monitor the performance and development of Industrial Estate, Micro Enterprise premises*. And *publish to report thereon*.

E en lot son rol enportan se pou etabli, *and facilitate bann etablisman, bann establishment of publish facilities and services required by the Industrial Estate*. Mon bezwen dir Mr Speaker pou ir la fason ki sa *act* ti ete avan ti fer provizyon pou annan en *Board*.

Ler ou get konponan sa *Board* i fer ki i annan bokou *overlapping* en pe konfizyon, e menm birokrasi.

Ou war pou dir ki i annan difikilte, ki pou fer ki sa *MANAGEMENT* sa *Board* i kapab annan difikilte pou desarz son responsabilite, kot i pou konsern met an plas sa bann *Policies* ki Gouvernman i annan.

E si ou pou get lo *Board of the Authority*, anba Lartik 7 (1) i dir *“the Authority shall be*

managed by a Board, consisting of a following persons. 1(a) “the Principal Secretary of a Department of Ministry responsible for Industry”, ki en *ex officio*. *The Chief Executive Officer*, osi ki en *ex officio*.

“A representative of a Seychelles (Searching) of Commerce Industry. A representative” of en lot *Minister of a Ministry responsible for Environment.”*

“A representative of a Ministry responsible for Lands. A representative of a Seychelles Licensing Authority, a member of a Planning Authority.

A representative of the Association of Tenants, of Leasees and Leasees of Industrial Estate.” Ankor en lot reprezantan Minister,

“A representative of a Ministry responsible for Land and Transport.”

Se pou sa rezon ki Mr Speaker mon krwar, in annan sitan defayans kot i konsern sa lotorite. Kot nou'n war en gro problemn *management*, kot nou'n vwar en ta bann *issues* ki'n ganny sou leve dan Lasanble a plizyer repriz.

Kot nou'n vwar ti napa en *proper monitoring*, lo la fason ki bann *Industrial Estate* ti pou ganny zere. Nou'n war problemn, nou'n vwar

speculation dan bann later endistriyel. Nou'n war kot plizyer endividi i ganny *lease* later, zot pa'n pey zot *lease*.

Nou'n war zisteman pa bokou letan dan nouvel, kot ti annan en *arrears* kot batiman "Leve Debourye", ki'n ariv plis ki R5milyon. Ki bann *lease* ki pa'n ganny kolekte. Nou'n vwar *lease* lo bann later endistriyel ki pa'n ganny kolekte. Ki'n amann pou plizyer milyon Roup. Bokou *arrears* pou plizyer lannen.

Ki nouvo *CEO* pou bezwen fer en zefor *extra* pou li kapab, rekolte sa bann revi pou Gouvernman. E nou'n vwar plizyer lendivi ki'n ganny later, zot pa'n devlop later.

Zot in asiz lo sa bann later pou plizyer lannen, e la zisteman i annan en legzersis ki pe ganny fer, pou re pran sa bann later ki pa'n ganny devlope. Ti napa en *proper Land Use Plan* pou bann *Industrial Estate*.

Nou'n vwar sa Providence, e nou'n war sa osi Praslin kot ti en dezord total. Ti mank devlopman, mank lenfrastruktir, semen, delo, elektrisite.

E ti annan en dezord total dan sa bann *Industrial Estate*. E mon santi la, avek sa lamannman ki pe ganny

anmennen i pou tir en pe sa konfizyon, sa *overlapping*.

Akoz enn, nou tou nou konnen ki mannyer bann Minister pa tro, tro – annan de ler zot mont lo lipye kanmarad. I met retar ler pou fer proze, *Planning Authority* i met en lobzeksyon. Minister Later i met son lobzeksyon.

E mwan mon konnen par lefe lannen pase, aköz mon'n *involve* dan en diskisyon kot i konsern pou fer alokasyon later *Ile Eve* Praslin. Kot ler *CEO IEA* sa letan ti anvi fer pou en serten desizyon, pou fer alokasyon later, Minister pour Later li i vini i met en *full stop* avek, i met son lipye ladan. I enterfer ladan.

Konmsi ti annan bokou sa bann lager, sa bann diskisyon kot i konsern alokasyon later. Ouswa kot i konsern bann devlopman, *micro-enterprise* kot pou fer. Konmsi ti annan en dezord total.

E mon santi pou dir, la ki fonksyon ki *Board* ti annan oparavan pe ganny transfer avek Minis.

Mon krwar pou annan plis sa lord, kot vremen Minis i kapab annan sa pli bon *oversight*, ki *FSA* ki bann *Policy* e sa bann devlopman, ki Gouvernman i anvi enplimante dan sa *Industrial Estate*, ki pou

ganny fer, se pou sa rezon Mr Speaker mwan mon pou siport sa *Bill* ki devan nou ozordi. Mersi bokou.

MR SPEAKER

Mersi, Onorab Cosgrow.

HON WALLACE COSGROW

Mersi Mr Chair. Mr Chair mon pa pou long dan mon lentervansyon lo sa bor. Zisteman akoz - lo sa lamannman, zisteman akoz largiman i toultour menm largiman ki nou'n fer lo sa *previous Bill*.

Mr Chair malgre serten pa tro kontan ler nou dir regresyon, me sa bann lamannman ki pe arive dan sa bann Lalwa, pou mwan i reprezant en regresyon. E pou nou i reprezant en regresyon dan fason govern sa bann Lazans Gouvernman.

Zisteman Onorab ki'n koze avan mwan, in koz lo konpozisyon *Board* ki ti la avan, ki ozordi pe al ganny - or in ganny met devan Lasanble pou ganny *repeal*.

Konpozisyon *Board* ti enn ki ti an glob tou bann lenstitisyon, governmantal ki annan pou fer avek devlopman. Preski tou ki annan pou fer avek devlopman, e ki ideal pou

kapab pran bann desizyon o en Lotorite konm tel.

Par egzanp *Licensing* i lo la, e ler nou pe koz *Licensing*, nou pe koz *licensing* bann biznes ki pe *operate* dan bann *Industrial Zones*. Nou pe koz *Planning* kot i konsern *building* bann *Industrial Zones*.

So mannyer sa ti ganny konstitye, ti zisteman *ideal* pou kapab fer fonksyonman sa lorganizasyon enn ki normal. E enn ki kapab efikas.

Mr Speaker *sorry* ankor ki nou pe war, nou pe vwar pouvwar i sorti governans - pouvwar governans i sorti dan lanmen en group, kot i kapab egzers serten restren lo en *CEO*.

Ouswa lo en lorganizasyon, e ganny mete direkteman dan lanmen, lebra politik Gouvernman. E dan sa ka se Minis.

E largiman i reste parey, ki nou krwar sa i pa en bon fason pou *move forward*. E nou'n vwar Mr Speaker, nou'n vwar resaman kot ler ou *bypass Board*. E *CEO* resaman in vin lo televizyon, e in dir pou dir nou pe al pran *building* "Leve Debourye," pou nou fer serten lofis akoz nou pa'n ganny ase larzan avek Lasanble Nasyonal pou *rent*.

Ki dan mon pwennvi Mr Speaker i totalman fo, akoz pa

Lasanble Nasyonal ki ti donn larzan sete Bidze Gouvernman ki ti *submit*. E Minister Finans ki ti *allocate* sa larzan avek sa Lazans. E Lasanble Nasyonal in vot pou sa larzan.

So Mr Speaker nou vwar en *building* ki ti'n ganny fer, par larzan Sekirite Sosyal. Larzan ki nou tou nou'n peye, tou Seselwa ki travay in peye. *Building* ki ti ganny fer pour bann pti biznes.

Sa letan ti annan en *outcry* deor ki pou dir *rent* i ser. Napa landrwa pou met pti biznes. So sa letan Gouvernman ti fer en *building*, pou ed sa bann pti biznes.

Ozordi ki nou pe vwar, se sa bann pti biznes prezan pe ganny demande pou sorti, pou fer lespas pou biro Gouvernman.

Nou pe ganny dir ki poudir i annan biznes ki dwa. me si i annan biznes ki dwa, nou dil avek biznes ki dwa, nou pa vin pran *building* antye pou fer lofis Gouvernman.

E menm Minis mon rapel dan nou diskisyon Bidze, mon ti demann en kestyon konsernan dimoun ki dwa *rent*, akoz sityasyon *COVID*, si nou pare pou negosye avek zot, nou pare pou koz ek zot, pou vwar ki zot problemn?

E larepons ki nou ti gannyen sete wi, nou'n pare pou vwar, *COVID* in tap tou biznes, nou'n pare pou vwar. Me la ki nou pe vwar *Industrial Estate Authority* i dir sa bann dimoun i bezwen sorti. In donn zot en mwan notis, menm bann pov pti biznes. Petet zot dwa 2mwan *rent*. Zot pa'n *operate*, ki zot pou fer?

So Mr Speaker sa ki mon'n tourn otour sa, akoz i montre sityasyon kot ler ou met pouvwar, santraliz pouvwar dan lanmen en serten, i vin en difikilte. E demen napa personn, ki pou kapab kestyonnen.

Ozordi sa bann dimoun, sakenn pe taye, pe rode kote zot pou al met zot biznes. E i pa fasil, sirtou dan sa letan *COVID* la.

So Mr Speaker ankor mon bezwen repete, sa Lalwa pou mwan, sa bann amannman dan sa Lalwa ki sa *Bill* pe reprezante. I reprezant en regresyon dan sistenm Gouvernans.

E pa sa laliny petet ki mon krwar nou, koman en pei nou devret pe avanse ozordi. Apre tou sa zefor ki nou'n fer, *over the years* pou nou fer sir ki sistenm gouvernans dan sa pei i bouz an lavans, so Mr Speaker mon termin la.

E mon ti ava kontan ki dimoun deor, i reflexir en pti pe lo sa ki pe ganny diskite ozordi.

Akoz sa i pa pou nou, i pou tou sa bann pti *businessmen* deor, tou sa bann dimoun ki pe rod later dan *Industrial Estate*. E menm Praslin lo Zil Eve, reflexir byen sa ki nou pe dir. Akoz i pou annan en lenpak demen lo zot. Mersi bokou Mr Speaker.

MR SPEAKER

Mersi. Bann Manm dan kote la arete mirmir silvouple. Onorab Loze.

HON JOHAN LOZE

Mersi Mr Speaker. Mr Speaker mon oule komanse par dir, i annan serten difikilte pou mwan dan lapros. La fason ki mwan mon oule apros sa deba.

Premyerman mon problem se ki Minis i en dimoun, ki ou pa kapab vreman kestyonn son lentansyon, akoz i kler. Minis napa move lentansyon, *that in itself is clear*.

Be selman *hurdle* ki devan nou, se ki nou pe pran pouvwar, dan en fason pouvwar in ganny demokratize konsantre li, in met li dan lanmen Minis.

Minis li menm koman en endividi mon napa okenn problem ek li. *In fact* si i annan en dimoun lo sa *Cabinet* ki mon pa pou kestyonn son lentansyon, se Minis ki devan nou ozordi. Be i pa pou dan sa pozisyon *vitam aeternam*, e sa ki nou pe diskite ozordi, se la governans.

Nou pe koz governans nou pei. Menm si i annan dimoun ki santi, ki nou kote nou pa devret pe koz lo governans nou pei. Akoz dapre zot le 24 Oktob serten dimoun ti ganny investi tye, avek pouvwar *le Messie et le Sauver*.

Be selman nou, lo sa kote latab la, nou pa pou tonm an adorasyon zot *Messie*, ek zot *Sauver* nou. Letan i ariv nou ler koze, nou pou koze, nou pou dir sa ki annan pou nou dir.

E nou pa santi ki sa ki zot pe fer, i byen. E pa vin dir nou i annan zis sa de, trwa pti *Board* la anba sa Minister.

Akoz sa la zot menm zot ki'n les konpran pou dir sa i zis en premye vole, dan bann sanzman governans ki zot pe fer. Pou annan ankor, i pou annan ankor.

E mwan mon pa pou *roll over* enkli *dead*, les zot fer. *Even if* mon konnen sa pou fer zot al kas zot nennen, koman en

Gouvernman. E mwan mon pou bat lanmen.

Mon pou kontan vwar sa mwan, be a la menm enstan i pou iresponsab lo mon par, akoz sa i mon pei sa.

I mon pei ki mon pe koz lo la ozordi. Mon bezwen azir responsab, e met devan zot pou dir sa ki zot pe fer, i pa byen. I pa pou aport bon rezilta, pou sa pep ki apel Seselwa.

E zot menm zot anba sa menm Konstitisyon la ki zot in dir i enstitye tou pouvwar Prezidansyel dan la prezidans. Li ki annan drwa fer tou, desizyon Egzekitiv. E nou, nou napa drwa kestyonn li.

Pandan 25 an zot in kestyonnen zot. Li menm li Prezidan pandan 25 in kestyonnen;- in kestyonn avek tou son kouraz ek disiplin. Alors ki problem si ozordi mwan, mon kestyonn en kou?

Dan 6enm Lasanble ki zot fer, zot in donn en bal, pil lo sa Gouvernman ki ti la. Konstitisyon ti permet zot? Be ki mal ozordi si zot pe ganny kestyonnen, poliman, zot bann *Policies* pe ganny *taken to task*?

I pa devret en problem pou zot sa. Zot pa bezwen al deter pov Prezidan Rene dan Simityer kot in antere laba, vin trenn li dan Lasanble, zis akoz

zot, zot pa kapab defann *Policy* zot prop Gouvernman?

(Wi, Onorab Norbert Loizeau vre ou ti dir, in mor les li. Mon rekonnèt, be leres, leres zot napa largiman lozik e rasyonnel, pou defann zot *Policy*, zot bezwen al deter pov Prezidan Rene, zis pou vin kasyet zot pese! Be le pase pa efas pese ozordi li.

I pa ni efas zot move lentansyon sa ki zot pe plan fer, avek sa bann keksoz ki zot pe fer. So annou arete.

Mr Speaker nou'n ganny dir pli boner, pou dir Prezidan ti dir i annan Gouvernman in vin parey en zonnyon. Nou'n met *layers* parti *layers*, ki'n redwir lefikasite.

Mon'n tann dir la anndan, en Onorab in dir sa. Be si Gouvernman ti'n vin parey en zonnyon, in met *layers*, ki'n redwir lefikasite, pandan 25 an *cette homme* ki apel zot Prezidan ozordi ki'n pronons sa, in asiz anndan dan sa Lasanble in kontribye pou met *layers*, linefikasite lo *layers* linefikasite. Be ki in fer?

Ki in fer? Sak fwa en Lalwa in vin devan Lasanble in ensiste ki i annan *Board*. In ensiste ki i annan pli bon gouvrenans, ozordi li menm li i vire. I apel sa menm gouvrenans ki li in lager pou mete, i term sa koman

zonnyon. Me problemm avek ki i ete? Problemn i ek mwan?

Mon krwar problemn i avek sanmenm sa Prezidan ki zot pe adore, zot Prezidan *byenneme* ki li in pouse pou met sa sistenm Gouvernans la an plas. Ki ozordi i pe vir ledò avek sa prop sistenm gouvernans, parske li son stil i pli ase avek en stil diktatoryal. Kot pouvwar i avar konsantre dan lanmen son *Cabinet Minis!*

E se sa, zot vin avek en largiman zot dir nou *Board*, i kout tro ser. Tro bokou larzan pe ganny depanse. Eski zot in apros sa bann Manm *Board* e demann zot pou travay *pro bono*?

E si bann Manm *Board* i refize travay *pro bono* dan en letan ki pei pe pas dan difikilte, eski ou bezwen li koman en Manm *Board*?

Eski sa dimoun i en dimoun ideal, pou en Manm *Board* si i refize li, met son lekor a servis son pei, a en moman ki pei i bezwen li.

Be sa ti pou deswit, ti pou en lendikasyon ki ou bezwen lezot dimoun lo sa *Board*. Be *still* ou ti a rod dimoun ki ti ava travay *pro bono*, ou ti ava *still* annan ou *Board* an plas, e sa largiman larzan, sa problemn larzan ti a tonbe.

So, larzan ki pey Manm *Board* i pa en largiman la, i pa en largiman valid. I pa en largiman valab, aköz zot ti'n kapab *go the other direction*, kit *Board*, be elimin larzan ki bann *Board* i ganny peye.

Sa ti'n kapab ganny fer. Be dan plas fer sa zot in zet depi kivet, pti baba, delo tou zafer zot in pran tou zot in balans dan lapay. So mwan mon kekyon sa ki zot pe fer.

Mon pou toultan kekyon sa ki zot fer mal letan ki mon trouv zot pe fer mal. E napa en lartik Konstitisyon Sesel ki pou defann mwan kekyon zot bann move desizyon.

E en pwen ki nou bezwen ganny kler tou *Board*, tou *Board under the sun* i responsab pour *oversight planning and management*. Napa *Board* ki son soz i sitan *narrow* ki i fer zis *management* ouswa i fer zis *oversight* ouswa i fer zis *planning*.

The very concept of a Board si ou annan en *Board* dan en lorganizasyon *you oversight planning and management, that's what a Board does*. I fer sa li.

So zot vin avek en bann leskiz banal ki pe zis permet zot flot flote, aköz zot napa en bon rezon pou fer sa ki zot pe fer, apard ki Prezidan in dir zot fer.

E sa zafer ki Prezidan in dir zot fer i ekrir *black and white* dan zot bann *Bill*. Zot in mete zot ki'n ekrir dan *Bill* pou dir Prezidan in dir zot fer alor zot pe fer.

Zot in *actually go as far as* ekrir dan *Bill* ki zot en bann *rubber stampers*, sa *Bill* li menm i en *rubber stamp Bill*. So ki largiman? Zot napa okenn largiman apard al deter Prezidan Rene.

Mr Speaker mon dernyen pwen ki mon pou fer, mon'n deza dir dan sa Lasanble dan 6enm Lasanble, *stop reaching beyond the grave*. I annan en *Bill* devan nou diskrit *Bill*.

Stop reaching beyond the grave to sully the memory of the dead! Annou aret rod dimoun mor pour nou maltrete isi anndan dan sa Lasanble. Si nou, nou fer sa ki nou anvi dimoun deor fer?

Mr Speaker letan dan en pei ou annan dimoun ki devret pe dir mersi en dimoun e dan plas dir li mersi nou sali son non, sa i *le pire de pire*.

E i annan nou ozordi dan sa pei Sesel, nou devret dir mersi poudir Prezidan Rene ti fer Lalwa li menm, ekrir Lalwa li menm enplimant Lalwa li menm.

Parske si pa ti koumsa la, nou ti pou dan prizon. Nou ti

pou dan prizon! Parske gran mersi sa ki ti fer Lalwa la *kept us out of prison!* Mersi Mr Speaker.

(Interruption)

MR SPEAKER

Mersi. Bann Onorab silvouple annou swiv en pe, i annan en pe mon pe tann tro souvan *off-mic* la. Kot nou ete la? Onorab Sandy Arissol.

HON SANDY ARISSOL

Mersi Mr Speaker. Bonn apre midi tou Manm, bon apre midi tou dimoun ki a lekout. Mr Speaker Lasanble Nasyonal i sa landrwa kot nou ganny peye, konman bann Manm Lasanble kot nou fer politik.

E i nou rol pour nou fer politik e i nou rol pour nou respekte sakenn swa nenport ki dimoun.

Zis parey letan Onorab Loze i dir poudir nou pe deter Mr Rene. Mon anvi zis *remind* bann dimoun lot kote latap pou dir Msye Rene ti ganny en *burial* spesyal li. Ozordi kot in antere person pa pou kapab al tir li.

(APPLAUSE)

HON SANDY ARISSOL

Zot rapel byen ti pas an direk lo televizyon e ozordi kot i ete mon krwar i anpe. So pa tro trakase Onorab Loze, personn pa pou kapab al deter Mr Rene zot zot, zot in anter li!

Mr Speaker an menm tan i enportan pour nou – parey mon pe dir letan nou pe koz lo plizyer size e la ozordi nou'n ariv lo later endistriyel. Mon krwar mwan mon pou siport sa Lamannman pour en sel rezon. Ou konnen mon krwar ti enportan pou annan lord dan nou pei.

Nou pei ti'n ariv en staz kot sakenn ti pe fer sa ki pour li, e nou'n tande. E si Lepep Seselwa ti met konfyans dan en nouvo Gouvernman le 25 Oktob lannen pase, se parske Seselwa ti'n ganny ase avek sa ki pe pase dan son pei.

Alor dimoun ti desann an gran nonm e zot in er konfyans *LDS*. E *LDS* ozordi pe ganny dirize par Wavel John Charles Ramkalawan, e i pour la pour 5an. E ankor 5an nou pou desann nou pou ralye ankor pli determinen ki zanmen.

E nou pa pou rat sa sans e nou pou koste pour Sesel pou fer sir ki Sesel i vin ankor pour tou son zanfan ankor 5an. Me parkont i annan plizyer zot la anndan ki pa pou la, e nou a fer

sir zot pa pas parey sa *Board* ki la.

Nou a siport zot nou a donn zot kouraz, nou ava fer sir zot fini zot manda, me selman nou ava donn zot sa latansyon ki zot pe rode parey Onorab Loze toultan i rod latansyon. I kontan koz lo zonnyon, ennler i met en pti gin lasos tomat lo la. En ler i sey met sa dan en dipen 50sou, enn ler i sey rod en lasyet manze. Nou konpran. Nou a donn ou latansyon ki ou pe rode Onorab e nou, nou kontiny nou travay ki nou pe fer.

Minis Devika in anmenn son Lamannman e nou, nou pou siporte lo sa kote definitivman. Parye mon'n dir parske ti annan en dezord e nou bezwen aksepte. E letan Lasanble ti vini nou'n koz lo Bidze, ti annan en kantite dezord laba.

E mon krwar in enportan ozordi, si ti annan en *Board* oparavan ki zot, zot sipoze fer zot louvraz nou pa ti a ganny dir pou dir ozordi dan *building* "Leve Debourye" i annan sa. I annan R15milyon ki pa'n ganny anmase.

I annan dimoun ki annan later laba oubyen ki annan de morso later ki pa pe fer nanryen lo la ki later zis i la. Nou'n ganny dir pou dir i annan later

ki annan zis en ta feray ki'n ganny mete lo la.

Nou'n ganny dir pou dir i annan dimoun ki'n fer dominer, ki'n antre lo later ki pa pour li. (Mr Speaker Onorab Loze i kontinyen kriy Naidu dan Lasanble, mon pa'n *disturb* li taler mon ti a kontan i pa *disturb* mwan silvouple.)

MR SPEAKER

Nou a demann tou bann Manm gard en lord silvouple.

HON SANDY ARISSOL

Onorab Loze ki pe fer sa. Onorab Loze.

MR SPEAKER

Onorab Loze met ou lanmen anba. Onorab Arissol silvouple kontinyen. Konmsi mon'n vwar sa deba in al en pe tro zis lo politik e nou pe bliy sa *Bill* ki devan nou.

HON SANDY ARISSOL

Non, non Mr Speaker i enportan pour nou fer politik e sa *Bill* i baze lo politik parske politik in arive, e pa bliye nou bann politisyen e nou ganny peye pour nou fer politik.

E i enportan pour nou tanzantan anmenn en pti gin sa politik dan sa zwe ki nou pe koz lo la. E later *IEA* toultan in en zwe politik li.

Parske souvan fwa nou'n vwar plizyer bann politisyen ki'n ganny later oubyen bann politisyen ki'n enplike pou fer sir ki en dalon i ganny en bout later.

Nou'n vwar bann Minis ki dan lepase in enplike pou fer sir ki sa enn ki gannyen, sa enn pa gannyen. Fer *bypass* sa enn pa *bypass* sa lot. Tousala in annan dan lepase Mr Speaker. Se pour sa rezon ki sa konotasyon politik toultan i la li.

Bann Minis zot konnen lekel bann Minis mon pe koz lo la. So letan zot in asize dan *Cabinet* laba i annan bann desizyon ki zot in pran.

Kekfwa nou pa al lo la ozordi akoz Speaker pa oule nou fer politik be mon a retourn lo later ki mon pe koz lo la.

Mwan mon pe vote Mr Speaker parske mon santi pou dir, parey mon dir ti annan en dezord e mwan mon kontan pou dir Gouvernman pe fer en travay.

E si ozordi sa travay ki nou pe fer an relasyon avek sa Lamannman dan sa Prozedlwa ki devan nou, mwan mon pou siporte parske parey in ganny dir plizyer keksoz in ganny dir an referans avek tou bann dimoun ki'n koze, i pou

enportan pour nou annan en keksoz kler ozordi.

E apre nou konman en Lasanble i ava nou rol parey toultan nou ganny dir pour nou retournen, pour nou re apel Minis avek son *PS*. Ki ava pour nou re demann zot kestyon an relasyon avek sa travay ki nou'n fer ozordi, si nou pa *happy* si nou *happy*.

Parske sa nou rol konman Manm Lasanble Nasyonal, mon krwar i enportan. I pa akoz Prezidan in dir e nou, nou pe zis fer. Nou Prezidan i la konman latet pou fer sir ki direksyon pe al byen.

E nou, nou'n ganny elekte an gran mazorite pou asire ki sa travay ki li i pe met devan nou atraver son Minis ki nou osi nou diriz li. E nou siport li dan sa demars ki i pe fer.

Zis parey letan zot, zot ti asiz lo sa kote latab zot ti fer egzaktman sanmenm sa. Ozordi zot vwar zot dan Lopoziyon konman en parti minorite alor prezan zot kriye.

Be nou, nou konpran sa napa problem i annan 5an pour zot kriye lo la, *ok?* E nou pou kontinyen siport proze nou Gouvernman, Nou pou kontinyen siport nou Minis letan i annan lamannman.

Be selman i ava nou sans dan Lasanble Nasyonal atraver

Speaker pour nou demann kestyon, rod klarifikasyon, rode kot nou kapab amelyore e 2an pli tar, 3an pli tar nou a kapab pran *verbatim* kanmarad pou gete ki ou, ou ti dir, ki sa enn ti dir, ki sa enn pa ti dir, lekel ki ti vote, lekel ki pa ti vote.

Mr Speaker mwan mon pou siport sa lamannman parske mon krwar laba kot nou pe koze lo later endistriyel. I enportan i annan en lord, bezwen annan en lord parske pei i perdi tro bokou larzan.

E pa bliye nou pe koz lo *taxpayers money*. En Bidze ki zot lot kote latab zot pa'n vote me nou nou'n vote. E ozordi mon kontan letan zot pe koze zot pe rod tou sa klarifikasyon me selman zot pa ti vote pour ki i annan en travay ki kontinyen ganny fer, *ok?*

Mr Speaker mwan mon pou donn siport Minis Devika avek sa ki in anmennen, e mon pou kontinyen siport mon Prezidan Wavel John Charles Ramkalawan pou kontinyen gouvern nou pei. Mersi bokou.

MR SPEAKER

Onorab mon a koriz ou. Onorab Sandy Arissol mon a koriz ou, mon pa'n dir mon pa oule fer politik. Mon rekonnet tou Manm i fer en pe politik lo la. Be annan gard lord dan Lasanble e

annou gard osi annou gard nou bann *speech* osi *focus* lo sa ki devan nou, sa *Bill*. Silvouple konpran mwan.

Onorab Loze ou'n koze ou'n fer politik ou osi, mon pa vwar pou dir mon bezwen retourn lo ou. Mersi, non nou a kontinyen. Onorab Andre.

HON CLIFFORD ANDRE

Mersi Mr Speaker. Mr Speaker mon apresye ki ou'n fer resorti ki ou pa'n dir nou pa fer politik me fer en politik ki annan respe. Mwan mon kontan letan politik i annan respe lo tou lede kote.

E ou vwar dan en Lasanble Mr Speaker *at least* Sesel nou annan 2 gro parti.

(Interruption)

HON CLIFFORD ANDRE

(Ou vwar mon pa ankor fini koze zot le koze zot osi. Be espere ekoute ki mon pe dir apre zot a konpran, *ok?* I annan de gro parti, me i annan enn ki pli for ki lot. E se sanmenm sa nou annan zis 2 kote. Se sa rezon aköz mon pe dir 2 parti, i annan 2 kote.

Nou napa lezot parti politik pour nou kapab dir nou annan ankor si nou annan en *horseshoe arrangements* kot

nou annan lezot parti politik ki pe asize.

Me ou konnen Mr Speaker, Lasanble mannyer i ganny divize i ganny divize ki enn i kote gos enn i kote drwat. E sa ki kote drwat i dan Gouvernman, sa ki kote gos i pa dan Gouvernman.

Me toudmenm zot annan en drwa pou koze, Konstitisyon ki donn sa garanti pour koze. Mwan en dimoun ki'n *advocate* sa bokou lannen e mon *believe* dan drwa imen ki bezwen koze, letan i mal i bezwen dir.

Mwan mon en dimoun ki si mon santi i annan en pwennvi ki mon bezwen mete lo mon kote latab mon pou mete, mon pa pou kasyet.

Me alors i normal ki ozordi zot pe santi ki tou sa ki Gouvernman i fer i mal. Aköz se sa *meaning* sa mo Lopozişyon. I *oppose* tou sa ki ganny fer menm si i byen i opoze, menm si i mal i opoze. Ou konpran mwan?

Dokter Gedeon in dir byen li, si napa pou dir pa bezwen dir. Pa bezwen blanm lo delo. Be i normal si ou pa le bennyen pa bezwen blanm delo. Me selman letan nou fer politik Mr Speaker i paret menm si nou pa le bennyen nou blanm delo, menm si nou pa oule servi savon nou blanm savon. *Ok?*

So i en bann letap dan politik ki nou tou nou bezwen pas a traver. Zot in bezwen asiz en kou lot kote laba, pour zot santi lefe ki Prezidan Ramkalawan ti santi pandan letan ki i ti pe asiz dan sa sez ki Onorab Pillay pe asize.

MR SPEAKER

Sa pwen pe al long Onorab Andre.

HON CLIFFORD ANDRE

Non, non, non mon pa pe al long mwan. Mon pa pe al long mwan. Mon pe zis dir ki mannyer Politik i marse.

MR SPEAKER

Annou sey avanse.

HON CLIFFORD ANDRE

Prezan pour mwan tourn lo sa *Bill* Mr Speaker. Sa *Bill* etan ki Chair *Bill*, mon'n ganny loportinite pour mwan enterakte avek bann zofisyé PS Mr Pool ki'n la dan labsans Minis ki pa - ti okipe kekfwa pe fer lezot keksoz. Nou'n konpran.

E i normal ki dan en devlopman e dan en letan parey kot *COVID* pe tap lemonn antye. E resours finansyel i pa en keksoz ki nou kapab dir i en *luxury*, ki nou annan privelez pour nou annan la.

Alors nou bezwen rod bann mwayen e bann fason pour nou kapab fer sir ki nou annan lefikasite me nou fer li avek resours finansyel ki nou annan.

Onorab Arissol in dir ki poudir dan lepase ti annan Minis ki ti donn later son bann zanmi, oubyen dimoun ki i ti santi pour rezon politik i bezwen gannyen.

Me mwan mon ti a dir letan nou pe fer sa lamannman mon ti enplor Minis. Mon ti a enplor Minis pou pa tonm dan sa kalite latrap;- pour nou pa tonm dan sa kalite latrap kot demen letan en desizyon si i bezwen ariv kot ou, e ou pou annan kontrol, sa desizyon i enn ki baze lo merit e *soundness of business*.

Ki demen letan – I annan ankor bokou lannen zot pou asiz laba, kekfwa ankor dan en 40 zot pou asiz lot kote laba. Zot ava koz, nou ava ekout zot me – (mon ti pou al reponn selman les li mon a reste trankil) ki letan bann desizyon i ganny pran i ganny pran dan bann bon lespri avek bon lentansyon.

Letan nou pe get sa Lamannman ki pe ganny anmennen i pa en gro lamannman me selman i annan gro lefe.

Mon ti poz kestyon e mon santi ki sa bann lamannman i bezwen ganny fer e Sesel ki pou benefisyé. Sesel avek Seselwa ki pou benefisyé.

E sa i ava osi fer ki sa bann prosedir ki ganny fer, i al en pe pli vit i pa tarde, e Minis i pou ganny sa bann *file* lo son latab mon mazine *within* en semenn i kapab pran en desizyon, oubyen diskite pou pran serten desizyon.

E ki en desizyon i a ganny pran dan plas esper en *Board* ler i pou zwenn tou le mwan oubyen par ler tou le 2mwan ki zot zwenn pou kapab pran en desizyon pou fer ki Seselwa i zwir sa ki son later e son pei i ofer li.

Avek sa Mr Speaker mon le donn mon lasirans ki mon pou lev mon lanmen, pa pour mwan *rubber stamp*, pa pour mwan *rubber stamp*. Mon le sa i al kler lo rikord.

Me aköz mon krwar senserman ki sa lamannman a sa staz i neser pou kapab fer nou pei avans devan. Mersi Mr Speaker.

MR SPEAKER

Mersi. Onorab Loizeau.

HON NORBERT LOIZEAU

Mersi Mr Speaker. Bonzour Minis delegasyon, bonzour tou

dimoun. Mr Speaker pour donn mwan sa sans pou fer sorti de pti pwen lo sa *Bill*. Aköz mwan mon en boug mon krwar dan lord.

Kan i annan lord dan en landrwa keksoz i marse. E an konmanse mon lentervansyon mon pou al direkteman lo en pwen ki Onorab Cosgrow in fer sorti. Onorab Cosgrow i kont disolisyon sa bann *Board* apre ki mon'n ekout son lentervansyon.

(Interruption)

HON NORBERT LOIZEAU

Mr Speaker -

MR SPEAKER

Onorab ale prosede.

HON NORBERT LOIZEAU

Non zot pe *disturb* mwan. Mr Speaker Onorab Cosgrow in dir ki i enportan pou annan sa bann *Board*, aköz sa bann *Board* li i reprezant bann dimoun ki travay dan bann Lenstitisyon ki annan pou fer avek devlopman.

Devlopman bann pti biznes. Mannyer pou okip bann later. Mr Speaker be pour mwan pou tou sa letan ki in annan sa bann *Board*, *Board* pa'n vwar labi.

Ou annan en *Board* selman *Board* pa war nanryen ki pe arive! Tou keksoz *Board* i dir i ok. Legzanp Mr Speaker bann *lease* ki pa'n ganny peye pour sepa konbyen lannen.

Be nou annan en *Board* Onorab Cosgrow. *Board* pa vwar li. Aprezan Mr Speaker sa ki enterese ek *Board*.

IEA li i annan li 14 *staff*. I annan li 14 *staff* avek en *Board* ki ti pres pou menm kantite avek lakantite *staff* ki annan.

I annan 9 sepa 12 Manm. Li i annan 14 *staff*. Aprezan menm keksoz ki *IEA* pe fer ek son bann *staff*, *Board* osi ler i zwenn tou le 4 mwan – tou le 4 fwa par an - par mwan. Par an zot zwenn? Par an, zot fer menm zafer ki *IEA* in fer!

Be akfer nou annan en *Board* Mr Speaker. I pa fer sans. E Minis pou dakor ek mwan. Menm parey ek *ESA*. Ek *ESA* taler mon'n ekoute mon ti anvi entervenir me mon'n vin tar. E sa i annan anviron 12 dimoun ki travay dan sa Sekretarya selman i annan en li en *Board* pres 12 dimoun!

A lafen *Board* pe fer menm travay ki sa 12 dimoun pe fer. Li i zwenn 4 fwa par an li. Savedir napa sans annan *Board*. Napa sans annan *Board*.

E pour *IEA* Mr Speaker sa ta keksoz ki'n arive kot later

endistriyel, si nou ti annan en *Board* ki serye petet sa bann keksoz pa arive.

Sa bann keksoz in arive akoz *Board* pa serye. Ki mannyer en dimoun 23an pase in ganny en later i pa fer nanryen lo la, apre zis la deswit konman 15 lo 10, i arive nou konmans koz lo later endistriyel bann ki'n pran pa pe fer nanryen, deswit later i ganny vann R12 milyon. Oli *Board* Onorab? Oli *Board*?

E pourtan Mr Speaker Onorab Loze in fer sorti en pwen enteresan. Onorab Loze i dir bann *Board* zot la pou anpes labi, pou annan *oversight*. Pou annan *planning* avek *management* sa Lotorite. Oli Mr Speaker?

Ozordi *IEA* laba i parey en dinanmit. Si mon pa fer atansyon mon konnen Minis ou annan en pe travay ou pe fer pour sekirite. Mon krwar mon ti koz ek ou lo la.

Kot *IEA* laba Providence Mr Speaker i kapab ekspeze demen bomaten. Pourtan ti annan *Board*, en gran *Board*! Mon pa konnen ki kalite *Board* mwan.

Sa bezwen sapili Mr Speaker, zis karya i antre ladan i pouril Se sa sa bann *Board* ki nou'n annan. Nou annan bann *Board* ki zis la konman en

Board selman zot pa en *Board* zot pa fer nanryen!

Mr Speaker nou pa kontan nou pe *get rid* avek *Board*, ozordi plis etranze ki annan later endistriyel. Ler nou demann kestyon ou konnen ki zot dir nou. Sa bann dimoun i Seselwa.

Wi zot Seselwa, bann dimoun ki vini apre i ganny *passport* anba 5(1) i vin en Seselwa landmen bomaten, ni en mo Kreol i pa konnen. Mr Speaker ni en mo Kreol i pa konnen, i pas anba *Board*, Mr Speaker

(laughter)

HON NORBERT LOIZEAU

I pas anba *Board* i ganny li 2, 3 morso. Nou'n vwar i annan i annan 3, 4 morso *Board* pa war ditou! Mr Speaker i annan later i sipoze *lease* ek dimoun. I annan posibilite Minis i annan dimoun zot in fini aste zot.

Akoz ti annan en moman ti annan en serten ti pase ti dir Gouvernman napa larzan, alors nou pe gete ki mannyer nou kapab anmas en pe larzan ek zot. Aste sa morso. Verifye sa Minis.

Ti annan *Board*, *Board* pan war. Ozordi si *Board* ti efektif Onorab atraver ou Mr Speaker, be nou ti'n fini anmas

sa 20 milyon ki mon zanmi CEO Collie pe sey large pe met avertisman pou anmase. En ta larzan!

Nou pe koz Sekretarya. Mr Collie i anvi antre dan "Leve Debourye" Mr Speaker mwan mon krwar i byen. Ou konnen akoz mon krwar i byen? Nou pa kapab annan en lantrepriz lekor i la latet i laba. Ou pa pou war nanryen ki pase Mr Speaker.

Sanmenm ou trouve i annan dimoun ki'n ganny *lease* landrwa kot "Leve Debourye" zanmen zot in antre, akoz zot annan koneksyon ek *Board*. Zot in ganny li bon marse lwe pli ser.

Mwan mon'n deza pas laba mon vwar serten Endyen pe fer *store*. Sipoze pour bann pti dimoun vin "Leve Debourye" fer zot zafer. Pe servi konman *store*, akoz sa dimoun in gannyen li.

MR SPEAKER

Onorab ou'n sot 8 minit mon pa ankor tann ou dir pour ou konklir.

HON NORBERT LOIZEAU

Wi Mr Speaker. Mr Speaker koze koumsa i ete. Koze i soufer. Mr Speaker parey Onorab Loze i dir, vre Onorab Loze i soufer. Si ou get Onorab

Loze ou vwar en boug soufer, e i dir li menm i soufer.

(laughter)

MR SPEAKER

Aret koz lo Onorab Loze.

HON NORBERT LOIZEAU

Mr Speaker be i pe enteronp mwan.

MR SPEAKER

Avanse.

HON NORBERT LOIZEAU

Mr Speaker vi ki ou'n dir mwan mon ti pe al en pti pe an tro. Mon anv i dir Minis mon krwar sa ki i pe fer i byen. Parey in arive ek *ESA*, i byen i pe arive kot *IEA*.

Akoz bann *Board* pa'n marse e sa in fer ki pei in perdi en kantite e nou ankor pe sey rode manner pou anmase. Mersi Mr Speaker.

MR SPEAKER

Mersi. Onorab Pillay.

HON SEBASTIEN PILLAY

Mersi Mr Speaker, bonswar. Bonswar tou koleg Onorab, bonswar tou dimoun ki a lekout. Mr Speaker mon pou konmans mon lentervansyon par dir mersi. Mersi bann dimoun ki'n servi lo *Board IEA*.

I annan ladan mon konn zot koman bann antreprenner tre kalifye ki'n devlope dan zot domenn. Zot fer plizyer biznes e ki mon konnen i annan plizyer Onorab lo lot kote laba ensi lo nou kote latab ki souvan fwa *at least* 1 oubyen 2 dan sa bann biznes, nou devan laport sa bann dimoun aköz biznes ki zot fer.

E mon krwar zot in ekout byen largiman ozordi ki'n ganny avanse a zot regar, zot servis, zot sakrifis ki zot in sey fer. E tou Seselwa in tande ki manner zot, zot in ganny trete konman bann profesyonnel antreprenner Seselwa ki'n debourye, devlope pour zot ariv sa nivo kot zot in arive ozordi.

E mwan lo mon kote mon swet zot mersi menm si lot kote pan kapab fer li.

Dezyenmman Mr Speaker mon kontinyen dir ou Mr Chairman aköz mon mazin nou ankor dan Bidze. Mr Speaker mon krwar i enportan pour nou sitye byen largiman.

Nou pe anmenn en largiman lo labi, lo en kantite keksoz ki reelman i pa fer an referans travay ki sa *Board* in konmans fer. Oubyen ki *Board IEA* in konmans fer.

IEA pa'n toultan annan en *Board*. *IEA* son *Board* ti ganny entrodwir an 2013 atraver son

Lalwa. Son Lalwa ti *subsequently* ganny amande an 2017, pou fer ki son *Chairperson* i en dimoun ki sorti dan sekter prive.

I malere pou vwar ki en kantite sa bann dimoun ki'n enterakte avek *IEA* i zot bann gran, gran *sponsors*. Bann gran, gran siporter zot lo lot kote latab.

E Ozordi en kantite sa bann Endyen ki swadizan in ganny – pa *passport* me sitwayennte anba 5(1) i zot siporter dan Providence ki zot pe koz lo la.

E mon swete ki zot Minis i ava pran en pe sa bann bout later ek zot bann siporter ki'n ganny sitwayennte anba 5(1) ki zot dir nou nou'n donner.

Sa i enportan ki nou met sa an perspektiv aköz *passport* pa gannyen donner anba 5(1). Se sitwayennte ki ganny donner.

Prezan ler nou vin lo sa largiman governans, ou konnen nou nou'n *achieve* en keksoz enteresan ozordi avek sa 10 nou lo lot kote latab e avek sa 25 zot an plis lo lot kote latab laba.

I se ki nou'n nobou fer zot sorti pour zot vin defann aköz zot pa en *rubber stamp*. Si zot pa ti en *rubber stamp* ti napa nesosite pour zot vin defann.

Me zot in bezwen fer li aköz mon krwar i pez lo zot konsyans. I pez lo zot konsyans aköz zot konnen pou dir zot pou bezwen siport en mezir zot Gouvernman, pa aköz zot krwar pou dir i meyer mezir ki kapab annan.

Me i plito aköz mezir ki'n ganny enpoze lo zot e zot war en nesosite pour zot fer li. I vre ki Konstitisyon i donn pouvwar Egzekitiv Prezidan, wi Lartik 66 i egziste.

Me i osi annan lartik 85 ki asire ki nou Lasanble Nasyonal nou annan lendependans, pour nou reakte dan tou fason ki nou anvi reakte, an relasyon avek okenn size ki ganny met devan Lasanble.

Nou, nou problem i se ki pa dir ek lepep Seselwa ou pe donn li savon kan ou pe servi en bros wayer pou benny li avek? Sa nou problem.

E si ou pe fer sa nou pou dir, napa nanryen mal. Zot kapab kontan pa kontan nou bezwen dir.

E ler nou vin lo size sa *Board*, rezon aköz nou pe *raise* sa bann size, set aköz nou, nou ti'n vwar poudir lapros konsantre pouvwar dan en Minister, ki nou'n deza annan ti bezwen ganny modere avek en lapros pli partisipativ.

Pou *allow* bann diferan sekter pou partisipe dan gouvrenans en lotorite enportan parey *IEA*.

Fodre nou rapel ki avan *IEA* alokasyon bann later endistriyel ti ganny fer an traver Minister responsab pour Later. Be rapidman avek evolision pei ti neser pou entrodwir en Lazans pou *manage* sa bann *estates*, akoz i pa ti fer sans pou plas li dan manda Gouvernman, pour en rezon finansyel apart lezot.

I sa rezon finansyel tre senp se ki Gouvernman pa kapab depans R500milyon an relasyon avek son *capital expenditure*.

IEA alors ti ganny en gouvrenans pli *open-ended* pou fer ki lo son kote lo li menm, i kapab *raise* larzan dan plas ki i vin kot Gouvernman. E la Gouvernman pa ava bezwen met larzan dan *IEA* ki i ava *raise capital expenditure* pei e afekte lezot proze ki Gouvernman i annan lentansyon fer.

Sa i pa vedir ki nou pe zis opoze for *position sake*. Nou'n asize nou'n mazin nou largiman ki nou pe fer akoz ti annan rezondet deryer li. *Now* ti annan defayans. Partou i annan defayans.

Me koriz defayans avek tir en keksoz konpletman i de

diferan keksoz. E se pou sa rezon ki nou largiman ler nou regard bann amannman propoze Lalwa, e ler nou regard rol ki sa *Board* ti zwe nou, nou pe met nou pozisyon devan.

Napa nanryen pou nou maltrete, batonn kanmarad akoz i senp. E nou sa ki nou le fer Lepep Seselwa konpran, se ki tou sa promes ki zot in gannyen, avan Oktob e pandan Oktob 2020, pou rapidman zot pou realize pa pou kapab ganny akonpli akoz zot in ganny ... bat ... latet! Senp!

Si ozordi *6 months down the line*, nou ankor pe koz lo dimoun ki annan 4 bout, dimoun ki annan 3 bout e zot pa ankor kapab fer nanryen, *then* mon krwar sa i pou retorik i pou langaz ki Seselwa pou bezwen tande pou dan sa prosen 5an.

E langaz ki nou pou kontinyen dir zot oli ki zot, zot in akonpli? I senp sa. Lamannman i dir poudir i le son *objects and reason* se *entrust* fonksyon sa *Board* dan Minis. Sa ki lamannman i dir.

So pou mwan ler i dir *entrust* fonksyon sa *Board* dan Minis i *entrust* tou son fonksyon. Rezon akoz sa *Board* ti annan tou sa bann Manm enkli *Planning Authority* enkli

lot partou, sete aköz *IEA* ti sipoze e ti'n konmanse.

Si zot ava rapel tre byen pandan Bidze 2019 ti vin avek en propozisyon ki 'zot' ti rezete lo kote *LDS* letan, pou *IEA* raise kapital atraver en *loan* avek labank pou kapab akonpli son bann proze ki i ti annan.

E rezon aköz ti annan sa bann dimoun lo son *Board* se zisteman pou ed li akonplir sa san ki i bezwen depan lo *in-house consultancy*, *Project Officers* Gouvernman ki sa letan ti napa ase pou fer sa travay. 'Zot' ki ti kont.

So si nou pe konplent kapasite Zil Eve, be ou ti koz kont dan Lasanble. Ou pa kapab ozordi prezan vin koz en lot langaz fodre ou mazine ki ou dir ozordi e demen.

Annou pran sa size ki'n leve lo "Leve Debourye". Nou si en dimoun i pa'n pey son *rent* mon dakor wi i bezwen pey son *rent*, aköz in ganny sa landrwa pou li fer en keksoz.

Be dan sa *building* i annan plizyer dimoun. I annan menm dimoun ki *Accountant* dan sa *building* mannyer mon konpran! Sa zot pa koz lo la? Ou konpran?

So sa ki enportan se ki si en dimoun pe fer *micro enterprise* laba i bezwen peye.

Me konsern ki nou, nou annan i se ki si ou retir lakantite lespas avek bann *micro enterprise* (e mon konnen Minis sa i pa size ou lamannman, me i en size topikal ki'n ganny souleve)

Wi i annan *arrears* me si ou retir sa lespas kote ou pou donn zot en lot lespas? E dan ki dele letan ou pou kapab donn zot en lot lespas? Se pou sa rezon ki menm *Designated Minister* ti admet ki pou annan en negosyasyon avek sa bann dimoun.

E mon *hope* i pe annan diskisyon avan ki zot ganny zis *evicted* from sa landrwa kot zot ete. Malgre ki i ava annan serten *impropriety* ki'n arive, si in annan *then* aksyon a ganny pran.

Me si i neserer kot i annan en *bonafide reason* - en vre rezon pou negosye *then* negosyasyon i bezwen ganny fer. Se sa ki mon krwar nou tou nou pe rode.

So an konklizyon Mr Speaker mwan mon pou dir sa;- Minis ou'n ganny en latas enteresan ki'n ganny met devan ou par Onorab Andre ki'n dir sa. Atraver ou Mr Speaker Onorab in dir ki si en *file* i vin lo ou latab. Mon pa pou kapab *impute* Minis.

E mon pa pou kapab met ou dan en pozisyon poudir ki desizyon ou pou al fer *that would be wrong*, i pou kont *Standing Orders* pou mwan fer sa.

Me rezon akoz ti annan saler gouvènan, se zisteman pou donn ou sa *oversight* ki ou ava kapab vini e fer arbitrasyon lo si e desizyon in ganny fer pou favoriz en lot dimoun. Sete sa saler ki ti'n ganny kree.

I pa ti'n ganny kree avek lentansyon pou fer keksoz pli difisil. E mon pa krwar sete sa lentansyon ki sa *previous Board* ki en kantite nou nou'n pas nou letan ozordi pou maltrete. *You should be ashamed!*

Kantite zot la anndan zot konn sa bann dimoun personnelman e zot pa'n pran letan pou mazine lekel sa bann dimoun ki ti lo sa *Board*. *You should be ashamed!* Zot in drag non sa bann dimoun dan labou e tret sa bann dimoun konman dimoun ki'n fer *as if* labi kot *IEA*. *And this is wrong!*

Pa ti devret fer sa! pa ti neser! Sa bann dimoun ki ti lo sa *Board* zot pa perfe. Me selman mon krwar sa bann dimoun in sey fer zot louvraz avek dedikasyon e ki sa bann dimoun ki'n travay lo sa *Board*.

E mwan personnelman mon konn sa *Chairperson* e

bokou zot, zot konn sa *former Chairperson of the Board* e lezot Manm sa *Board*.

So mon krwar nou bezwen rod nou bann *facts get our facts right* avan nou zis atak repitasyon dimoun. I neser sa. *Minister* mwan mon pa pou *impute* lo ou. Mon pa pou *impute* okenn keksoz lo *Minister*. Ou annan ou en latas difisil devan ou, *all that we are asking of you* se ki regard larealite an fas ou pa pou kapab vin en *super Minis* ki pou *micro manage* tou keksoz dan ou *Minister*.

E sete sa rezon ki ti annan en sistenm gouvènan. Sete sa rezon ki sa ti la e ti ganny mete dan lanmen en dimoun ki ti dan *private sector*, ki koz langaz *private sector*. Fer li pli fasil pou annan sa *interface*.

So vwala Mr Speaker mon lentervansyon *sorry* si mon'n al en pti pe tro long. Mersi pou ou lendilzans e mon remerci mon bann koleg pou donn mwan sa latansyon. Mersi.

MR SPEAKER

Mersi. Onorab Georges.

HON BERNARD GEORGES

Mersi Mr Speaker. Mr Speaker mon pa pou tarde letan pe kit nou. Mon asize la apre midi anefe mon'n asize la depi

bomaten, pe ekout zot lo lot kote pe donn nou leson.

Nou, nou dan Gouvernman depi Oktob lannen pase. Zot, zot in dan Gouvernman 43an e dan 43an zot pa'n kapab aprann ki manner pou fer en dimoun pey zot lokasyon, pou fer dimoun siny zot *lease* ...

(APPLAUSE)

HON BERNARD GEORGES

... pou anpes dimoun pran 2, 3, 4 bout later e zot, zot asize la apre midi e zot donn nou leson. Ki manner ou apel sa Mr Speaker? Zot, zot vot tou Lalwa ki Gouvernman i anvoy devan zot pandan 43an apre zot vin koz *rubberstamp* avek nou!

Silvouple, silvouple mon bann koleg lo lot kote latab, si zot annan en bannann pou manze manz li apre met lapo dan bin!

(laughter)

HON BERNARD GEORGES

Akoz nou, nou pa zot bin pou lapo bannann nou. Konpran parey zot in sey eksplik nou apre midi, konpran ki nou dan en larenn politik. Nou pou fer politik. E si parey sa seri Lalwa i montre ki zot politik lo nivo

gouvernans pa'n marse, konpran ki nou pou kontinyen dir zot ki zot politik pa'n marse e se pou sa rezon ki fodre i sanze. Fodre zot konpran sa.

Nou, nou ti asiz lo zot kote latab pandan konbyen letan? Depi ler miltiparti in retournen 30an-28an? Nou'n asize laba nou.

Mwan ler mon'n antre dan Lasanble Nasyonal ti annan zis 3 nou. Enn ozordi i Prezidan Larepiblik lot i Onorab Esparon ek mwan la. Nou, nou'n ariv kot nou'n arive ozordi akoz nou'n pare pou fer sa bann sanzman anmezir nou ale.

Nou'n pare pou sanz keksoz ler nou'n vwar i pa byen. Nou pa'n zis asize e pres avek zot lo ki manner keksoz i mal. Alor silvouple aret koz lo *rubberstamp*, aret defann keksoz ki pa kapab defann.

I pa fer nou okenn gran laglwar pou nou dir ki keksoz pa'n marse. Akoz malgre ki nou pa ti Gouvernman sa ti nou pei. E sa bann dimoun ki travay dan Gouvernman bokou wi i nou zanmi.

Me se pa akoz zot nou zanmi e ki nou konn zot ki fodre nou dir ki ler zot in fer en keksoz mal ki i ti byen. Sa i pa posibil, akoz i pa pou onnet. E si nou kontinyen fer sa nou pou kontinyen vin parey zot.

(APPLAUSE)

HON BERNARD GEORGES

E si i annan en keksoz ki nou pa pou fer se vin parey zot. Mr Speaker napa nanryen mal avek *Board*. Annefe i annan en kantite *Board* ki pou reste. Demen nou pou vwar enn ki pe reste. Sanmenm sa Minis ki pou vini ki pou eksplike ki manner i annan en *Board* ki pe reste.

Nou napa problem ek *Board*. I annan en problem ek gouvènan. Ler en *Board* pa kapab fer sa travay ki i pe fer oubyen ler i pe kout tro larzan, oubyen ler i pa pro aktiv, oubyen ler i *overlap* nou bezwen annan kouraz pou kapab sanze malgre ki serten dimoun pa kontan.

E se tou sa ki sa Gouvènan pe sey fer. E wi Onorab *Leader* Lopoziyon atraver ou Mr Speaker, Gouvènan i fer sa par Egzekitiv pran en desizyon e vin devan sa Lasanble, e demann nou enterim sa desizyon dan en Lalwa. E se sa ki nou pe fer ozordi. Mon pa konpran akoz zot pa kapab konpran sa.

Alor Mr Speaker sel keksoz ki nou pe fer ozordi, se demontre en diferan fason pou

opere se tou pa plis. Sa bann antite pou kontinyen travay egzaktman parey zot travay.

Zot pou *achieve* meyer rezilta. Zot pou perform bokou pli byen e zot pou tir nou dan en sistenm kales kase. E remet sa kales lo semen kot i devret ete. Se tou ki pe arive la apre midi Onorab *Leader* Lopoziyon avek ou tim.

Alor silvouple konpran ki ler en Gouvènan i gouvènen, i gouvènan avek son mazorite dan son Lasanble. E si Gouvènan in demann nou ozordi siport en linisyativ ki nou vwar i byen nou pou siport li.

Si ou anvi apel sa *rubber stamp go ahead* i pa pou sanz nanryen. Lalwa Minis pou pase, Prezidan pou sinyen e *Board* pou disparet. Mersi Mr Speaker.

MR SPEAKER

Mersi. Minis ou ti a kontan adres en repons lo deba silvouple.

MINISTER DEVIKA VIDOT

Mersi Mr Speaker. Mersi tou Manm Onorab pou zot kontribisyon. Annefe mon ti a kontan konmans par donn zis en pti refleksyon lo *Board* e lafason in travay.

Annefe petet lafason ki manner nou pe vwar se ki

Board in travay me sa ki ti evidan se sa konfizyon total ki ti egziste.

Se sa ki'n ganny *highlighted* sa konfizyon. Parske ou vwar klerman pou dir Gouvernman ti annan Polisi ki ti la. *Board* ti pe fer son travay malgre i ti pe kapab fer en keksoz ki byen me selman *it was according* zot fason travay e i pa ti pe marye ansanm avek sa ki pou Gouvernman.

E sa travay ki Gouvernman ti anvi fer. E sa ti evidan i annan Polisi ki ti' ganny set e *IEA* i en legzanp konkret. E ti annan en serten Polisi *Land Allocation Policy* ki pa ti pe ganny sivre ditou. Eksepte an en lenstans lannen pase an Oktob.

E sa i malere parske sa i en Polisi ki ti'n ganny agree Gouvernman ti'n fer en konsiltasyon avek tou Departman. E senpleman i pa ti pe ganny swiv. Alor i montre konfizyon ti egziste. En konfizyon total.

So nou pa kapab blanm sa bann *Board* osi o kontrer nou remersye zot pou zot travay. Ozordi mon'n annan bokou kominikasyon avek *Chairman of the Board*.

E li osi tou i resanti poudir i annan serten defayans ki'n arive an term desarz bann

fonksyon. E posibleman i zis anefe anfen nou aret blanmen me selman nou bezwen bouz devan.

An se ki konsern "Leve Debourye" mon osi mon bezwen adres sa size en pti pe ozordi, pou mwan donn zot en pti pe lesplikasyon otour sa. Parey zot konnen" Leve Debourye" i enn sa bann *Enterprise Centres* parmi detrwa ki anba posesyon *IEA*.

E i enn parmi ki nou pe kolekte zis 16poursan *rent* kot sa *Micro-Enterprise Centre*. E parey zot konnen wi nou'n donn notis serten *tenants* pou fer zot sorti dan sa bann lespas. Me nou pa'n fer sa zis akoz nou pe target pti biznes e tou sa. I annan rezon.

Sa bann dimoun – laplipar sa bann *tenants* zot annan zot *arrears* ki date depi avan letan *COVID*. So 2018 ti napa *COVID*, 2019 ti napa *COVID*. So pou bann ki'n ganny tape par *COVID* sa nou pou kapab ganny en konpran.

E i bon fer resorti poudir dan sa bann morso lespas ki nou'n idantifye i annan bokou ladan ki'n zis volonterman vini in rann lakle. Parske ou vwar poudir ti napa vreman nanryen ki zot pe fer.

So tousala i bann fason fer ki nou bezwen regarde ki

manner nou *allocate* lespas avek dimoun. Ankor i fer mwan zis selman ankor realize, i annan sa bann biznes wi nou pe demann zot pou sorti akoz zot *arrears* i bokou.

Zot bezwen *settle* zot *arrears* avek Gouvernman. Me mazin sa bann lezot aplikan ki deor ki lo *waiting list* laba. Lo *waiting list* IEA i annan apepre 800 aplikasyon.

E apepre lanmwatye ou menm en pti pe mwens i pe esper en lespas. Me kot ki IEA i antre e akoz nesosite ki'n bezwen li servi en pe sa bann lespas pou li kapab *accommodate* son lofis, set akoz IEA dan lepase e ziska konmela i a pe deservi li en *rent* R1milyon en pe plis ki R1milyon dan en lannen, lo en morso later kan li i sipoze en *body* ki ti sipoze pe zer later endistriyel.

Tou sa letan i ti'n kapab ganny li son prop later, fer son prop *building* lo la. E tousala ti anba governans en *Board of Directors*, Minister me selman sa vizyon, sa direksyon pa ti la, sa kordinasyon pa ti la i pa ti pe egziste.

Alor avek sa R1milyon tou le lannen ki i ti pe peye, i ti ava met de kote i ti a kapab fer son prop *building* ozordi. E alor an

se moman sa i sa sakrifis ki nou bezwen fer pou IEA.

Nou bezwen pran en pe lespas pou nou *save* lo sa *rent*, pou nou kapab met li de kote pou nou kapab fer en *building* ki ava vin *for office* – pou lofis IEA.

E mwan mon krwar poudir sa i en fason pli responsab pou kapab zer sa larzan. Parske apre tou sa R1milyon *rent* ki nou pe peye ki Lasanble i vote pou al donn IEA pou pey *rent*, se *taxpayers money* osi.

Savedir si ou pe kalkil sa biznes ki ou pe perdi sa *rent* avek. Me selman ou annan sa lot larzan lot kote ki ou pe pran avek sa manman tousel, avek sa bann pli pti biznes ki pe pey zot taks. So nou bezwen kalkile tousala.

Solman mon vwar li en keksoz pli responsab. I en keksoz ki – i malere ki petet letan sa *building* ti'n fer nou pa'n mazin davans pou *set aside* detrwa lespas, pou *accommodate* lofis IEA epi la nou fer distribisyon.

Me selman lefe i reste ki sa bann *tenants* laplipar 3 kar e plis tou, zot *arrears* ti *date* avan letan COVID. E pou sa bann ki si zot in ganny tape avek pandan COVID byensir zot pou

bezwen apros *IEA* pou fer konversasyon.

Me sa ki nou'n vwar se ki zot pa ti ankor apros *IEA*. E la depi ler lanons in ganny fer i senpleman zis 2 dimoun ki'n apros *IEA* pou fer konversasyon. So nou bezwen asize regarde eski vre sa bann dimoun ti pe enterese pou zot la ouswa non?

E ankor mon ti ava zis anvi eksplike poudir sa notis ki'n ganny donnen la, i pou ganny fer pou ganny servi a tou dimoun dan sa *building* ki pa ankor pey zot *rent*. I annan dimoun la an se moman e dan sa bann dimoun ki nou'n donn notis ki pe dwa ziska R200 ekek mil.

E ou pe pey en *rent* R4mil 500 par mwan. So pou ou ariv R200 ekek mil konbyen letan ou pou al pey *rent*? 3an. 3an sote. So i annan de fwa nou bezwen regarde.

E mon konnen nou Minister nou la pou nou promouvwar biznes. Me selman nou la pou promouvwar biznes responsab. Nou bezwen responsab. Nou'n siny en lagreman pou pey nou *rent* nou bezwen fer sir nou pe deservi nou lagreman.

Alor la fason ki nou fer keksoz nou bezwen sanze. Nou bezwen sanze sa i en pwen

fondamantal. An fen kont mon anvi re fer sorti pwen *accountability*.

With removal sa bann *Boards* ozordi zour zot vwar mwan mon vin devan zot, tou sa bann keksoz nou'n kapab fer resorti aköz?

I aköz Minis in deside annan sa linisyativ. E i konpran lenportans *accountability* anver larzan ki pe ganny donnen avek li. pou li zer sa bann resours. E responsabilite ki i annan anver lepep avek ki mannyer i zer sa bann resours.

E an sa ki konsern bann labi, ki bann Minis in fer petet dan lepase sa ki mon kapab asire se ki nou pou annan bann prosedir ki ganny met an plas.

By the time ki i pou arive, e si i le rezon ariv kot Minis se i pou'n pas atraver tou sa bann teknisyen ki sipoze pe donn zot *approval*.

So sa i pa zis en keksoz ki nou pou pran li a la lezer. I pou annan prosedir an plas ki pou ganny mete byen. Mersi.

MR SPEAKER

Mersi Minis. Bon e avek sa nou'n ariv letan pou nou vot lo *general merit of the Bill*. Mon ava apel bann Manm bann ki an faver lev lanmen silvouple? Onorab Loze ek Onorab Pillay si

zot pa pe vote zis obzerve. Mersi. Okenn Manm ki kont?

Bon, vot lo general *merit of the Industrial Estate (Amendment) Bill, 2021* in ganny 24 vot pou. 0 vot kont. E 9 abstansyon. Alor *Bill* in pase lo *general merit*. Avek sa mon ava apel Madam Deputy Clerk pou fer *Second Reading*.

MADAM DEPUTY CLERK

Mersi Mr Speaker. *An Act to amend the Industrial Estate Authority Act 2013, (Act 9 of 2013)*

MR SPEAKER

I byen sa? Bon. *Ok* nou'n ariv lo *amendments*, Komite. Nou a pas dan Staz Komite. Wi lekel ki pou entervenir? Onorab Andre wi.

HON CLIFFORD ANDRE

Mersi Mr Chair. Mr Chair avan tou mon oule remersye tou Manm *Bills Committee* pou sa zefor ekstra ki nou'n fer pandan letan Bidze dan *lunch time*, pou nou kapab pas lo sa bann *Bill*.

E mon oule osi egalman remersye PS Mr Pool e bann lezot dimoun ki'n rankontre nou pou donn nou en *briefing* lo bann *Bill*.

Mr Speaker bann lamannman ki nou pe propoze par lefe ki Deputy Clerk in dir

nou i *Act 9 of 2013*. Me avan ki mon al lo *the main Act itself* nou annan bann *arrangements of section*. Par lefe ki nou pe tir *transitional provision* nou pou bezwen *delete Section 9* dan '*arrangement of sections*.'

So nou a pran li koumsa apre nou ava – letan nou ariv lo 9 nou zis konnen poudir in sorti. *Act 9 of 2013 Amendment of Section* dan limero 1, Seksyon I, i koz lo *Section 2, Amendment of Section 2 of Act*, i koz 3 of 2018. So sa i lerer ki nou bezwen korize pou fer li met '*Act 9 of 2013*.'

Letan nou ariv lo Seksyon 2 i *Act 9 of 2018* so i pou bezwen vin '*2013*'. Sa i bann koreksyon ki'n ganny propoze. E nou annan *as amended* e in koup sa 2. *Initially* nou ti'n ganny antye dan *Section 2*. So in separ li (A) avek (B).

(A) *would read "by repealing the definition of Board Chairperson and member; (Met en semi colon.)*

(B) *In the definition of Industrial Estate by repealing the words "on the recommendation of the Board."*

So avan sa ti annan sa *recommendation of the Board* par lefe ki i pe tir *Board* so i bezwen *repeal* sa mo. *Ok* so nou al lo-

MR SPEAKER

Parey labitid si *panel* i le diskrit sa bann soz zis lev lanmen silvouple. Sansan nou kontinyen. Wi Onorab.

HON CLIFFORD ANDRE

Lo Seksyon 5 apre *'amended.'* So mon ava lir pou nou ganny en konpran. *Section 16(2)(b). The principal Act is amended.* I annan en *comma* apre. *Sorry delete the comma,* akoz ti annan en *comma.* Nou pe *delete* sa *comma* pou nou fer li *"amended by appealing."* So it would read better in the drafting language.

Menm zafer dan Seksyon 6, *the comma would be deleted. There would be a comma by repealing the words, comma, 'member - members.'*

Mon mazine napa okenn *issue.* Nou pou kontinyen. *Amendment of Section 23* ki 8yenm Seksyon 8 dan sa lamannman ki nou pe prezante. I lir koumsa.

"Section 23 the principle Act is amended" li osi *we delete the comma after that. By repealing the words - one all we remove capital 'M' we place it with a small 'm' - "all members."*

And we remove 'and.' *And replacing it with "officers."* So it would read as such.

"Section 23 a principal Act is amended by repealing the words one, all members and replacing it with officers."

Aprezan *transitional provision* ki ti dan Seksyon 9 i ganny tire konpletman. So sa i bann lamannman ki nou pe propoze e ki'n pas atraver *Bills Committee.*

Mon pa'n vwar okenn dimoun lo *panel* Chairman. Mon pa konnen si i annan okenn *issues* oubyen nou pe *go with the flow of what is recommended.* So -

MR SPEAKER

Byen la ankor bann amannman ti plito bann *punctuation* ek enn de mo ki'n azoute. E *delete* sa *transitional provision.* *Panel* okenn reaksyon? Annord, *ok.* Zot annord Onorab Andre. Ou'n fini?

HON CLIFFORD ANDRE

Wi Mr Speaker nou'n fini.

MR SPEAKER

Nou'n fini avek *amendment?* Alor ankor enn fwa nou pa bezwen vot lo *amendment.* In ganny aksepte. So nou a retourn dan Staz Lasanble pou nou prosede avek *Third Reading.*

E avek sa - mersi *Sergeant.* Avek sa mon ava

envit *LGB* pou prezant Mosyon pou *Third Reading*.

HON BERNARD GEORGES

Mersi Mr Speaker. Mr Speaker anba *Order 76(1)* mon *move* ki *Industrial Estate Authority (Amendment) Bill 2021* i ganny lir en Trwazyenm Fwa. Mersi.

MR SPEAKER

Nou a demann en *secondment*.

HON BERNARD GEORGES

Onorab *Leader* Lopozisyon i anvi ki mon azout de mo. Mon *move* ki *Bill Industrial Estate Authority (Amendment) Bill as amended* i ganny lir en Trwazyenm Fwa. E mon annan gran plezir pou swiv son lord. Mersi.

MR SPEAKER

Mersi. En *secondment* silvouple. Onorab Arissol wi.

HON SANDY ARISSOL

Mersi Mr Chair. *As amended* mon segonde. Mersi bokou.

MR SPEAKER

Mersi. Nou a vot lo sa *Third Reading* silvouple? Manm ki an faver lev lanmen? Byen. Okenn Manm ki kont? Mersi.

Alor *Third Reading of the Industrial Estate Authority (Amendment) Bill 2021* in ganny

24 vot pou. 0 vot kont e 10 abstansyon. *Bill* in pase lo *Third Reading*. Avek sa mon a demann Madam Deputy clerk pou fer *Third Reading of the Bill*.

MADAM DEPUTY CLERK

Mersi Mr Speaker. *This Act may be cited as the Industrial Estate Authority (Amendment) Act 2021*. Mersi.

MR SPEAKER

Byen. Alor mon annan plezir pou dir ki *Bill* in ariv dan Lalwa. Mon krwar nou a bezwen aret la pou ozordi. Nou anmans sa ki reste pou en lot zour.

Avek sa mon a dir Minis avek son delegasyon mersi bokou pou zot partisipasyon e Minis i avek nou ankor demen. E mersi bann Manm. Nou ava *adjourn* e nou ava zwenn demen bomaten 9er. Mersi.

(ADJOURNMENT)